

楊盈川集

序

楊盈川集序

嘗觀經籍阨於先秦之火掇於中原之兵浸聚浸逸幸遇好文之主下求遺之詔括以輜使竈以官資磨壁既穿汲冢斯發隋唐而後始廣備云經史子傳且闕矧文集乎大唐弘文風沿江左道盛開元時則王勃楊炯盧照鄰駱賓王並稱年少俱擅高才海內號爲四傑馬氏云王集二十卷劉元濟爲之序駱集十卷郝雲卿爲之序然王詩賦之餘未覩他撰駱書啓之外罕戴雜篇虛惟詩賦附以五悲咸似未全書也楊集三十卷後止二十卷今皆無存馬童氏子鳴耽籍謂淫嗜書成癖而盈川者其所產地也忝茲下民

楊盈川集序

一

眷言父母年祀縣隔桑梓猶存邇穀水以興懷眺龍丘而寄慨搜輯遺文彙裒簡帙上於郡守高淳韓侯深獎斯舉移之縣令南昌涂侯樂董厥成若子鳴者學臻博極識闡淵微架富緹細載充兼兩秘監取正訪於茂先武庫所無詢之弘靖伐山而採羣玉披沙以檢碎金總得詩賦四十二首序表碑銘誌狀雜文三十九首勒爲十卷保殘守缺存十於千不愈於湮沒乎夫著作之文張道濟譬之懸河宋延清歎其游刃若渾天之製考覈精詳冕服之辯援引該洽顧不可傳耶設使生同其時則吳公之知賈傳卬令之重長卿抑奚讓馬子鳴懼希寶之弗耀豈抱衡而自私

哉其憐才甄藝志蓋可嘉矣韓名邦憲己未進士涂
名杰辛未進士爲良守令云

萬曆丙子仲春旣望

賜進士尚書吏部司勳郎吳郡皇甫汈子循撰

楊盈川集序

盈川集者唐盈川令贈著作郎華陰楊侯炯之所撰也楊侯有詩文二十卷世遠遺逸流傳者僅詩一卷余竊生侯州民之後每見侯文章於他書輒自手錄凡得如千篇久之恐復散漫因爲詮次成帙仍其舊題曰楊盈川集云它日郡太守高淳韓公行縣龍丘山中召父老文學士詢文章風土余踧以是編請公啓而爲之色喜以爲文章之士莫侈乎唐其間以州郡名集者韋應物柳宗元賈島之外無幾焉夫蘇州尚矣至柳與長江本遐陬小壤卒以一守一尉之故名不下邦國顧茲集也豈不謂重乎盈川也哉因載

與俱歸移文銀梓於縣會南昌徐侯以文學飾吏事欣然承公意公因俾余紀其槩按輿地書盈川廢縣在潞水北其地隸龍丘去郡四十許里今址巋然獨存舟車水陸由楚粵朝京師以及自北而南道出其下咸望而指爲楊侯治邑草木川原猶生靈氣彷彿丹青炳焉其間也始侯令盈川無何卒縣尋罷故民請尸祝其地至今春秋不輟夫盈之地自有民物以來不知歷幾何年至侯誕靈而縣始立縣自設長吏而下亦不知歷幾何人視所官之地亡而其神不亡以意求之侯利澤入民之深蓋必有他人之所難惟是史冊所載盡畧其治行余竊疑焉要之當時必

以侯長於文學發而爲詞華足以藻飾區宇嘉惠人士文章與政通風俗以文變明乎此則達於彼又何必紀其他爲可重於侯哉韓公力行務合人心謂侯之政事旣不可考不得已斯求其次傳載侯所造如懸河注水酌之不竭又曰游亦諸子伏道孔門文其如此故當流布四海人人見而快之又豈徒用慰一盈川人之思也刻其可後乎哉昔宋慶曆間歐陽永叔得韓文脫本於漢東李氏由是中州人始知其書今楊集故非當時之舊亦以萬曆初韓公涂侯得之於余余故未敢論其尊賢舉墜之政然於事之相符也要豈偶然者耶今集凡十卷本傳雜文別爲一卷

萬曆三年春三月旣望童珮子鳴甫撰

楊盈川集目錄

唐 華陰 楊炯 撰

皇明龍游 童珮詮次

卷一

賦

渾天賦 并序

青苔賦

卧讀書架賦

幽蘭賦

老人星賦

庭菊賦 并序

卷一集目錄

一

浮漚賦

孟蘭盆賦

卷二

五言古詩

廣溪峽

巫峽

西陵峽

奉和上元醮宴應詔

五言律詩

從軍行

劉生

送臨津王少府

送豐城王少府

送鄭州周司功

驄馬

出塞

有所思

梅花落

折楊柳

紫驢馬

戰城南

送梓州周司功

送楊處士反初卜居曲江

五言排律

送劉校書從軍

遊廢觀

和石侍御山莊

和崔司空傷儂

和騫右丞省中暮望

和劉侍郎入隆唐觀

和輔先入昊天觀

和酬黟州李司法

和旻上入傷果禪師

和鄭校讐內省眺矚思鄉懷友

和劉長史答十九兄

送李庶子致仕還洛

早行

途中

五言絕句

夜送趙縱

附炯姪女臨鏡曉粧

卷三

序

王勃集序

彙冊目錄

三

宴族人楊八宅序

送東海孫尉詩序

登秘書省閣詩序

崇文館宴集詩序

李舍人山亭詩序

送徐錄事詩序

送并州旻上人詩序

晦日藥園詩序

群官尋楊隱居詩序

宴皇甫丘曹宅詩序

卷四

碑

大唐益州大都督府新都縣學先聖廟堂碑

文

遂州長江縣先聖孔子廟堂碑

卷五

碑

少室山少姨廟碑

銘

梓州惠義寺重閣銘

表

爲劉少傅等謝勅書慰勞表

羣芳集目錄

四

議

公卿已下冕服議

卷六

神道碑

後周青州刺史齊貞公宇文公神道碑

後周明威將軍梁公神道碑

唐同州長史宇文公神道碑

卷七

神道碑

唐恒州刺史建昌公王公神道碑

唐贈荊州刺史成公神道碑

益州溫江縣令任君神道碑

原州百泉縣令李君神道碑

卷八

神道碑

瀘州都督王湛神道碑

唐右將軍魏哲神道碑

唐上騎都尉高君神道碑

唐昭武校尉曹君神道碑

卷九

墓誌

鄮國公墓誌銘

善州善目錄

五

常州刺史伯父東平楊公墓誌銘

杜袁州墓誌銘

隰川令李公墓誌銘

李懷州墓誌銘

從弟去盈墓誌銘

從弟去溢墓誌銘

從甥梁錡墓誌銘

卷十

行狀

中書令汾陰公薛振行狀

左武衛將軍成安子崔獻行狀

祭文

爲薛令祭劉少監文

詹事府官寮祭郝少保文

爲梓州官屬祭陸鄴縣文

祭汾陰公文

附錄

唐書本傳

新唐書本傳

溫泉莊卧病寄楊七炯

贈別楊盈川箴

祭楊盈川文

盈川集目錄

六

唐會要

文獻通攷

容齋隨筆

唐書裴行儉傳

唐詩紀事

唐詩品彙

楊炯集序

楊盈川集目錄

楊盈川集卷一

唐盈川令華陰楊炯撰

賦

渾天賦

并序

顯慶五年炯時年十一待制弘文館上元三年始以應制舉補校書郎朝夕靈臺之下備見銅渾之象尋返初服卧疾丘園二十年而一徙官斯亦拙之効也代之言天體者未知渾蓋孰是代之言天命者以爲禍福由人故作渾天賦以辯之其辭曰客有爲宣夜之學喟然而言曰旁望萬里之橫山而皆青翠俯察千仞之深谷而皆黝黑蒼蒼在上非其正色遠而望

盈川集卷一

一

之無所至極日月載於元氣所以或中或昷星辰浮於大空所以有行有息故知天常安而不動地極深而不測可以作觀象之準繩可以作譚天之楷式有稱周髀之術者驟然而笑曰陽動而陰靜天廻而地游天如倚蓋地若浮舟出於卯入於酉而生晝夜交於奎合於角而有春秋天則西北旣傾而三光北轉地則東南不足而萬水東流比於圓首前臨曾者後不能覆背方於執炬南稱明者北可以言幽此天與而不取惡遑遑而更求太史公有睟其容乃盱衡而告曰楚旣失之齊亦未爲得也言宣夜者星辰不可以闕狹有常言蓋天者刻漏不可以春秋各半周三

徑一遠近乖於辰極東井南箕曲直殊於河漢明入
於地葛稚川所以有辭候應於天桓君山由其發難
假蘇秦之不死既莫能知其說儻狸首之重生亦不
能成其筭也二客嘗亦知渾天之事歟請爲左右揚
榘而陳之原夫杳杳冥冥天地之精混混沌沌陰陽
之本何太虛之無礙俾造化之多端南溟玉室之宮
爰皇是宅西極金臺之鎮上帝攸安地則方如碁局
天則圓如彈丸天之運也一北而物生一南而物死
地之平也影短而多暑影長而多寒太陰當日之衝
也成其薄蝕衆星傳月之光也因其波瀾乾坤闔闢
天地成矣動靜有常陰陽行矣方以類聚物以羣分

吉凶生矣在天成象在地成形變化見矣剖之以三
門張之以八紀其周天也三百六十五度其去地也
九萬一千餘里日居月諸天行地止載之以氣浮之
以水生之育之長之畜之亭之毒之蓋之覆之天聰
明也聖人得之天垂象也聖人則之其道也不言而
信其神也不怒而威驗之以衡軸考之以樞機三十
五官有羣生之繫命一十二次當下土之封畿中衡
外衡每不召而自至黃道赤道亦殊塗而同歸表裏
見伏聖人於是乎發揮分至啓閉聖人於是乎範圍
可以窮理而盡性可以極深而研幾天有北斗杓携
龍角魁枕參首天有北辰衆星環拱天帝威神尊之

以耀魄配之以勾陳有四輔之上相有三公之近臣
華蓋巖巖俯臨於帝座離宮奕奕旁絕於天津列長
垣之百堵啓闔闔之重闈文昌拜於大將大理囚於
貴人泰階平而君臣移招搖指而天下春東宮則析
木之津壽星之野箕爲傲客房爲駟馬天皇對於攝
提皇極臨於宦者左角右角兩曜之所巡行陰間陽
間五星之所次舍後宮掌於燕息太子承於冢社宗
人宗正內外敦叙於家邦市樓市垣貨殖畢陳於天
下北宮則靈龜潛匿騰蛇伏藏瓠瓜宛然而徜徉聞雷
女終朝而七襄登漸臺而顧步御輦道而徜徉聞雷
寔之隱隱聽枹鼓之破破南斗主爵祿東壁主文章

蠶川集卷一

二

頰女主布幣牽牛主關梁羽林之軍所以除暴亂壘
壁之陣所以備非常西宮則天潢咸池五車三柱奎
爲封豕參爲白虎胃爲天倉婁爲衆聚旄頭之北宰
制其胡虜天畢之陰蓄洩其雷雨天陵積尸之肅殺
參旗九斿之部伍樵蘇之地出入於園苑萬億之資
填積於倉庾南宮則黃龍賦象朱鳥成形五帝之座
三光之庭傷成於鉞誅成於鑕禍成於井德成於衡
執法者廷尉之曹大臣之象少微者儲君之位處士
之星天弧直而狼顧軍市曉而鷄鳴三川之交鶉火
通其耀七澤之國翼軫寓其精南河北河象闕於是
乎增峻左轄右轄邊荒於是乎自寧乃有金之散氣

水之精液法渭水之橫橋像昆明之刻石歲時占
水旱滄溟應其潮汐織女之室漢家之使可尋飲牛
之津海上之人易覲日也者衆陽之長人君之尊天
鷄曉唱靈鳥晝跋扶桑臨於大海若木照於崑崙太
平太象所以司其出入南至北至所以節其寒溫龍
山銜燭不能議其光景夸父棄策無以方其駿奔月
也者羣陰之紀上天之使異姓之王后妃之事方諸
對而明水浹重暈匝而邊風駛裁盈蚌蛤則虜騎先
侵適鬪麒麟則暗虎潛值五星者木爲重華火爲熒
惑鎮居戊巳斯爲土德太白主西辰星主北俯察人
事仰觀天則比參右肩之黃如奎火星之黑五材所
以致用七政於焉不惑同舍而有四方分天而利中
國赤角犯我城黃角天之爭五星同色天下偃兵趨
前舍爲盈退後舍爲縮盈則侯王不寧縮則軍旅不
復或向而或背或遲而或速金火犯之而甚憂歲鎮
居之而有福觀衆星之部署歷七曜之驅馳定天下
之文所以通其變見天下之曠所以象其宜然後播
之以風雨威之以霜霰或吐霧而蒸雲或擊雷而鞭
電一旬而太平感膚寸而天下遍白日爲之晝昏恒
星爲之不見爾乃重明合璧五緯連珠青氣夜朗黃
雲旦扶握天鏡授河圖若曰賜之以福此明王聖帝
之休符至如惟雲祇氛冬雷夏雪日暈長虹星芒伏

龍陰有餘而地動陽不足而天裂若曰懼之以災此昏主亂君之妖孽昔者顓頊之命重黎司天而司地陶唐之分仲叔宅西而宅東其後宋有子禕鄭有裨竈魏有石氏齊有甘公唐都之推星王朔之候氣周文之視日吳範之占風有以見天地之情狀識陰陽之變通詩云謂天蓋高語曰惟天爲大至高而無上至大而無外四時行焉萬物生焉羣神莫尊於上帝法象莫大於皇天靈心不測神理難詮日何爲兮右轉天何爲兮左旋盤古何神兮立天地巨靈何聖兮造山川螟何細兮師曠清耳而不聞離朱拭目而無見鵬何壯兮搏扶搖而翔九萬運海水而擊三千龜

與蛇兮異其短長之質椿與菌兮殊其小大之年鍾何鳴兮應霜氣劍何伏兮動星躔列子何方兮御風而有待師門何術兮驗火而登仙魯陽麾戈兮轉於西日陶侃折翼兮登於上玄女何寃兮化精衛帝何耻兮爲杜鵑爭疆理者有零陵之石聞絃歌者有蓋山之泉若恠神之不語夫何述於此篇以天乙之武也焦土而爛石以唐堯之德也襄陵而懷山以顏回之賢也貧居於陋巷以孔丘之聖也情希於執鞭馮唐入於郎署也兩君而未識楊雄在於天祿也三代而不遷桓譚思周於圖謀也忽焉不樂張衡術窮於天地也退而歸田我無爲而人自化吾不知其所以

然而然

青苔賦

粵若稽古聖皇重暉月光開博望之苑闢思賢之堂
華館三襲琯軒四下地則經省而書坊人則後車而
先馬相彼草木兮或有足言者吁嗟青苔今可得而
聞也借如靈山偃蹇巨壁崔巍畫千峰而錦照圖萬
壑而霞開王孫逝兮山之隈披薜荔兮踐莓苔悵容
與兮徘徊一去千年兮時不復來至若圓潭寫鏡方
流聚玉苔何水而不清水何苔而不綠漁父遊兮漢
川曲歌滄浪兮濯吾足桂舟橫兮蘭柁觸浦激邈廻
兮心斷續別有崇臺廣厦粉壁椒塗梁木蘭兮椽瑋

藻川集卷三

六

瑁草離合兮樹珊瑚白露下蒼苔蕪暗瑤砌澁瓊舖
有美人兮向隅應閉門兮踟躕心震蕩兮意不愉顏
如玉兮泪如珠請循其本也見商羊兮鼓舞召風伯
兮電赴占顧兔兮離畢星雷闐闐兮雨冥冥皓兮蕩
兮見潢汙之滿庭條兮忽兮視苔蘚之青青爾其爲
狀也羃歷緜密浸淫布濩斑駁兮長廊夤緣兮枯樹
蕭兮若遠山之松栢汎兮若平郊之烟霧春澹蕩兮
景物華承芳卉兮籍落花歲崢嶸兮日云暮迫寒霜
兮犯危露觸類而長其生也蕃莫不文階兮鏤瓦碧
地兮青垣別生分類西京南越則烏韭兮綠錢金苔
兮石髮苔之爲物也賤苔之爲德也深夫其爲讓也

每違燥而居濕其爲謙也常背陽而即陰重尚秘宇
今不以爲顯幽山窮水兮不以爲沉有達人卷舒之
意君子行藏之心唯天地之大德匪予情之所任

卧讀書架賦

儒有傳經在乎致遠力學在乎請益士安號於書淫
元凱稱於傳癖高眠孰可詎貽邊子之嘲甘寢則那
寧耻宰予之責伊國工而嘗巧度山林以爲格旣
有奉於詩書固無違於枕席朴斲初成因夫美名兩
足山立雙鉤月生從繩運斤義且得於方正量納製
鑿術仍取於縱橫功因期於學術業可究於經明不
勞於手無費於目開卷則氣雜香芸挂編則色連翠

竹風清夜淺每待蓬蓬之覺日永春深常偶便便之
腹股因茲而罷刺膺由是而無伏庶思覃於下幃豈
遽留而更讀其利何如其樂只且中遂挂於簾幌履
誰曳於階除每偶草玄之字不親非聖之書比角枕
而嗟若匹瑾琴而病諸爾其臨牕有風閉戶多雪自
得陶潛之興仍秉袁安之節旣幽獨而多閑遂憑茲
而徧閱讀易則期於素隱習禮則防於志悅儻叔夜
之神交固周公之夢絕其始也一木所爲其用也萬
卷可披墨浸之前謂江帆之乍至書林之下若雲翼
之新垂動靜隨於語默出處任於輓推必欲事於所
事實斯焉而取斯因謂之曰爾有卷兮爾有舒爲道

可以集虛爾有方兮爾有直爲行可以立德濟筆海
兮爾爲舟航騁文囿兮爾爲羽翼故吾不知夫不可
聊逍遙以宴息

幽蘭賦

惟幽蘭之芳草稟天地之純精抱青紫之奇色挺龍
虎之嘉名不起林而獨秀必固本而叢生爾乃丰茸
十步綿連九畹莖受露而將低香從風而自遠當此
之時叢蘭正滋美庭幃之孝子循南陔而采之楚襄
王蘭臺之宮零落無叢漢武帝猗蘭之殿荒涼幾變
聞昔日之芳菲恨今人之不見至若桃花水上佩蘭
若而續魂竹箭山陰坐蘭亭而開宴江南則蘭澤爲

芻川集卷一

八

洲東海則蘭陵爲縣隰有蘭兮蘭有枝贈遠別兮交
新知氣如蘭兮長不改心若蘭兮終不移及夫東山
月出西軒日晚授燕女於春闈降陳王於秋坂乃有
送客金谷林塘坐曛鶴琴未罷龍劍將分蘭缸熠燿
蘭麝氛氳舞袖迴雪歌聲遏雲度清夜之未央酌蘭
英以奉君若夫靈均放逐離羣散侶亂馭郢之南都
下瀟湘之北渚步遲遲而適越心鬱鬱而懷楚徒眷
戀於君王歛精神於帝女汀洲兮極目芳菲兮襲予
思公子兮不言結芳蘭兮延佇借如君章有德通神
感靈懸車舊館請老山庭白露下而警鶴秋風高而
亂螢循階除而下望見秋蘭之青青重曰若有人兮

山之阿初秋蘭兮歲月多思握之兮猶未得空珮之
兮欲如何乃拙琴操爲幽蘭之歌歌曰幽蘭生矣于
彼朝陽含雨露之津潤吸日月之休光美人愁思兮
採芙蓉於南浦公子忘憂兮樹萱草於北堂雖處幽
林與窮谷不以無人而不芳趙元淑聞而歎曰昔聞
蘭葉據龍圖復道蘭林引鳳雛鴻歸鷺去紫莖歇露
往霜來綠葉枯悲秋風之一敗與蒿草而爲芻

老人星賦

赫赫宗周皇天降休麗哉神聖皇天降命開網布網
發號施令河山圖兮五雲集天垂象兮三光映南極
之庭老人之星煜煜燦燦煌煌熒熒秋分之旦見乎

異川卷二

九

丙春分之夕入乎丁配神山之呼萬歲符水德之兆
千齡晃如金粟燦若銀燭比秋草之一螢狀荆山之
片玉渾渾熊熊懸紫貝於河宮曄曄睟睟曜明珠於
漢水其光也如丹其大也如李稽元命之攸述按星
經之所紀見則化平主昌明則天下多士經始靈臺
差義崔巍星則唐都講藝氣則王朔呈材晝觀雲物
夜察昭回觀南郊之炳耀欣北極之康哉二公輔弼
庶官文武獻仙壽兮祝堯奏昌言兮拜禹瞻太霄而
踴躍伏前庭而俯僂萬人於是和歌百獸於焉率舞
穆穆神皇受天之祥邈矣台州之北窅然汾水之陽
貞明也者日月同光貞觀也者天地爲常有混成之

獨立運元氣之茫茫若夫大虹流渚金天當宁太雷
繞樞軒轅受圖殷墟則黃星見楚雷煥則紫氣臨吳
青方半月東井連珠辰極之齊七政泰階之平六符
雖前皇之盛德又何以加於此乎至若甘露溢醴泉
出蜃莖生嘉禾實鳳凰丹彩騶虞白質南海無波東
風入律比夫皇穹之錫壽何足以談其萬一聖上猶
復招列仙擇羣賢日慎一日玄之又玄兵戈不起至
德承天臣烟作頌皇家萬年

庭菊賦

弁序

庭菊美貞芳也天子幸於東都皇儲監守於武德之
殿以門下內省爲左春坊今庶子裴公所居即黃門

蒲川集卷一

十

侍郎之廳事也其庭有菊焉中令薛公昔拜瑣闥此
焉遊處今兼左庶子止於東廳薨宇連接洞門相向
每罷朝之後未嘗不遊於斯詠於斯覽叢菊於斯歎
其君子之德命學士爲之賦是日也薛覲以親賢爲
洗馬田巖以幽貞爲學士高元思張師德以至孝託
後車顏強學沈尊行以博聞兼侍讀周琮李憲王祖
英曹叔文以儒術進崔融徐彥伯劉知柔石抱忠以
文章顯德行則許子豐耆舊則權無二駱續則詒訓
之前識張相則莊老之後典並承高命咸窮體物小
子託於吹竽之末敢闕其詞哉遂作賦云

日之貞矣于彼重陽菊之榮兮于彼華坊含天地之

精氣吸日月之淳光雲布霧合箕舒翼張鬱兮蔓衍
郁兮芬芳眠枝金萼翠葉紅芒其在夕也言庭燎之
晷晷其向晨也謂明星之煌煌爾其萬里年華九州
春色花的燦兮如錦草綿連兮似織當此時也和其
光同其塵應春光而早植及夫秋星下照金氣上騰
風蕭肅兮瑟瑟霜刺刺兮稜稜當此時也弱其志強
其骨獨歲寒而晚登雨還風去天長地久純黃象於
后土故尋藥而菊衣輕體御於神仙故登山而菊酒
文賓採之而羽化康公服之而不朽東經於是長在
南陽以之肩壽胡太尉之允誠光輔漢庭萬機理泰
階平及暮年華髮垂肩秋菊落英觸邪滌瘴於焉永

貞鍾太傅之家聲彝倫魏室道合鹽梅功成輔弼降
文皇之命脩彭祖之術保性和神此焉終吉君章請
老歲久懸車秋風生兮北園夕白露濕兮前堦虛佇
閑庭之曠邈對涼菊之扶踈人生行樂孰知其餘淵
明解印退歸田野山鬱律兮萬里天蒼莽兮四下憑
南軒以長嘯坐東籬而盈把歸去來兮何爲者若此
窈窕重闌亘青鎖兮接皇扉深沉大壯通肅成兮連
博望乃有邕鄉貴族薛縣名家共汾河之鼎氣同庶
子之春華朝遊夕處徘徊顧慕歎搖落於三秋偉貞
芳於十步伊纖莖之菲薄荷君子之恩遇不羨池水
之芙蓉願比瑤山之桂樹歲如何其歲已秋叢菊芳

兮庭之幽君子至止悵容與而淹留歲如何其歲將
逝叢菊兮庭之際君子至止聊從容以卒歲

浮漚賦

在霖霖之可翫唯浮漚而已矣况曲澗兮增波復坳
堂兮漲水露滴瀝兮行注階潺湲而浪起寸步百川
咫尺千里於是乍明乍滅時行時止排雨尾而分規
擘波心而對峙輕盈徘徊容與庭槐狀若初蓮出浦
映晴波而未開又似繁星落曙映斜漢而將廻合散
消息安有常則條來忽往不可爲象雨密稠生風牽
亂上若乃空濛來寒浩汗浮天流平舊沼派溢新泉
分容對出吐映均鮮觸流薄而欲散礙浮芥而還連

光凌虛而半動影倒水而分圓始參差而別趣終宛
轉以同滄歷亂踟躕漂沸縈紆細而察之若美人臨
鏡開寶曆大而望也若馮夷剖蚌列明珠逐風波而
澹蕩乃變化而須臾迹均顯晦妙合虛無同至人之
體道亦隨時而不拘夫其得坻則止乘風則逝處上
下而無窮任推移而不繫似君子之從容常卷舒而
不滯故其在陽則隱在陰則出泄泄悠悠匪徐匪疾
固目然以見體託行潦以凝質類達人之修身故不
欺於時空蕩薄畎澮鼓舞洲渚其生兮若浮其居兮
若旅雲銷雨霽寂無處所唯斯物之靡依獨含情而
應機暫假有而示潔終淪空而匿輝苟無心以自累

夫何適而有違

孟蘭盆賦

粵大周如意元年秋七月聖神皇帝御洛城南門會
十方賢衆蓋天子之孝也渾元告秋羲和奏曉太陰
望兮圓魄皎閣闔開兮涼風嫋四海澄兮百川鼎陰
陽肅兮天地宣掃離宮清重閣設黃邱張翠幕鸞飛
鳳翔睽暘條燥雲舒霞布翕赫忽霍陳法供飾聖蘭壯神
功之妙物何造化之多端青蓮吐而非夏頰果搖而
不寒銅鐵銀錫瓊琳琅玕映以甘泉之玉樹冠以承
露之金盤憲章三極儀形萬類上寥廓兮法天下安
貞兮象地殫怪力窮神異少君王子掣曳曳兮若來

齊川集卷

十三

玉友瑤姬翩躑躅兮必至鳴鶴鷓與鸞鸞舞鷓鷯與
翡翠毒龍拏兮赫然狂象奔兮沉醉怖魍魎潛魑魅
離婁明目不足見其精微匠石洗心不足徵其奧祕
續續紛紛氛氲氲五邑成文若榮光休氣發彩於
重雲奮奮粲粲煥爛爛三光壯觀若合璧連珠耿
耀於長漢夫其遠也天台架起繞之以赤霞夫其近
也削成孤峙覆之以蓮花晃兮瑤臺之帝室絕兮金
闕之仙家其高也上諸天於大梵其廣也遍諸法於
沙上可以薦元符於七廟下可以繡琴動於三車
也於是乎騰聲名列部伍前朱雀後玄武左蒼龍
右白虎環衛匝羽林周雷鼓八面龍旂九旄星戈耀

習霜戟含秋三公以位百寮乃入鳴珮鏘鏘高冠八
岌規矩中威容翁無族談無錯立若乃山中禪定樹
下經行菩薩之權現如來之化生莫不汪洋在列歡
喜充庭天人儼而同會龍象寂而無聲聖神皇帝乃
冠通天佩玉璽冕旒垂目統纒塞耳前後正臣左右
直史身爲法度聲爲宮徵穆穆然南面以觀矣八枝
初會四影高懸上妙之座取於燈王之國大悲之飯
出於香積之天隨藍寶味舍衛金錢麪爲山兮酪爲
沼花作雨兮香作烟明因不測大福無邊鏗九韶撞
六律歌千人舞八佾孤竹之管雲和之瑟麒麟在郊
鳳凰蔽日天神下降地祇咸出於是乎上公列卿大

夫學士再拜稽首而言曰聖人之德無以加於孝乎
散元氣運洪爐斷鼈足受龍圖定天寶建皇都至如
立宗廟平圭泉繡栢文楣山案藻稅昭穆叙樽罍設
以觀嚴祖之耿光以揚先皇之大烈孝之始也考辰
耀制明堂廣四修一上圓下方布時令合蒸嘗配天
而祀文考配地而祀高皇孝之中也宣大乘昭羣聖
光祖考登靈慶發深心展誠敬刑於四海加於百姓
孝之終也夫孝始於顯親中於禮神終於法輪武盡
美矣周命惟新聖神皇帝於是乎唯寂唯靜無營無
欲壽命如天德音如玉任賢相惇風俗遠佞人措刑
獄省遊宴披圖籙捐珠璣寶菽粟罷官之無事恤人

又不足鼓天地之化淳作皇王之軌躅太陽夕乘輿
歸下端闈入紫微

楊盈川集卷二

五言古詩

廣溪峽

廣溪三峽首曠望兼川陸山路遶羊腸江城鎮魚腹
喬林百尺偃飛水千尋瀑驚浪迴高天盤渦轉深谷
漢氏昔云季中原爭逐鹿天下有英雄襄陽有龍伏
常山集軍旅永安興版築池臺忽已傾邦家遽淪覆
庸才若劉禪忠佐爲心腹設險猶可存當無賈生哭

巫峽

三峽七百里惟言巫峽長重巖竇不極疊嶂凌蒼蒼
絕壁橫天險莓苔爛錦章入夜分明見無風波浪狂

靈川集卷三

一

忠信吾所蹈泛舟亦何傷可以涉砥柱可以浮吕梁
美人今何在靈芝徒自芳山空夜猿嘯征客淚沾裳

西陵峽

絕壁聳萬仞長波射千里盤薄荆之門滔滔南國紀
楚都昔全盛高丘烜望祀秦兵一旦侵夷陵火潛起
四維不復設關塞良難恃洞庭且忽然孟門終已矣
自古天地闢流爲峽中水行旅相贈言風濤無極已
及余踐斯地瓌奇信爲美江山若有靈千載伸知已

奉和上元醮宴應詔

甲乙遇災年周隨送上弦袂星六丈出沴氣七重懸
赤縣空無主蒼生欲問天龜龍開寶命雲火昭靈慶

萬物覩真人千秋逢聖政祖宗玄澤遠文武休光盛
大號域中平皇威天下驚參辰昭文物宇宙泱聲明
漢后三章令周王五代兵匈奴窮地角本自遠正朔
驕子起天街由來虧禮樂一衣掃風雨再戰夷屯剝
清明日月且蕭索烟雲渙寒暑旣平分陰陽復貞觀
惟神諸妙物乃聖符幽贊下武發禎祥平階屬會昌
金泥封日觀碧水匠明堂業盛助華德輿包天地皇
孝思義罔極易禮光前式天渙三辰輝靈書五雲色
敬時發窮歛卜代盈千億五緯聚華軒重光入望圓
公卿論至道天子拜昌言雷解初開出星空即便元
瑤臺涼景薦銀闕秋陰徧百戲騁魚龍千門壯宮殿
深仁洽蠻徼愷樂周寰縣宣室召羣臣明庭禮百神
仰德還符日霑恩更似春襄城非牧豎楚國有巴人

五言律詩

從軍行

烽火照西京心中自不平牙璋辭鳳闕鐵騎遶龍城
雪暗凋旗畫風多雜鼓聲寧爲百夫長勝作一書生

劉生

卿家本六郡年長入三秦白壁酬知己黃金謝主人
劍鋒生赤電馬足起紅塵日暮歌鐘發喧動四隣

送臨津房少府

岐路三秋別江津萬里長烟霞駐征蓋絃奏促飛觴

階樹含斜日池風泛早涼贈言未終竟流涕忽霑裳
送豐城王少府

愁結亂如麻長天照落霞離亭隱喬樹溝水浸平沙
左尉才何屈東關望漸賒行看轉牛斗持此報張華
送鄭州周司功

漢國臨清渭京城枕蜀河居人下珠淚賓御促驪歌
望極關山遠秋深烟霧多唯餘三五夕明月暫經過

驄馬

驄馬鐵連錢長安俠少年帝畿平若水宮路直如弦
夜玉粧車軸秋金鑄馬鞭風霜但自保窮達任皇天
出塞

塞外欲紛紜雌雄猶未分明堂占氣色華蓋辨星文
二月河魁將三千太乙軍丈夫皆有志會是立功勲
有所思

賤妾留南楚征夫向北燕三秋方一日少別比千年
不掩頰紅纓無論數綠錢相思明月夜迢遞白雲天
梅花落

窓外一株梅寒花五出開影隨朝日遠香逐便風來
泣對銅鈎障愁看玉鏡臺行人斷消息春恨幾徘徊
折楊柳

邊地迷無極征人去不還秋容凋翠羽別淚損紅顏
空斷流星驛心馳明月關索碣何處在楊柳自堪攀

紫騮馬

俠客重周游金鞭控紫騮蛇弓白羽箭鶴轡赤茸鞦
發跡來南海長鳴向北州匈奴今未滅畫地取封侯

戰城南

塞北途遼遠城南戰苦辛幢旗如鳥翼甲冑似魚鱗
凍水寒傷馬悲風愁殺人寸心明白日千里暗黃塵

送梓州周司功

御溝一相送征馬屢盤桓言笑方無日離憂獨未寬
舉盃聊勸酒破涕暫爲歡別後風清夜思君蜀路難

送楊處士反初卜居曲江

鴈門歸去遠垂老脫袈裟蕭寺休爲相曹溪便寄家

綠琪千歲樹黃槿四時花別怨應無限門前桂水斜

五言排律

送劉校書從軍

天將下三宮星門召五戎坐謀資廟略飛檄佇文雄
赤土流星劍烏號明月弓秋陰生蜀道殺氣繞湟中
風雨何年別琴樽此日同離亭不可望溝水自西東

遊廢觀

青嶂倚丹田荒原數百年猶知小山桂尚識大羅天
藥敗金爐火苔昏玉女泉歲時無壁畫朝夕有階烟
花柳三春節江山四望懸悠然出塵網從此學神龜

和石侍御山莊

煙霞非俗累巖壑只幽居水浸何曾畝荒郊不復鋤
影濃山樹密香淺澤花踈闊塹防斜徑平堤夾小渠
蓮房若箇實竹節幾竿虛蕭然隔城市酌醴夢枯魚

和崔司空傷姬

昔時南浦別鶴怨寶琴絃今日東方至鸞銷珠鏡前
水流衝砌咽月影向牕懸粉匣棲餘淚薰爐滅舊烟
晚庭摧玉樹寒帳委金蓮佳人不再得白日幾千年

和蹇右丞省中暮望

故事閑臺閣仙門藹已深舊章窺複道雲幌肅重陰
玄律葭灰變青陽斗柄臨年光搖樹色春氣繞蘭心
風響高窓度流痕曲岸侵天明摠樞轄人鏡辨衣簪
日暮南宮靜瑤華振雅音

嘉州集卷三

五

和劉侍郎入隆唐觀

福地陰陽合仙都日月開山川凌四險城樹隱三臺
伏檻排雲出飛軒遶澗回參差凌倒影瀟灑軼浮埃
百果珠爲寶羣峰錦作苔懸蘿暗疑霧瀑布響成雷
方士燒丹液真人泛玉杯還如問桃水更似得蓬萊
漢帝求仙日相如作賦才自然金石奏何必上天台
和輔先入昊天觀

遁甲爰皇里占星太乙宮天門開奕奕佳氣鬱葱葱
碧落三乾外黃圖四海中邑居環弱水城闕抵新豐
玉檻崐崙側金樞地軸東上真朝北斗元始詠南風

漢君祠五帝淮王禮八公道書藏竹簡靈液灌梧桐
草茂瓊塔綠花繁寶樹紅石樓紛似畫地鏡森如空
系海年應積桃源路不窮黃軒若有問三月住崆峒

和酬號州李司法

唇齒標形勝關河壯邑居寒山抵方伯秋水向鴻臚
君子從遊宦忘情任卷舒風霜下刀筆軒蓋擁門閭
平野雲黃變長州鴻鴈初菊花宜泛酒蒲葉好裁書
昔我芝蘭契攸然雲雨踈非君重千里誰肯惠雙魚
和旻上人傷果禪師

淨業初中日浮生大小年無人本無我非後亦非前
簫鼓旁喧地龍蛇真應天法門摧棟宇覺海破舟船
書鎮秦王餉經文宋國傳聲華周百億風烈被三千
蕪沒青園寺荒涼紫陌田德音殊未遠拱木已生煙

和鄭校讐內省眺矚思鄉懷友

銅門初下辟石館始沉研遊霧千金字飛雲五色牋
樓臺橫紫極城闕俯青田暄入瑤房裏春迴玉宇前
霞文埋落照風物澹歸煙翰墨三餘隙關山四望懸
頽風睽酌羽流水曠鳴絃雖欣承白雪終恨隔青天
和劉長史答十九兄

帝堯平百姓高祖宅三秦子第分河岳衣冠動縉紳
盛名恒不墮歷代幾相因街巷塗山曲門閭洛水濱
五龍金作友一子玉爲人寶劍豐城氣明珠魏國珍

風標自落落文質且彬彬共計陶元亮同推周伯仁
石城俯天闕鍾阜對江津驥足方遐騁狼心獨未馴
鼓鼙鳴九域烽火集重圍城勢餘三版兵威乏四鄰
居然混玉石直置保松筠耿介酬天子危言數賊臣
鍾期琴未奏蘇武節猶新受祿寧辭死揚名不顧身
精誠動天地忠義感明神怪鳥俄垂翼修蛇竟暴鱗
來朝拜休命速職下梁岷善政馳金馬嘉聲繞玉輪
三荆忽有贈四海更相親宮徵諧鳴石光輝掩燭輪
山川遙蒲目零露坐沾巾友愛光天下恩波浹後塵
懦夫仰高節下里繼陽春

送李庶子致仕還洛

蘇州集卷三

七

此地傾城日由來供帳華亭逢李廣騎門接邵平瓜
原野烟氛匝關河遊望賒白雲斷巖岫綠草覆江沙
詔賜扶陽宅人榮御史車灞池一相送流涕向烟霞

早行

敞朗東方徹闌干北斗斜地氣俄成霧天雲漸作霞
河流纔辨馬巖路不容車阡陌經三歲閭閻對五家
露文沾細草風影轉高花日月從來惜關山猶自賒

途中

悠悠辭鼎邑去去指金墉途路盈千里山川亘百重
風行常有隊雲出本多峰鬱鬱園中柳亭亭山上松
客心殊不樂鄉淚獨無從

五言絕句

夜送趙縱

趙氏連城壁由來天下傳送君還舊府明月滿前川

附姙姪女臨鏡曉粧

林鳥驚眠罷房櫳曙色開鳳釵金作縷鸞鏡玉爲臺
粧似臨池出人疑向月來自憐方未已欲去復徘徊

楊盈川集卷三

序

王勃集序

大矣哉文之時義也有天文焉察時以觀其變有人文焉立言以重其範歷年茲久遞爲文質應運以發其明因人以通其粹仲尼旣没游夏光洙泗之風屈平自沉唐宋弘汨羅之跡文儒於焉異術詞賦所以殊源逮秦氏燔書斯文天喪漢皇改運此道不還賈馬蔚興已虧於雅頌曹王傑起更失於風騷僂俛大猷未忝前載洎乎潘陸奮發孫許相因繼之以顏謝申之以江鮑梁魏羣材周隋衆制或苟求蟲篆未盡

新集卷三

一

力於丘墳或獨徇波瀾不尋源於禮樂會時沿革循古抑揚多守律以自全罕非常而制物其有飛馳條忽倜儻紛綸鼓動包四海之名變化成一家之體蹈前賢之未識探先聖之不言經籍爲心得王何於逸契風雲入思叶張左於神交故能使六合殊材並推心於意匠八方好事咸受氣於文樞出軌躅而驥首馳光芒而動俗非君之博物孰能致於此乎君諱勃字子安太原祁人也其先出自有周濬哲文明之裔隱乎炎漢弘宣高尚之風晉室南遷家聲布於淮海宋臣北徙門德勝於河汾宏材繼出達人間時祖父通隋秀才高第蜀郡司戶書佐蜀王侍讀大業末遷

講藝於龍門其卒也門人謚之曰文中子聞風睹輿起予道惟揣摩三古開闢八風始擯落於鄒韓終激揚於荀孟父福時歷任太常博士雍州司功交趾六合二縣令爲齊州長史抑惟邦彥是曰人宗絕六藝以成能兼百行而爲德司馬談之晚歲思弘授史之功楊子雲之暮年遂起叅玄之歎君之生也含章是託神何由降星辰奇偉之精明何由出家國賢才之運性非外獎智乃自然孝本乎未名人應乎初識器業之敏先乎就傳九歲讀顏氏漢書撰指瑕十卷十歲包綜六經成乎暮月懸然天得自符音訓時師百年之學旬日兼之昔人千載之機立談可見居難則

易在塞咸通於術無所滯於詞無所假幼有鈞衡之畧獨負舟航之用年十有四時譽斯歸太常伯劉公巡行風俗見而異之曰此神童也因加表薦對策高第拜爲朝散郎沛王之初建國也博選奇士徵爲侍讀奉教撰平臺鈔畧十篇書就賜帛五十疋先鳴楚館孤峙齊宮乘忌側目應劉失步臨秀不容尋反初服遠遊江漢登降岷峨觀精氣之會昌翫靈奇之盼蟹考文章之跡徵造化之程神機若助日新其業西南洪筆咸出其詞每有一文海內驚瞻所製九隴縣孔子廟堂碑文宏偉絕人稀代爲寶正平之作不能奪也咸亨之初乃叅時選二府交辟遇疾辭焉友人

陵季友時爲虢州司法盛稱弘農藥物迺求補虢州
叅軍坐免歲餘尋復舊職棄官沉跡就養于交阯焉
長卿坐廢於時君山不合於朝豈無媒也其惟命乎
富貴比於浮雲光陰踰於尺璧著撰之志自此居多
觀覽舊章翱翔羣藝隨方滲漉于何不盡在乎詞翰
倍所用心嘗以龍朔初載文場變體爭構纖微競爲
雕刻糝之金玉龍鳳亂之朱紫青黃影帶以徇其功
儼對以稱其美骨氣都盡剛健不聞思革其弊用光
志業薛令公朝右文宗託末契而推一變盧照隣人
間才傑覽青規而輟九攻知音與之矣知己從之矣
於是鼓舞其心發洩其用八絃馳騁於思緒萬代出
沒於豪端勢將往而必融防未來而先制動搖文律
宮商有奔命之勞沃蕩詞源河海無息肩之地以茲
偉鑿取其雄伯壯而不虛剛而能潤雕而不碎按而
彌堅大則用之以時小則施之有序徒縱橫以取勢
非鼓怒以爲資長風一振衆萌自偃遂使繁縟淺術
無藩籬之固紛繪小才失金湯之險積年綺碎一朝
清廓翰苑豁如詞林增峻反諸宏博君之力焉矯枉
過正文之權也後進之士翕然景慕久倦樊籠咸思
自擇近則面受而心服遠則言發而響應教之者逾
於激電傳之者速於置郵得其片言而忽焉高視儼
其一氣則邈矣孤騫竊形骸者旣昭發於樞機吸精

徵者亦潛附於聲律雖雅才之變例誠壯思之雄宗也妙異之徒別爲縱誕專求恠說爭發大言乾坤日月張其文山河鬼神走其思長句以增其滯容氣以廣其靈已逾江南之風漸成河朔之制謬稱相述罕識其源扣純粹之精機未投足而先逝覽奔放之偏節已滯心而忘返迺相循於跼步豈見習於通方信譎不同非墨翟之過重增其放豈莊周之失唱高罕屬既知之矣以文罪我其可得乎君以爲摛藻彫章研幾之餘事知來藏往探賾之所宗隨時以發其惟應便稽古以成其殆察微循紫宮於北門幽求聖律訪玄扈於東洛響像天人每覽韋編思弘大易周流

窮乎八索變動該乎四營爲之發揮以成注解嘗因夜夢有稱孔夫子而謂之曰易有太極子其勉之寤而循環思過半矣於是窮著祭以像告考爻彖以情言既乘理而得玄亦研精而徇道虞仲翔之盡思徒見三爻韓康伯之成功僅踰兩繫君所注見光前古與夫發天地之秘藏知鬼神之情狀者合其心矣君又以幽贊神明非杼軸於人事經營訓導迺優游於聖作於是編次論語各以羣分窮源造極爲之詁訓仰貫一以知歸希體二而致遠爲言式序大義昭然文中子之居龍門也睹隋室之將散知吾道之未行循歎鳳之遠圖宗獲麟之遺制裁成大典以贊孔門

討論漢魏迄於晉代刪其詔命爲百篇以續書甄正樂府取其雅奧爲三百篇以續詩又自晉太熙元年至隋開皇九年平陳之歲褒貶行事述元經以法春秋門人薛收竊慕同爲元經之傳未就而歿君思崇祖德光宣與義續薛氏之遺傳制詩書之衆序危舉藝文克融前烈陳群稟太丘之訓時不逮焉孔伋傳司寇之文彼何功矣詩書之序並冠於篇元經之傳未終其業命不與我有涯先謝春秋二十八年唐上元三年秋八月不改其樂顏氏斯俎養空而浮賈生終逝嗚呼天道何哉所注周易窮乎晉卦又注黃帝八十一難幸就其功撰合論十篇見行於代君平生

屬文歲時不倦綴其存者纔數百篇嗟乎促齡材氣未盡歿而不朽君子貴焉兄勔及劇磊落詞韻鏗鏘風骨皆九變之雄律也第助及勛摠括前藻網羅群思亦一時之健筆焉友愛之至人倫所及永言存歿何痛如之援翰紀文咸所未忍蓋以投分相期非弘詞說澹然掣涕究而序之分爲二十卷具諸篇目三節盛作恨不序於生前七志良書空撰得於身後神其不遠道或存焉

宴族人楊八宅序

僕聞八音繁會合其德者宮商萬壑沸騰殊其流者涇渭方以類聚物以羣分出言斯應則四海之內可

以爲兄弟吾道不行則同舟之人可以成胡越夫俗
徒擾擾天下喧喧風雲竭而交道衰勢利行而小人
長固知深期罕遇所以縱傾蓋之談高契難并所以
泣相知之晚道之存也獨在茲乎楊八官金木精靈
山河粹氣一門九龍之紱冕四代五公之緒秩天資
學業口談夫子之文日用溫良身佩先王之德獨遊
山木高步烟霞諸侯聞之而願交三公禮之而爭辟
暫同流俗薄遊朝市人倫賞鑑同推郭泰之名好事
相趨畢詣揚雄之宅爾其年光六合草色三春膏雨
零於山原和風滿於城闕遙遙別館花開玉樹之宮
望望八川苔發瓊溪之水當此時也披雲霧傲松喬
坐忘樽酒之間戰勝形骸之外雕蟲壯思則符彩驚
人非馬高談則鏗鏘滿聽疊疊然信天下之奇賞陶
陶然誠域中之樂事若使陳雷可作攝齊於廊廡之
間管鮑再生擁篲於高門之外蓋因文會共記良遊
人賦一言同裁四韻

送東海孫尉詩序

東川孫尉文章動俗符彩射人官裁下士宣大夫之
三德運偶上皇作東南之一尉庸才擾擾流俗喧喧
談遠近爲等差叙中外爲優劣殊不知三元合朔九
州同軌蓬瀛可訪還疑上苑之中日月不占更似靈
臺之下彼其之子未爲後時凡我友朋無勞疑別徒

以士之相見人之相知必欲軒蓋逢迎朝遊夕處亦常烟波阻絕風流雨散去矣孫侯遠離隔矣但當晨看旅鴈君逢繫帛之書夕望牽牛余候乘槎之客未能免俗何莫賦詩綴集衆篇列之如左

登秘書省閣詩序

若夫麒麟鳳凰之署三臺四部之經周王羣玉之山漢帝蓬萊之室觀星文而考南北大象入於璣衡披帝冊而質龍神負圖出於河洛司先王之載籍掌制書之典謨劉向沉研楊雄寂寞之士於茲翰墨馬融該博傳毅文章之才此焉遊處莫不出言斯善有道則尊黼黻其德行珪璋其事業心同匪石達人千載

之交乎極靈珠文士一都之會陶泓寡務紬素多閑命蘭芷之君子坐芸香之秘閣徒觀其重欄四絕閣道三休紅梁紫柱金鋪玉鳴平看日月唐都之物候可知坐望山川裴秀之輿圖在卽虹蜺爲之回帶寒暑由其隔闔豈直崑崙十二瀛海千尋西州有百尺之樓東國有千秋之觀于時五行金王八月秋分風生閭闔之門日在中衡之道烟雲悽慘白露下而四郊空林野蒼茫青天高而九州迴登山臨水無非宋玉之詞高閣連雲有似安仁之典列芳饌命雕觴扼腕抵掌劇談戲笑假使神仙可得自茂松喬富貴在天終輕許史間之以博奕申之以詠歌陶陶然樂在

其中矣登高而賦群公陳力於大夫聞善若驚下走
自強於玄晏輕爲序引綴在辭章

崇文館宴集詩序

天下之器也神立貳者所以經其化聖人之寶也大
建儲者所以贊其庸易所謂照於四方禮所謂貞於
萬國皇家以中樞北極清都有天子之宮儲后以大
火前星蒼震有乾男之位因心也孝常問安於寢門
行已也恭每不絕於馳道有父子君臣之道焉有夏
于冬羽之事焉於是發德音降明詔封紫泥於璽禁
傳墨令於銀書齒于成均所以明其長幼通於博望
所以昭其賓客東方曼倩之文史即預襟袖角里先

生之羽翼仍叅獻壽爲賓者四友等黃龍之簡才論
奏者八人同赤烏之下士莫不縉紳舊德縫掖名儒
衣簪拜高闕之門驂駕陪直城之路琢磨其道玉質
而金相黼黻其辭雲蒸而電激琴書暇景風月名辰
周旋揖讓觀禮儀之溢目合異離堅聞辯論之盈耳
方饌寒溫取適於四時一獻雕觴賓主交懽於
百拜爾其清垣繚繞丹禁逶迤魚鑰則環鎖晨開雀
牕則銅樓巨闕周盧綺合解署星分左輔右弼之官
此焉攸集先馬後車之任於是乎在顧循庸菲濫沐
恩榮屬多士之後塵預群公之末坐聽笙竽於北里
退思齊國之音觀瓌寶於東山自耻燕臺之石千年

有屬咸蹈舞於時康四坐勿諠請謳歌於帝力小子
狂簡題其序云

李舍人山亭詩序

永嘉有高陽公山亭者今爲李舍人別墅也廊宇重
複樓臺左右煙霞棲梁棟之間竹樹在汀洲之外龜
山對出背東武而飛來鶴阜相臨向東吳而不進青
溪數曲赤巖千丈寥廓兮惚恍似蓬嶺之難行深邃
兮眇然若桃源之失路信可謂赤縣幽棲黃圖勝景
從來八子闢高陽之邑居今日四郊逢舍人之置驛
故知樊家失業遂作庾公之園習氏不游終成濮陰
之地其人也凝脂點漆瓊瑗樹瑤林學富文史言成準
的葭葦爲漢帝之親枝葉是周公之裔田孟嘗之待
客照飯無疑孔文舉之邀樽樽中自溢三冬事隙五
日歸休奏金石而滿堂召琳琅而觸目心焉而醉德
焉而飽大隱朝市本無車馬之喧不出戶庭坐得雲
霄之致於是乎百年無幾萬事徒勞唯談笑可以遣
平生唯文詞可以陳心賞既因良會咸請賦詩雖向
之所歡已爲陳迹俾千載之下感於斯文

送徐錄事詩序

徐學士風流舊容貌堂堂汝南則顏子更生洛下
則神人重出書有萬覽之者實符於鄭玄州有九游
之者頗類於班固懷岐嶠之舊迹想江漢之遺風粵

在於永淳元年孟夏四月始以內率府錄事出攝蒼
浮縣主簿同彼漆園之莊周聊居賤職異乎安定之
梁竦不殫勞人駢馳而欲行紛紜而戒道是日也鶴
鳴于野龍昇於天詩成流火之文易占清風之卦聖
主以叶時同律義在於省方皇儲以守器承祧任隆
於監國留臺務靜博望時閑於是久敬之善交平生
之故友臨御溝而帳飲就離亭而出宿居成別易坐
覺悲來平原二客追子高而已遠河上諸公餞林宗
而有慕兩鄉風月萬里江山脩路爲下泣之思長天
非寄愁之所何以處我戒之必軾何以贈行上路不
拜孫子荆傾國之送豈若是乎潘安仁金谷之篇盡
於斯矣

送并州旻上人詩序

三元日月不能改弦望之期四序炎涼不能移變通
之運况乎人生天地嶽鎮東西良時美景始雲蒸而
電激臨水登山忽風流而雨散道之常也復何言哉
旻上人天骨多竒神情獨王法門梁棟豈非龍象之
雄晉國英靈即是河汾之寶道尊德貴所以名稱並
聞盡性窮神所以身心不動徧觀天下誓游城闕劉
真長之遠致雅契高風習鑿齒之宏才深期上德芝
蘭一面暫悅新知垂棘連城將游舊府鷄山法衆餞
行於素漣之濱麟閣良朋祖送於青門之外是日也

河山雨氣原野秋陰風烟淒而禁籞寒草木落而城
隍晚雲中振錫有如鴻鵠之飛水上乘杯更似神仙
之列左右爲之魂動金石由其色變恒山岱岳看實
鼎於風雲帝里神州對長安於白日兩鄉綿邈何當
惠遠之遊千里相思空有關山之望群賢僉議咸可
賦詩題其爵里緇之簡牘

晦日藥園詩序

天下皆知禮之爲貴用周旋揖讓之儀天下皆知樂
之爲盛節金石絲簧之變是則忠信之薄餘容貌於
矜莊風俗之微陶性靈於歌舞殊不知達人君子遺
形骸於得喪之機心照神交混榮辱於是非之境非

若諸公者大夫之相知也以爲烟霞可賞歲月難留
遂欲極千載之交歡窮百年之樂事莫不如珪如璋
令聞令望濟濟鏘鏘同會於文場者也于時丁丑之
年孟春之晦歲陰入於星紀斗柄臨於析木衣冠雜
沓出城闕而盤游車馬駢闐俯河濱而帳飲乃有神
州福地上藥中園左太冲所云當衢向術潘安仁以
爲西郊後市九莖仙草搖八卦之祥風四照靈葩沓
三危之寶露豈直帝神農旋赤鞭而驅毒崔文子擁
朱幡以救人山圖採之而得道姮娥竊之而奔月若
斯而已哉加以回溪漱石茂林脩竹澹風日之逶迤
妙山泉之體勢然後芳杜若籍芝蘭高論叅玄飛觴

舉白凡我良友同聲相應心冥寵辱推富貴於皇天
事一窮通任運隨於大命若使適情知足則玉帛子
女爲伐性之源達變通機則尊官厚祿非保全之地
所以列坐羲皇之代安歌帝堯之力陽光稍晚高興
未闌請諸文會之游共紀當年之事凡厥衆作列之
於後

群官尋楊隱居詩序

若夫太華千仞長河萬里則吾土之山澤壯於域中
西漢十輪東京四代則吾宗之人物盛於天下乃有
渾金璞玉鳳戢龍蟠方圓作其輿蓋日月爲其肩牖
天光下燭懸少微之一星地氣上騰發大雲之五色

以不貪爲寶均珠玉以咳唾以無事爲貴比旂常於
糞土諸侯不敢以交游相得三府不敢以辟命相期
與夫形在江海心游魏闕迹混朝市名爲大隱可得
同年而語哉天子巡於下都望於中嶽軒皇駐蹕將
尋大塊之居堯帝省方終全潁陽之節群賢以公私
有暇休沐多閑忽乎將行指林壑而非遠莞爾而笑
覽烟霞而在矚登塊北踐莓苔阮籍之見蘇門止聞
鸞嘯盧敖之逢高士詎識爲肩憶桑海而無時問桃
源之易失寒山四絕烟霧蒼蒼古樹千年藤蘿漠漠
誅茅作室挂席爲門石隱磷而環階水潑浚而匝砌
乃相與旁求勝境適窺靈跡論其八洞實雅明月之

宮相其五山即是交風之地仙臺可望石室猶存極
人生之勝踐得林野之竒趣杯浮若聖已茂松喬清
論凝神坐驚河漢游仙可致無勞郭璞之言招隱成
文敢嗣劉安之作

宴皇甫兵曹宅詩序

皇甫君冠冕於安定李校書羽儀於隴西岑正字明
目於漢南石宮坊抵掌於河朔高侯邦之司直下走
齊之濫吹若夫風雲龍虎水火陰陽隔千里而應之
莫不潛契於同聲矣聖明千載區宇一家掩八弦以
得之莫不高會於中京矣是日也河圖適至海鯨初
死五嶽四瀆漢皇帝崇其望祀一日三朝周天子展

其莊敬君臣慶色朝野歡心玄晏先生開甲第而留
賓二三君子赴龍門而廣讌陰雲已墨肅氣彌高霜
寒萬里之園米納千金之水面郊後市即爲潘岳之
居累代通家咸言李膺之客百年何計相知在於我
心四海何求爲樂止於名教抽毫進牘皆請賦詩日
暮途遠聊裁序引

楊盈川集卷四

碑

大唐益州大都督府新都縣學先聖廟堂碑

文并序

叙曰銀衡用九天門壓西北之荒銅蓋虛三地戶拆東南之野迨七星於上列太清不能潛混茫之機環四海於中州巨塊不能秘生成之業聖人有以見天下之蹟擬諸形容聖人有以見天下之動行其典禮靈圖廣運百姓日用而不知神理潛行萬方樂推而不厭古者熊山南眺金崇橫上帝之居鳳穴西臨玉室考爰皇之宅五龍乘正按天識以希微六羽提衡

冊集卷四

一

驗星謠而汗漫泊乎尊盧赫胥之代驪連栗陸之君皇圖始於中葉莫不憑三靈之寶位鼓舞陰陽籍六合之尊名財成宇宙未有貴而無位博而無名大禮由其再造大樂出其一變蕩蕩乎人無得而稱焉巍巍乎其有成功者也若夫司徒立勳於天地還承帝嚳之家微子開國於商周仍纂成湯之業雖玄禽歷數推移於景毫之都而白馬旗裳赫奕於風丘之國由是千年有屬萬物知歸乾坤合而至德生日月會而明靈降奎妻胃昴風駘白虎之精角亢房心雲鬱青龍之祉君王異表儀石紐而法丹陵輔相宏資狀臯陶而圖子產豈上鑿執玄象摘光芒於北斗之宮

括成地形騰瑞氣於東山之曲非天下之至精其孰能與於此神冥造化德合陶鈞獲冲用於生知運幽機於性道窮庶事之終始協庶品之自然觀者不識其靈仰者不知其德步三光於太極照曜三門含萬象於中區聲明萬國惟深也能通天下之志惟幾也能成天下之務非天下之至神其孰能與於此道尊德貴挫銳同塵始於中都宰終於大司寇能使長幼異節男女別途路無遺亡器不雕僞奸雄獨立初明兩觀之誅正教未行仍赦同徃之罪盟齊侯而歸四邑夷不亂華黜季氏而覆三都家無藏甲非天下之至剛其孰能與於此青光欺滅赤籙衰微一注爲海

岱之尊一戰有河防之霸故得三王不相襲禮亡於寇戎五帝不相沿樂入於河海是以衰生靈之版蕩痛寓縣之分崩歷聘諸侯栖遑異國其爲大也法象莫之能容其爲高也黎元莫之能覩時非我與遂厄宋而圍陳道不吾行終樂天而知命非天下之至柔其孰能與於此太山不辭土壤故能成其高滄海不讓細流故能成其大自季孫之賜我也交益親矣自敬叔之乘我也道彌尊矣於是歷郊社之所考明堂之則金人右對仍觀太祖之階斧扆前臨還訪周公之位然後刪詩書而續易象動天地而感鬼神運百代之舟車開千齡之戶牖是故雷精日角開道德而

握衣月頰山庭奉琴書而撰杖非天下之至文其孰能與於此智以藏往有感而必通神以知來無微而不照論五行於帝輔潛觀大皞之先揆七廟於天災預察釐王之過星流十月徵曆象於衰周日汎三江採謳謠於霸楚神無方而易無體聖人通變化之津河出圖而洛出書聖人悟興亡之兆非天下之至明其孰能與於此極天蟠地之禮周旋揖讓之規百神於是會昌二儀以之同節非禮無以別父子兄弟親疎之序非禮無以辨君臣上下長幼之位本之於元氣徵之於太古定足以法於九圍道足以周於八極服先王之制度黜紅紫而無施歛上帝之明威感風雷而有變非天下之至恭其孰能與於此五行四氣十二月還相爲本五聲六律十二管還相爲宮至音將簡易同和廣樂與神明合契盛於中國還陳武像之容奄有四方自得文王之操南風奏雅知大舜之溫北里宣淫體殷辛之暴非天下之至和其孰能與於此悲夫日中則昃動靜之常也月滿則虧虛盈之數也自太平王佐委龍翰於芳年禮義霸臣摧獸文於華月則知天之將喪也則知道之將廢也雖頽山壞木兆悲歌於兩楹夏棟周墻陳盛則於用禮猶使文明炤爛百王知察變之機鍾石鏗鏘萬代挹希聲之樂信可謂備物致用立成器以爲天下利者莫大

於聖人也既而三河失統九州之寶幣不歸四塞拱
衛萬里之長城繼作星秩日侵乾象暗而恆文垂禮
壞樂崩彝倫斁而舊章缺洎夫碭山休氣潛膺赤帝
之圖沛國真人密召黃星之錄尊褒成之厚級殷崇
聖之榮班學校於是大興文武由其不墜年當晉宋
運柅周隋太山覆而崑崙倒天柱傾而地維絕三重
赤暈還開爭戰之端千里黃埃荐有干戈之務亂罹
瘼矣黔首何依王室蠢然蒼生無主閭閻匝地今來
爲講武之場荆棘叅天昔日作談經之市皇家撥亂
返正應天順人鼓之以雷霆潤之以風雨馳攬捨而
掃穢上廓鵬雲決河海以澄奸下清鼇極今天子握

大象運洪鑑星重輝海重潤乾廻北列垂衣裳於太
紫之垣日出東方備法駕於中黃之道混沌之無天
無地盡入提封伯陽之有物有象咸乘禮節太階三
襲明瑞氣於朱符中極四遊法祥光於玉燭東膠西
序雲閣蓬丘國號陶唐家成鄒魯遂使西山童子陳
歌謠於壁水之前南國老人受几杖於環林之下乾
坤之大德行矣皇王之盛節明矣江荊鄙黍晨昏薦
帝之祥鳳穴麟洲畧刻因天之瑞乘輿乃選吉日協
龜辰詔風伯以行觀促雷師而出豫房爲天駟仍施

更斗爲帝車即動招搖之柄奠玉帛奏金絲

擁神休而尊明統莫之與京按玉冊

而考銀繩於斯爲盛於是迴輿轉旆臨曲阜之郊畿
駐蹕停鑾訪雲壇之軌跡若使九原可作大君得廊
廟之才千載有知夫子記風雲之會即以乾卦元年
追贈太師禮也咸亨元年又詔宣尼有縱自天體膺
上哲合兩儀之簡易爲億載之師表顧惟寢廟義在
欽崇諸州縣廟堂及學館有破壞并先來未造者遂
使生徒無肄業之所先師闕尊祭之儀久致飄露深
非敬本宜令州縣速加營葺新都學廟堂者奉詔之
所立也因三農之暇陳復道之規考幃帳於西京訪
埃塵於東魯梅梁桂柱深沉風雨之津鏤檻文軒曠
望江山之表納流雲於上棟白日非遙披濁霧於中

階青天在矚雕鏤暉暉窮妙飾於重欄山海高深盡
靈之門生倂倂如培文杏之壇胄子鏘鏘若
預崇蘭之室每至南方二月草樹華滋北陸三秋風
烟搖落莫不列蘋蘩於上席行禮敬於質明奠椒桂
於中罇敬神明於如在爾其邑居重複原野平蕪出
江干之萬里入參星之七度龜城藹藹煥繁霞於百
尺之樓皎浦澄澄洗明月於千秋之水文翁舊學日
往年歸劉禪平堂烟荒霧慘武侯龍伏猶觀八陣之
圖壯士虵崩仍辨五丁之石左巴右獠之勝域陸海
三江之奧壤大都督周王天皇第八子也玄元繼天
而作降仙才於玉斗之庭武昭應運而生開霸業於

金城之域五潢高睽流滋液於咸池十日旁羅散
華於若木星懸帝子遙澄井絡之郊岳列天孫遠控
彭門之野姬公以明德之重行寶化於周南曹植以
懿親之賢發金聲於魯北通議大夫行長史南陽來
恒隋十二衛大將軍榮國公之元子申侯太岳鎮其
靈襟傳說長河昭其神彩麗士元蕃西中之逸羽始
踐題輿管公明紆東道之雄姿初臨別乘朝議大夫
守司馬宇文紀左衛將軍靈州都督之次子台門閔
族傳呼榮戟之榮玉質金相海若河宗之寶庾水清
識得嚴令而非常桓温貴遊無君公而不樂縣令鄭
玄嘉榮陽人也東周玉裔北海金宗列矛戟之森森

吐風流而舊舊尺兵不用瑕丘有上德之君枹鼓希
聞洛陽有神明之宰丞京兆韋德工主簿扶風馬仁
礪尉清河張嗣明北地傅懷愛等荆藍灼爍鄧祀扶
踈許玄度入風月之清關郭林宗獲神仙之妙境南
昌晦跡共梅福而齊衡左部韜真與喬玄而等列博
士張玄鑒助教費仁敬等碧鷄雄辯則滄海沸騰白
鳳宏辭則烟霞噴薄一州聞道親居典學之官四子
乘風來聽中和之曲圓冠列侍執巾寫於西階大帶
諸生受詩書於北面泮宮之上更聞通德之門小學
之前復見華陰之市鄉望等魚文驥子震耀於平原
漢女巴姬駢羅於甲第杜陵亭長終成輔相之才桐

鄉嗇夫且著廉平之號莫不公私務殫即聽絃歌陰
雨時閑仍觀俎豆遺遙城郭拜夫子之靈祠粵燕風
塵見夫子之遺像機衡莫測下問書生遠近未知來
求小子當仁不讓思齊於上古之名遊聖難言有愧
於中郎之石其銘曰

太虛寥廓洪鑪噴薄上綴三宮旁清八絡玄津獨化
聖人攸作蠶柱爲居龍門是託爰清爰淨惟寂惟冥
其龜識題名魚圖表靈火紀雲紀天正地正君臣禮
制宇宙輝明文武旣沒成康遂行群飛海水若羽天
星其玉筐曾齎金符遠系鐘石雖遷山河不替乾坤
降德陰陽合契虎嘯風清龍騰雲逝三元載佇萬方

攸濟其魯道旣昏綿綿若存祿移公室政在私門學
而方仕謙而彌尊聽之也厲卽之也溫義責齊國刑
徵季孫其多能惟聖道廢惟命天下莫容諸侯走聘
至於國必聞其政仁義立身溫恭成性不徒爲樂
終悲擊磬其九野八方栖栖遑遑從周返魯考夏觀
商先王道術夫子文章可久可大爲龍爲光星衡入
室月準昇堂其智周通塞神兼語默幾然而長黯然
而息漢承周運胡亡奉國察往知來研精茂德無必
無我自南自北其萬象皆尊千靈共同惟變所適居
常待終樂天知命匪我求蒙北辰之北東海之東百
王遺訓萬世餘風其時亡玉斗運鍾陽九周井龍沉

秦原鹿走生人卷舌道路鉗口禮樂崩頽曲章殘朽
萬邦請命三靈授手其一日角昇圖星精應符載揚風
教重闡規模數遷三國年當五胡星芒夜指日暈朝
枯環林摧折壁沼荒蕪其二赫矣高祖越若稽古丕哉
文皇照臨下土地維旁綴乾絃上補鯤化三千龍飛
九五爰有列聖重規襲矩其三我君文思念茲在茲
金鏡八海珠囊四時三雍九室秋禮冬詩絳帳語道
青衿質疑載垂仙渙廣創靈祠其四丕圖按籍遠求
陳跡玉檻烟開金牕雨闌晬儀侃侃雲居寂寂弟子
樞衣門人避席階列薰蓋庭羅絲石其五地接臨卭
山橫劔峯滇池躍馬沮澤蟠龍中擘擊節高門扣鍾

陰靈胎靈文雅雍容書池必變坐席常重其六今還
古往寂寥無尚太山旣頽吾將安仰梁木斯壞吾將
安徵異代風行殊塗影響敢立言而徵聖冀得意而
忘象其七

遂州長江縣先聖孔子廟堂碑

法象莫大乎天地變通莫大乎四時懸象著明莫大
乎日月備物致用莫大乎聖人夫子諱丘字仲尼魯
國鄉人也龜龍負識帝鴻驅八翼之軒魚鳥呈文天
乙降三分之壁五十二戰權輿驟帝之基二十七征
草昧馳王之業平域中之禍亂掃天下之虔劉以盛
德大業之尊當開階立隧之重及其山崩海竭日薄

星廻曆數不還謳謔遂遠元子賓周而建國一王之
車服可尋上卿翼宋而承家三命之衣冠再襲是故
陰陽混合洩符瑞於平鄉宇宙氤氳休徵於闕里
龍峻而龜背月角而雷聲有軒帝之殊姿有殷王之
異表山開遁甲尼丘落於紫垣星掌巫咸鈞鈴墜於
蒼陸淨光童子來遊姬旦之郊乾象明靈下俯庖犧
之國十五而志學三十而有成申下問於伯陽屈帝
師於郟子天爲木鐸九州知發號之期吾豈匏瓜一
國有來蘇之望膏登委吏稍踐中都天下可臨諸侯
取財以之禮而國定司空之官以成禮以之義而國
平司寇之官以成義掌山林於夏典物得其生聽獄

訟於秋官人忘其死大夫亂法仍行兩觀之誅陪臣
執權即問三雍之罪強公室弱私家叙君臣明長幼
用能使犧牲秬鬯不登闈闈之庭羽戟旌旄不列壇
場之位當是時也三光薄蝕九土分崩夷狄有君中
華無禮周京赫赫成康之至教茂聞魯國巖巖賢聖
之餘風可墜河圖未出吾道不行周流八方經營四
海治亂運也窮通命也荷天下之至聖仍逢盜跖之
軍伏天下之至和猶有匡人之逼德生於我樂天命
而何憂文不在茲臨大難而無懼使仁者必信安有
伯夷使智者必行安有王子豈三千擊水牛蹄不能
鼓橫海之鱗九萬搏風鷄羽不能扇垂天之翼然後

上不臣天子下不事諸侯乘殷之輅服周之冕或屈伸於季孟之間或動靜於魚龍之際下學而上達將聖而多能博而無名信而好古察殷周之禮樂損益可知觀祀宋之文章賢才不足數年學易伏羲龍馬之圖三月聞韶媯帝鳳凰之典信存乎德術數貫於神明意見乎時制作侔於造化已所不欲則一言可以終身人之莫違則一言可以亡國惡鄭衛之亂雅樂惡利口之覆邦家榮辱定於樞機褒貶存乎簡牘精誠密召北門開紫掖之星福應全來中極敷玄雲之氣乃若知幽明之故見天地之心有感而遂通不行而克至年當甲子潛知啟漢之萌音協宮商預察

亡秦之兆星移大火追責天司月入純陽無勞兩備季桓子獷羊之井推木石之禎祥陳惠公集隼之庭驗變夷之貢賦然後歷三辰而玉步照四極而金聲坐於緇帷之林浮於澶州之海門生七十仰天路以無階弟子三千望宮墻而不入哲人之能事畢矣先王之至德行矣配乎二象不能遷必至之期參乎兩曜不能稽有常之動南遊楚國遂聞衰鳳之歌西狩魯郊獨有傷麟之泣夫子周靈王二十一年冬十月庚子生至魯哀公十有六年夏四月己丑卒凡享年七十二于今一千餘歲泰山頽而梁木壞微言絕而大義乖傳饗祀於百家奉琴書於十代秦始皇見登

床之識始亂衣裳魯恭王看墀壁之書猶聞絲竹漢
圖起於六千日賜金之禮載優魏德行於五十年刻
石之風未泯述文武者皆憲章於聖人脩學校者僉
折衷於夫子自革鞮玉曆壽壽珪圖皇天無皁白之
徵戎狄起豺狼之釁摧六律絕笙簧塞師曠之耳天
下之人廢其聽矣散五彩滅文章膠離朱之目天下
之人黜其明矣我高祖神堯皇帝因三靈之寶曆籍
萬國之歡心風起北方月行中道削平宇宙戢干戈
於羊馬之年彈壓華夷照文物於龍蛇之代太宗文
武聖皇帝昇瑤壇於曲洛受玉版於平河經天緯地
盪海夷嶽坐玄宮而密轉紫微光帝宅之尊戴黃屋

以深居赤縣列神州之貴今上天無私覆道不虛行
馭六氣而平太階乘八風而制群動星連月合層臺
而有觀羽之勞海晏河移直筆有書祥之倦封太山
而禪梁甫千載同歸敞衢室而築明堂百靈咸秩雲
行雨施品物流行天尊地卑乾坤定矣若乃虞夏商
周之禮考正朔而三遷東南西北之人混風聲而一
變環林拂日映高柳而對扶桑圓海澄天走鯤池而
涵象浦粵以乾封元年有詔追贈夫子爲太師咸亨
元年又詔州縣官司營葺學廟憑風雲於異代照日
月於殊塗死者有知歿而無朽如綸如綍大君於號
令之嚴匪朴匪離上宰極司存之敬長江令楊公弘

農華陰人也即華山公之孫大將軍之子朱宮帶地
明河一葦之西黃闕中天神嶽千花之北山川壯麗
於區宇人物繁多於海內齊九龍而闊步一門鍾豹
變之靈襲五公而長驅四代赫蟬聯之社出忠入孝
詔秀與賢冠蓋城邑池臺鍾鼓英靈輻輳鏘鏘萬玉
之門嘉瑞駢羅濟濟千金之子是故北方多士太一
壯其魁梧南國仙人中書偉其端雅椅桐可仰丹漆
兼施照明月於胷懷吐清風於襟袖滅武仲之智卞
莊子之勇可以爲大臣矣韓尚書之臨八座發跡下
邳卓太尉之踐三階來從密縣自操刀入仕聞魯邑
之絃聲解劍分司察豐城之寶氣汝陰徐令人號無

雙河內王君時稱未有飛雪千里不能改松栢之心
名都十城不能動夷齊之行先是殊方暴客常嚴鉅
野之兵絕磴奸豪每縱潢池之疏數州常以爲弊歷
政所不能移行人爲之聚衆耕父由其釋耒公英謀
獨斷銳氣無前奮一劍以戮元兇馳單車而躡遺噍
道旁牛馬並屬羅衡縣內神明皆稱傳琰若乃山林
猛獸動星象而垂文江漢龜鼉鼓風颺而作氣城門
六閉未防虞吏之災都市三言終有三君之暴公雄
心烈背壯髮衝冠按東海之金刀飛北斗之石箭陶
嶮不擾有符劉孟之城坑穿無虞更似童君之邑自
非愛人猶子視物如傷豈能躬斬兇渠親除災害與

夫青繩不用道被於瑕丘桴鼓希聞化移於京洛可
同年語哉然後示之以禮儀陳之以庠序興後鳩工
憑三時之閑暇薄賦輕徭視四野之川原依城負郭
青泥險躑斜連白馬之關赤岸長波遠注黃牛之峽
懸四刀而開益部照參伐於天光賦上錯而闢梁州
絕岷嶓於地德青山臨水掩全蜀之膏腴望日占星
採公宮之法度丹墻數仞吐納雲霞椽柱三間蔽虧
風雨瑤璃曉關東宮雀目之窓玳瑁朝懸西漢虵鱗
之楸圖光芒於北斗聖質猶生赫符彩於連珠宏姿
可想至於月衡月準山額山庭侖侖星文堂堂日角
莫不向之如在疑遊北上之山望之儼然似矚東流

之水博士助教某等西州聞望南國英靈駭飛兔於
文場躍雕龍於筆海楊雄博識神遊象繫之端李邵
幽通思入璣衡之表每至韶光令月朱鳥乘春爽氣
高天玄龜送曆瓊籀玉豆中堂奉先聖之儀石磬金
鐘南面習諸侯之禮華陽曾子鼓篋來遊蜀國顏生
握衣請學絃歌在側還昇武騎之臺禮樂居前重觀
文翁之室祗祗茂德濟濟時英聖人千載之風儒者
一都之會丞主簿尉某等青田戒露望華蓋而長鳴
綠地生風下仙閣而直轡大夫貞節還居內史之丞
文學明經猶歷南昌之尉鄉望姓名等王孫獵騎騁
原隰之盤遊公子文鋒叙江山之體勢符偉明以郁

官謝職逢有道而相推趙元淑以郡吏從班見司徒而不拜僉以鄉閭小事風月多懷命童子於雲臺就門人於相圃冬禮春詩之化再造雙川淹中稷下之風一匡三蜀若夫平南壯烈沉流水於栽碑逐北勲庸登燕山而刻頌庾太尉新亭之墓尚有黃金鄭康成通德之門猶存白瓦况乎功苞大象績被蒼生豈使銘典闕如音鑿不嗣是用雕墻峻宇列冠蓋於宜城塞陌填街考春秋於太學小人狂簡不知所以栽之夫子文章今可得而言也詞曰

西崑玉闕南海金堂惟惚惟恍一陰一陽三辰赫赫九土茫茫太極天帝神州地皇驪連上古混沌中央

降及軒頊終於夏商四時玉斗五緯珠囊聖德千載淳風八荒天開赤籙日照青光識協金匱兵符玉潢化隆文武澤盛成康天子穆穆諸侯皇皇春秋代謝宗社危亡帝典垂象人倫不綱山河命德天地興祥禮樂三變文明一匡原承少典祚啓成湯吹律丹鳳鈎符白狼三仁去國再命循墻不有積善其何以昌降靈鄒邑誕哲平鄉月角摘彩星鈴吐芒文行忠信恭儉溫良或默或語能柔能剛學而不厭師亦何常通禮明德尊賢毀方古之君子昔者明王道協公旦神交帝唐攝官從事冕服端章示之以德臨之以莊澤如春雨威若秋霜男女斯別尊卑克彰時逢版蕩

官謝職逢有道而相推趙元淑以郡吏從班見司徒而不拜僉以鄉閭少事風月多懷命童子於雲臺就門人於相圃冬禮春詩之化再造雙川淹中稷下之風一匡三蜀若夫平南壯烈沉沅水於裁碑逐北勲庸登燕山而刻頌庾太尉新亭之墓尚有黃金鄭康成通德之門猶存白瓦况乎功苞大象績被蒼生豈使銘典闕如音壑不嗣是用雕墻峻宇列冠蓋於宜城塞陌填街考春秋於太學小人狂簡不知所以裁之夫子文章今可得而言也詞曰

西崑玉闕南海金堂惟惚惟恍一陰一陽三辰赫赫九土茫茫太極天帝神州地皇驪連上古混沌中央

乃逐吉日揚靈辰

仍能列缺之鞭斗為壽身

臺星無登介卯下星前植神休而夢明輝

運屬悽違入齊損味居陳絕糧登山極目臨水倘佯
無道斯隱舍之則藏季孫大賚叔敬掄揚問官郗子
受樂師襄神明協贊雅頌鏗鏘紫麟遙集丹鳥遠翔
生靈水火家國舟航功符日用德協天長條嗟崩嶽
奄歎摧梁昧昧神道悠悠彼蒼書開懷宅識識登床
與代輕重因時弛張瓊裘黼黻沙漠壇場璣衡慘慘
載籍膏肓汾河水白晉野星黃軒電臨斗殷雷入房
九圍臣妾八極城隍東序西序上庠下庠粵惟銅墨
寶號金箱靈山地輔德水天潢芝蘭秀出羔鴈成行
玉匣孤劔瑤臺驕驕懲奸槿右濟猛移蝗風傳積石
道被滄浪絲言渙汗經葺相望夏井蓮植秋窓桂芳

綉楹文琰綺綴明璫四注飛閣三休步廊禮行釋菜
敬盡明蕪圖非有若地異空桑伏義書契女媧笙簧
匏土金石珪琮璧璋高門程鄴碩學王楊威儀秩秩
宮徵滄滄山棲烏鳥水宿鴛鴦蜀門荷戟江津濫觴
落星高堰明月回塘丹碑不朽清廟無疆

楊盈川集卷五

碑

少室山少姨廟碑

臣聞崑崙西北之天門也則五帝處其陽陸三王居其正地泰山東南之日觀也則秦皇刻其石銘漢帝探其玉策故知建都邑正方位劃崇墉列濬洫必憑天地之險然後四海爲家擁神休尊明號協時月同量衡必致山川之祠然後群神受職少室山者山嶽之神秀也憑河圖而括地用遁甲而開山發揮宇宙之精噴薄陰陽之氣壁立而千仞削成而四方北臨恒碣猶如聚米南望荆衡纔同覆篑共工氏觸皇天

盈川集卷五

一

之八柱未足擬議龍伯人釣溟海之三山無階饜像考於含神霧白玉猶存驗於山海經黃花不落其名有序則太室西偏其位可知則嵩高佐命若乃乾坤之所合雷雨之所交仰躔七星之野俯鎮三河之曲朝市臨於域中樞機正於天下六合交會於是有天帝之下都九州名山於是有靈仙之窟宅臣謹按少姨廟者則漢書地理志嵩高少室之廟也其神爲婦人像者則故老相傳云啓母塗山之妹也昔者生於石紐水主所以致其功娶於塗山室家所以成其德后宗之位象南宮之一星外戚之班比西京之列傳惟幾不測其道無方騁神變而揮霍降精靈而盻靈

亦猶蔣侯三妹青溪之軌跡可尋虞帝二妃湘水之波瀾未歇何止祠稱丁婦廟號滕姑少女宅於西宮夫人館於南嶽山臨白岸空聞石室之靈浦對青崖獨有金臺之異若斯而已矣時更魏晉數歷周隋四望於是莫脩八神以之無主炎涼代序寧觀俎豆之容霜露沾衣非復絃歌之地國家乘天造之草昧屬人謀之與能奄有大寶遂登神器天地水火之無象則女媧氏補之於是乎鍊其五石東西南北之失位則神農氏立之於是乎甄其四海天皇貴與天乎合德富與地乎侔貲窮變化之理盡神明之數伏羲畫卦唯觀鳥獸之文黃帝垂衣蓋取乾坤之象利兼於成器功周於備物瑾臺美化闡邦國之風猷銀榜嘉聲茂君親之典禮稱才子者八族則叔獻季狸有亂臣者十人則太顛閔夭若夫圓丘方澤所以饗天神地祇復廟重欄所以序文昭武穆命秩宗之位分大宰之官考虞夏之質文定殷周之損益其大禮有如此者高陽有飛龍之樂始會八風帝舜有儀鳳之音初調九奏后夔典其教制氏辨其聲鐘磬竽瑟致其和尊卑長幼成其序其廣樂有如此者太微營室明堂布政之宮白獸蒼龍象魏懸書之法下應猶草土言如絲北辰而拱衆星南面而朝天下其爲政有如此者糾萬人者施以八刑誥四方者戒之三典畫象

不犯載酒無冤免禽獸於網羅納寰瀛於軌物其誼
刑有如此者周人之養國老始闢西膠漢氏之召諸
生初開太學辟雍所以行其禮泮宮所以辨其教童
子三尺羞談霸后之臣冠者六人惟述明王之道其
文德有如此者涼風至司馬於是乎陳兵太白高將
軍於是乎宜戰乘斗杓而誓旅出星門而杖鉞莊周
稱天子之劍舉之按之呂望言聖人之兵如風如雨
其武功有如此者稽其殷令有文犀利劍之効珍考
其周書有諸白乘黃之騁力東漸西被南馳北走盧
敖之窮觀六合不出於城隍陶侃之飛入八門未游
於宮室其疆理有如此者察璿璣而乎大運天回地

游吹玉律而部人時陽動陰靜烟雲蕭索而合彩日
月淑清而啓旦豈直鳳巢阿閣入軒后之圖書魚躍
中舟稱武王之事業其休徵有如此者然則囊括混
沌發揮生靈大庭不足使驂乘驪連不足使扶轂可
以會玉帛可以答靈祇行聖人之大孝既郊祀而宗
祀昭帝王之盛節亦因天而事天猶復下聽與人旁
求故實以爲唐堯五載無聞太室之儀殷帝八遷未
卜王城之地是用陳圭置臬建周后之兩都詔蹕鳴
鑿巡漢王之中嶽燹惑先列招搖在上隱天而動地
欲野而歆山旌旗則日月運行鐘鼓則雷風相薄道
伊闕據轆轤怡然肆望邈乎周覽壯靈山之雲雨

求載祀之經對閑寢之丘墟思秩無文之禮於是降
天渙命司存因其舊跡葺其新廟詳費務議工徒下
隴蜀之名材致荆藍之寶玉易者言乎悅使人忘其
勞詩者歌乎子來成之不日東西轡轄南北崢嶸繡
楹兮雲楣光照耀兮奪目桂棟兮蘭椽氣氛氲兮襲
人皎日登於綺䟽奔星下於閨闈珠簾璫匣上高閣
而三休金柱銀楹出長廊而中宿窮山海之瓌寶盡
人神之壯麗豈止河庭貝闕俯瞰馮夷之都洛水瑤
壇旁臨處妃之館爾其巖嶂重復岡巒左右青霞起
而照天白露生而布地餘基隱嶙仍知萬歲之亭古
木摧殘尚辨二花之樹明公舊祀棟宇岌崑仙女層

臺風烟爛熳軒轅之訪大隗先求牧馬之童太一之
徵少君直下乘龍之使夫峻極也天帝因而會昌夫
降神也景福由其興作於是乎昭之以明德聽之以
和聲可以羞澗溪沼沚之毛可以奠潢汙行潦之水
聰明正直惟鬼神而有知玉帛犧牲實陳信而無愧
日之吉靈之來蛻爲旌兮翠爲蓋雷爲車兮電爲策
鼓之以南箕風嫋嫋而先路潤之以西畢雨冥冥而
灑道其始至也若海靜山空曠曠朧朧照白日于扶
桑之東其少進也若移星轉漢燦燦爛爛吐明月於
瀛洲之半佩珠璣而玃璫襲羅縠而飄飄建晨纓之
寶冠踐遠游之文履命儔兮嘯侶徒倚兮徘徊群仙

畢集衆靈咸至有西華之紫妃有中黃之素女華山之
上明星遠燭陽臺之下暮雨潛通或瓊室以飛霞
或銀臺而薦藥天孫忽降覽停支石之機神女相歡
即起投壺之電左侍右衛則甲申之瓊石乙巳之蘭
蕭妍媚妙奴則憑悅之清歌幽靈之鼓瑟樂章旣闕
禮容斯備回風兮雲旗入不言兮出不辭荷衣兮蔥
帶倏而來兮忽而逝惟神享德降百福而無疆惟嶽
配天視三公而有典昔周夏后氏之乘四方仍開宛
委之圖周穆王之御八龍猶紀弁山之石况乎上照
下漏天平地成人主宅中旁羅於宇縣山靈顯位密
邇於神州豈使令德不傳頌聲無紀由是三天降策

有南霍之升儲八丈鐫銘有西王之服道魏國鍾繇
之字惟勒歲年晉家張載之文遂承明詔其詞曰
上帝有命皇天無親樹之元后以牧烝人光宅六合
懷柔百神德成郊祀禮備宗禋其軒稱配永崑墟帝
出堯號則天汾陽詔蹕觀人設教協時同律有感必
通無文咸秩其皇家起聖受命于天上鍊五石旁疏
百川開階運斗宅海乘乾王母益地周公十年其天
子建德重規疊矩聖敬日躋宗文祖武範圍三極和
平萬宇率由舊章粵若稽古其璇宮夜敞銀榜朝開
德象陰月騰符震雷山河翼戴星緯鹽梅能事畢矣
乾元大哉其理定制禮功成作樂日月旂常夏殷正

朔德溥天外文明地角氣白星黃風搖露濁

其兩京

畿甸五載巡遊驅馳太一部列蚩尤將見大隗爰尋

許由廻鑿躡躅寓目周流

其

鬱鬱靈鎮巖巖積石直

上五千去天三百帝休非遠員經可覲石室徘徊瓊

膏滴瀝

其

山惟地德神即陰靈瑤姬逐雨玉女隨星

陰陽不測黍稷非馨倏忽年代荒蕪廟庭

其

旁求祀

典載垂天漠始詔林衡俄成壯觀紫柱星錯丹梁霞

煥似對青溪如遊白岸

其

文狸赤豹電策雷車隱隱

中道旬旬太虛遂停龍駕永託神居天廻地止霧歇

雲除

其

十衆靈睽揚群仙容與衡岳夫人海濱游女

洛川解珮天河弄杼顧慕招携續紛儔侶同聲同氣

爰笑爰語

其

十于以採蘋南澗之濱于以採藻于彼

行潦日吉兮辰良浴蘭湯兮沐芳揚枹兮拊鼓奠桂

酒兮椒粢神其萃止降福穰穰

其

十

銘

梓州惠義寺重閣銘

大辰之歲正陽之月有邠縣宰扶風竇競字思春昭

宣令德光闡化猷庶政惟和萬人以理閑庭不擾退

食自公遠覽形勢虔心淨域乃與禪師釋智海忘言

契道寓目於長平之山援飛莖陟峭嶠削成千仞壁

立萬尋俯觀大道僅如棗葉下望須彌裁同芥子飛

流滴瀝而成響喬樹璀璨而垂榮玉堂石室千門相

似大殿珠毫十方皆現慷慨棟宇之未立可嗟棟宇之莫修不恰有爲取諸大壯觀夫左龍角右參旗前太微後營室駢羅列以雜沓瑟瑟條以清冷上磊落以晃朗下泓澄以黠黠參差森森纒纒千櫨萬拱乍合乍離葳蕤粲粲絢煥煥六采五章或同或散莽如天履蟲以雲牛金火合舍於垂珠日月相望於街壁璇墀銀砌平按太階玉戶金扉俯臨閭閻曳紅日舒丹霞豐隆爲雷抨鏗訇於軒檻列缺爲電翕忽霍於庭除寒暑隔闕於墻垣虹霓迴帶於廊廡仰之不極目炫炫而喪精登之無階心遑遑而失度土木翔九垓之表仍不逮於上榮文章窮四海之間猶

未離於前城借如梵天之闕釋帝之宮兩曜城池五雲樓觀輪王所處純金爲說法之堂諸佛所遊衆香作經行之地亦未可同年而語也夫黃金鏤榜曾不若四攝之門青石爲墻曾不若三空之地殫百工之力建七寶之樓豈徒然哉良有以也夫何故如來神刀且觀嚴淨道師方便化作一城事有古而可質於今言有大而可徵於小是則毘耶四會俱發道心險路衆人咸知寶所其銘曰

長平山兮建重閣上穹隆兮下磅礴綸被麗兮駢文錯巖色相兮冲寂寞誰所爲兮天匠作

爲劉少傳等謝勅書慰勞表 高宗

臣某等言司馬郎中王知敬至伏奉今日日手詔璿璣下照覩天象之三光玉檢前開見河洛之八卦發揮珪璧咸召風雲不知手之舞之足之蹈之者也臣等稽之天地明山關長男之宮步之日星樂府奏重光之曲三王所以立教者天子爲先萬國所以稱貞者元良是寄伏惟天皇御中道躋平陸對揚文武之休命紹伏古先之大業洛京朝市義協於省方秦地山河事資於監守皇太子一物三善四方繼明孝以承親顯於直地之路明以照下驗於長壽之術虔奉絲綸躬親政事德刑詳矣旣遠安而邇肅博愛先之

龔川叢書

八

亦塗歌而里詠固以禮成恭敬道洽溫和知寶曆之無疆信蒼生之幸甚臣等竊循愚蔽謬荷恩私或位聯輔弼職在台衡希少陽之末光自韜螢火洽重海之餘潤色息牛溲不謂殊獎曲覃真文俯及載之眉首奉以周旋聽葛天氏之歌方慙此慶聞有虞氏之石未均斯喜但知懷璧之罪不可越鄉豈敢貪天之功以爲己力傾誠每積候朱鳥於南宮拜德無由限蒼龍於左闕

議

公卿以下冕服議

古者大昊庖犧氏仰以觀象俯以察法造書契而文

籍生次有黃帝軒轅氏長而敦敏成而聰明垂衣裳而天下理其後數遷五德君非一姓體國經野建邦設都文質所以再而復正朔所以三而改夫改正朔者謂夏后氏建寅殷人建丑周人建子至於以日繫月以月繫時以時繫年此則三王相襲之道也夫易服色者謂夏后氏尚黑殷人尚白周人尚赤至於山龍華蟲宗彝藻火粉米黼黻此又百代可知之道謹按虞書曰予欲觀古人之象日月星辰山龍華蟲作繪宗彝藻火粉米黼黻絺繡由此言之則其所從來者尚矣夫日月星辰者象明光照下土也山者布散雲雨象聖王澤露下人也龍者變化無方象聖王應

時而教也華蟲者雉也雉身被五彩象聖王體兼文明也宗彝者武雉也雉以剛猛制物象聖王神武定亂也藻者逐水上下象聖王隨代而應也火者陶冶烹飪象聖王至德日新也粉米者人恃以生象聖王爲物之所賴也黼者能斷割象聖王臨事能決也黻者兩已相背象君臣可否相濟也逮有周氏乃以日月星辰爲旌旗之飾又登龍於山登火於宗彝於是乎制袞冕以祀先王也九章者法陽數也以龍爲首章袞者卷也龍德神異應變潛見表聖王深識遠知卷舒神化也又制鷩冕以祭先公也鷩者雉也有耿介之志表公有賢才能守耿介之節也又制毳冕以

祭四望也四望者嶽瀆之神也武雉者山林所生明其象也制絺冕以祭社稷也社稷者土穀之神也粉米由之成象其功也又制玄冕以祭群小祀也百神異形難可遍擬但取黻之相背異名也夫以周公之多才也故治定制禮功成作樂夫以孔宣之將聖也故行夏之時服周之冕先王之法服乃自此之出矣天下之能事又於是乎畢矣今知幾表狀請制大明冕十二章乘輿服之者謹按日月星辰者已施於旌旗矣龍山火米者又不踰於古矣而云麟鳳有四靈之名而玄龜有負圖之應雲有紀官之號水有盛德之祥此蓋別表休徵終是無踰比象然則皇王受命

天地興符仰觀則璧合珠連俯察則銀黃玉紫盡南宮之粉壁不足寫其形狀罄東觀之鈇黃無以紀其名實固不可畢陳於法服也雲者從龍之氣也茄者藻之自生也又不假別爲章目也此蓋不經之甚也又鸞冕八章三公服之者也鸞者太平之瑞也非三公之德也鷹鷂者鷲鳥也適可以辨刑曹之職也熊羆者猛獸也適可以旌武臣之力也又稱藻爲水草而無法象引張衡賦云滌倒茄於藻井披紅葩之狎獵請爲蓮華取其文彩者夫茄者蓮也若以蓮代藻變古從今旣不知草木之名又未達文章之意此又不經之甚也又毳冕六章三品服之者按此王者祀

四望服之名也今三品乃得同王之毳冕而三公不得同王之衮名豈惟顛倒衣裳抑亦自相矛盾此又不經之甚也又黼冕四章五品服之大者考之於古則無其名驗之於今則非章首此又不經之甚也若夫禮惟從俗則命爲制令爲詔乃秦皇之故事猶可以適於今矣若夫義取隨時則出稱警入稱蹕乃漢國之舊儀猶可以行於代矣亦何取於變周公之軌物改宣尼之法度者哉

楊盈川集卷六

神道碑

後周青州刺史齊貞公宇文公神道碑

惟黃帝大電之精以太清而張樂惟高辛招搖之象以人事而紀官於是乎生我司徒敬敷五教翼贊虞帝而咸熙庶績惟殷湯受天明命以統九有之師惟微子崇德象賢以爲萬邦之式於是乎生我丞相約法三章光輔漢室而威加四海大齊宣皇帝商周之日號西伯以稱臣太祖高皇帝堯舜之朝避南河而革故司空臨川獻王懿親明德論道經邦中庶子平樂侯開國承家丹書白馬於是乎生我齊貞公惟魏

楊盈川集卷六

一

之寶惟周之幹開上帝而格天地變陰陽而平水土詳求典載歷選台衡或大澤而康帝圖或高丘而濟王業諸侯五百伊尹出於庖厨甲士三千太公起於屠釣未有上從軒后下及全齊聖主明君三居域中之大帝師王佐累及人臣之重古所謂歿而不朽者抑斯之謂與公諱彪字明俊蘭陵人也即宣帝之玄孫高皇之曾孫臨川王之孫平樂侯之子稟神河岳藉慶王侯攀兩曜之末光乘五行之秀氣溫厚廉讓當時以爲達人宣慈惠和天下謂之才子屬三方鼎立九土星分祿去公朝失諸侯之盟會政由梁國建天子之旌旗士女同嘆於商墟鬼神共謀於夏社公

杜門屏迹心不自安與門生故吏數百人歸於後魏
宣武皇帝以客禮待之詔除給事中假龍驤將軍正
光五年兼彭城府長史假節則將軍比於王濬優禮
則長史兼於杜襲龍驤可畏晉后任之於渡江騏驎
不乘魏氏託之於留府六年除通直郎散騎常侍中
書侍郎永安三年帝北巡遷撫軍將軍銀青光祿大
夫散騎常侍散騎通直起於天興之元中書侍郎始
自黃初之代宣王撫軍之號僕射光祿之名竒才總
於文武重任歸於將相徐方叛逆以公爲行軍長史
兼統別部仍加鼓節彭城宋邑海岳徐州嶧陽孤桐
羽畎夏翟昔稱都會今實邊陲魯伯禽始得征伐周
穆王遂行天討公手執旗鼓入侍帷幄以陶侃部分
之明當阮孚戎旅之重有如荀羨獨負逸群之才不
學江適空有連雞之喻徐州平遷黃門侍郎揚州大
中正黃扉藹藹青瑣沉沉有若張公之萬戶千門博
觀圖籍太湖爲浸會稽爲山有若荀勗之十郡一州
詮藻人物累遷大司農秦稱內史漢曰司農管夷吾
陳不涸之名耿壽昌立常平之議時播百穀后稷讓
於虞書阜成兆民列卿拜於周典普泰元年遷車騎
將軍加右光祿大夫永熙二年出爲潁川大守地稱
汝潁俗尚申韓有鄭伯之別都有周公之朝邑教之
德化無囚歷於八年任於賢能旁潤踰於九里於時

齊武王居中作相實有遷鼎之謀周太祖在外持兵深懷事君之道昭公失位由季氏之執權襄王出居成晉文之霸業三年秋八月武帝幸長安以義兵從顧大統元年授開府儀同三司封靈璧縣開國子邑三百戶金提石印清濟濁河爰賜土田以爲藩屏漢之宰相始開封邑周之列侯實兼卿士二年拜車騎大將軍九年遷五兵尚書十年遷中書監領驃騎大將軍加開府儀同三司進爵爲公增邑一千戶天子有詔不入軍門匈奴未滅不營私第蔡謨兼五兵之署鄧騭比三台之儀掌中書之綸輪加上公之冕服十六年遷侍中驃騎大將軍以下並如故昔惟常伯

今則侍中切問近對拾遺補闕冕旒無象先問顧和玉佩不存即徵王粲廢帝後二年公不賀出爲使持節華州刺史侍中並如故桃林國邑大荔城隍三秦六輔之奧區五嶽四瀆之襟帶倪寬之爲內史惟事漑田薛宣之守馮翊但知拱默尋加特進餘如故官品第一朝廷所敬辟吏如五府之間班列在三公之後唐虞之繼文德也稷契謨明於兩朝魏晉之順大名也裴王建功於二代周武成三年進聞青州齊郡公邑二千戶賜號東岳先生詔曰堯有四岳朕惟公一人賜雜彩二千段甲第一區雍州良田百頃其優禮如此堯命羲仲星鳥嵎夷之官周賜姜牙穆陵無

標之境三王不襲同盟固於泰山百代相因舊國傳
於負海惟寶定四年公薨於長安私第天子罷朝群
臣赴弔喪用官給嗚呼哀哉五年贈少保使持節揚
光桂三州諸軍事揚州刺史謚曰貞公禮也公少丁
外艱州黨稱其孝齊武皇帝見而嘆曰可謂吾家曾
閔外祖大尉公王儉謂其子侍中騫曰成汝宅相者
在此孫乎公之北歸也後魏宣武帝勅曰昔微子去
殷項伯歸漢卿又得之於今公泣涕橫流跪而對曰
臣家國不造隄祚淪亡進不能匡正退不能死節今
復託身有道何敢比德古人帝因此重之及周太祖
作相西朝王侯之下皆望塵而拜公與之抗禮太祖

尤相敬待屢有咨詢嘗從容曰國家之子房也公體
淳和之至性負廊廟之大才孝通神明忠定社稷馬
伏波來遊二帝晏平仲能事百君在魏則賈詡荀攸
在周則太顛闕天惟司徒克慎厥始惟丞相克和厥
中惟公載德克成厥終三后同其政道子孫訓其成
式輝光助於日月德積廣於宇宙以其年月日葬於
少陵原國遷三代年移十紀杜當陽之碑石沉漢水
而無聞仲山甫之鼎銘入匈奴而不出曾孫皇朝右
金吾將軍同州刺史得照宏才大節玉振金聲入當
天子之右軍出臨帝京之左輔承積善之餘慶襲太
宗之不遷願述家風思傳祖德是用勒銘刻石相賞

披文載於景鍾大夫稱伐之義書於太常諸侯計功之道追題瓦屑鄭康成北海之門重刻碑陰張平子南陽之墓其詞曰黃帝攝政勤勞耳目居於軒轅戰于涿鹿咸陽黜夏登壇受福表正萬邦績禹舊服其一建乎微子周之國賓降及蕭叔宋之懿親高祖丞相王迹是因宣王御史社稷之臣其二太陰所立皇齊誕聖既創元基仍集大命謀孫翼子重熙累盛天祿永終南風不競其三惟公載誕克嗣家聲千丈多節三年一鳴待時而動以族而行才歸晉國璧入秦庭其四符堅拜首降天之使陶豫策名勤王之享任隆起草榮高近侍赫奕禁門雍容貂珥其五日暮青瑣夕郎之職

法駕華陳黃門次直帝王之盛誠在農殖如京如坻我黍我稷其一吳王舊國採山鑄錢公爲中正佩以韋絃夏禹遺跡今來潁川公爲太守示以蒲鞭其二齊稱東帝周稱西伯諸侯謀王天子下席公子忠義如彼松栢其三發自新邑歸於陸海魏德雖衰天命未改功成晉鄭爲而不宰寵茂山河於是乎在其四亞夫真將去病元勳持兵對揖絕漠行軍尚書武庫抑有前聞侍中重席曾何足云其五當途邈位有周經野二國唐虞兩朝裴賈出守馮翊人無訟者受封於齊實匡天下其六晨占赤烏夜辨黃熊曾參易筮期於令終子囊城郢歿有遺忠明君輟朝群臣會同其七黃屋左

彝輕車介士朝發桐鄉暮歸蒿里積善餘慶由來尚
矣公侯子孫必復其始其十

後周明威將軍梁公神道碑

蓋聞君爲元首臣作股肱或論道三槐或折衝千里
至有道存俎豆藝摠干戈高視翰墨之英猶布爪牙
之旅究青編於學府業有多聞受黃石於兵符筭無
遺策故得九功咸叙七德攸彰文武不墜公實兼美
公諱待賓安定臨涇人也竦以英才遠邁知州縣之
徒勞鴻以抗節遐徑覽帝京而有作由是五噫標典
播金石而騰徽七貴承榮綰銀黃而覺茂貞規盛烈
朕史凝圖映紀詠歌無俟詳確高祖禦後魏駙馬都

尉侍中少保金紫光祿大夫揚州總管贈太尉謚昭
公食邑二千戶銀榜增輝玉壺流渥位隆三少化浹
五胥旣而幽壠埋魂終降槐庭之贈高門納駟式居
茅土之封曾祖睿宇文周駙馬都尉鄜秦二州摠管
光祿大夫兵部尚書隋益州摠管將國公贈司空食
邑三千戶白水時清孔武之謹行息祿符垂異扣馬
之諫必申加以主西子之群英名高八座遵文翁之
遺訓學富三巴茂先榮級忽光泉壤漢祖寵章永有
帶礪祖海隋沙州刺史上柱國公踐仲寧之餘躅奸
邪斂手篤孝仁之遠蹤群胡革面連州跨郡邁陶氏
之隆基開國承家掩張門之累葉父贊隋左千牛備

身驪山府上騎柱國唐朝豐王府諮議雲州司馬燕
州長史蔣國公葉良弓於簪笏榮侍紫宮翼雕戟於
巖廊肅趨丹地西園坐謔侶明月而飛文北土行康
望浮雲而展足公漸潤膏腴登靈川嶽七年可識抱
杞梓而呈才千里見知負騏驎而騁駿靈臺遠鑒與
霜月而齊明智府弘深共烟波而等曠踐仁義於區
域白壁已輕許然諾於樞機黃金豈重因心孝友宜
於自然率志謙冲得乎天性不脂韋而求達不詭計
而自媒被玉軸之文章三冬遽足窮金壇之祕訣百
戰不孤譽滿寰中聲蓋天下而學優將仕允屬名家
欲昇鴻漸之姿終佇鶴鳴之問以唐朝麟德二年補

左親衛從資例也屬金甲出戰玉帳論兵從命文皇
問罪遼碣公提戈赴海投筆從燕智者有謀仁者必
勇孤鋒直進九種於是克清疋馬橫行三韓由其殄
滅疇庸賞最我有力焉俯洽恩波泛承勳級即授上
柱國公深慚位薄命舛數奇雖露勒石之勲未展披
堅之効嗟乎揚子雲之才藻空疲執戟馬相如之文
詞猶勞武騎今古同貫夫復何言旣而從牒隨班牽
絲祇務起家拜朝議郎永淳元年正月三十日授伊
州伊吾縣丞非所好也路指金河途連玉塞塵沙共
起烽火相驚秋草將腓胡笳動吹寒膠欲折虜騎騰
雲公佐佑多方掌司攸寄服叛懷遠擒姦擿伏於是

竊不敢窺邊歌頌因茲溢境曾未朞月政令大行
特簡帝心超居不次永淳二年二月四日制授昭節
校尉守右衛蒲州府佐果毅仍令長上兼上陽洛城
等門供奉公洞曉戎章妙詳兵律軍國是賴戎幕允
歸由是微道長巡嚴扃每奉朝求夕警不忘於風霜
善牧能防更申於閑阜其年十月七日奉勅命於大
內祥麟廐檢校馬公識高東野職叅西極勵銜策而
追風逐日加剪拂則絕雷奔星駛驥將駟騄齊衡驥
駟共駒駉伏櫪於是龍媒間出麟駒挺生伯樂多謝
於精微日碑有慙於牧養恩制褒獎又加崇秩文明
元年二月二十日遷游擊將軍仍依舊長上大周革

命兩儀開闢爰覃作解之恩式暢惟新之典勤勞夙
著體望允歸拜職遷榮定符僉議天授元年九月十
六日加威武將軍守左玉鈐衛翊善府折衝都尉依
舊長上封安定縣開國男食邑三百戶公祇奉王庭
職司兵衛八屯由其增峻五校於是克宣翼翼競心
積劬勞於歲月勤勤忠志懷踴躄於序時憂能傷人
竟成沉疾以長壽三年正月六日終於神都旌善里
私第春秋五十惟公弱不好弄卓爾不群九歲明詩
七齡通易月初能對即習黃童目不相訓還慙夫子
經耳不忘歷口不遺性沉深有器度能侷儻無拓落
尤重交友雅愛林泉月愧風襟每吟諶於牋綵花新

葉早必賞會於琴樽加以啼猿落鴈之奇鸞鷲鳳
之妙瀉水懸河之辨背碑覆局之精標映前哲公實
多敏至孝過人雍和絕俗事父母則造次不違友第
兄則溫柔必盡旣風樹典感霜露纏悲聿脩之德惟
新欲報之恩罔極虔誠大衆弘誓小乘廣樹慈仁庶
憑因果月抽官俸日減私財並入薰脩咸資檀施故
得雕壇之妙俯對禪龕記葉之文式盈梵宇粵以大
周長壽二年歲次癸巳二月辛酉朔二十四日甲申
遷窆於雍州藍田縣驪山原舊塋禮也葬事之屬一
皆官給鼓吹儀仗送至墓所墳開白日終留恨於滕
城禮被皇家忽霑榮於霍隧嗚呼哀哉嗣子左千牛

去疑哀纏泣栢思結飡荼仰庭禮而不追覩沒書而
增慕恐玄穹倚杵碧海成桑敬勒貞堅乃爲銘曰
大哉羸國遠矣少梁與秦同祖今則夏陽爰暨伯翳
胙土惟良自茲厥後人物克昌逮乎漢朝令望不已
三世連輝七侯承祉或顯或晦有文有史曷奕珪璋
芬芳蘭芷少保名揚司空道泰惟祖惟禰聯軒蓋
挺生令則在邦之最非歲騰芳鬢年超霑君號神童
號稱英傑佩仁服義旣明且哲七步立成五行不輟
家惟萬卷韋實三絕詞高許下學富淹中志惟謹藜
心亦冲融温淳植性朗潤在射闈門禮洽朋友財通
思若雲飛辨同河瀉兼該小說譽容大雅武檀孫吳

文標董賈樹下啼猿封中試馬且文且武執戟登位
海隅不賓命我偏帥旣陪勒石還從飲至輔翊百里
褒昇佐貳旣摠兵權入司宮掖激道宵警禁門曉關
式重其駿載懷斯癖我馬旣良我軍旣雄折衝千里
趨奉九重行承芝詔坐啓茅封恨深負米榮暨擊鐘
爰持戒律思答慈容將福有徵謂仁必壽如何淑德
遭此凶咎孺慕崩心墀婺宿首夜泉扃閉天長地久

唐同州長史宇文公神道碑

諸侯計功其銘曰仲山甫誠于百辟大夫稱伐其銘
曰正考甫恭于三命所以揚其先祖所以示其子孫
上古之初刊於禮樂之言中年以降述於宗廟之碑

文質旣殊源流遂廣山河永配金石長存或旌原氏
之阡或表滕公之墓觀百林之字者孝廉之舊業於
是乎不愆不忘讀黃鳥之詞者文範之餘風於是乎
可久可大公諱珽字叔珉河南洛陽人也宇文歸之
遠派宇文翰之餘秩燭龍晝夜於鍾山鵬雲南北於
溟海自中州圯圻上國崩離魏氏忘其實圖齊人弄
其神器則天有成命周雖舊邦文王以業重三分昭
事上帝武王以功成八百陰隲下人車書混一於域
中子弟星羅於海內方乎劉澤乃天漢之懿親匹以
曹洪即當塗之近屬及其隋室遷鼎重運握符固亦
壇社仍存山河不替曾祖顯和後魏將軍朱衣直閣

東夏州刺史車騎將軍散騎常侍長廣郡公周贈使
持節開府儀同三司延丹綏三州諸軍事延州刺史
周書有傳對揚天命保乂王家霍去病初封冠軍周
亞夫始爲車騎剖符之重任在於六條建國之榮禮
高於五等祖神舉使持節驃騎將軍開府儀同三司
京兆尹柱國大將軍并潞肆石四州十二鎮諸軍并
州總管東平郡公贈少保周書有傳材優輔弼業贊
雲雷晉則羊祜儀同楚則若敖柱國王章之拜京兆
天子聞其直言郭伋之薤并州諸童符其恩信考誼
隋文皇帝挽郎皇朝益州青城瀛州清苑二縣令鈞
深致遠直道正詞不及汲於富貴每乾乾於日夕廣

都蔣公瑛非無社稷之能太丘陳仲弓自有閨門之
德公慶成弧矢氣襲芝蘭劍則赤山之精照牽牛於
比斗鬪則黃雲之寶入天駟於東方資大孝而立身
蘊中和以成德詞參變化稽百代之闕文學富圖書
闕三冬之舊史司徒袁粲許之以栝栢豫章處士補
衡目之以椅桐梓漆初任國子生擢第授道王府參
軍兼鄭州叅軍事橫經太學射策王庭高陽才子宣
慈惠和之譽武公新邑濟河洛穎之間兼攝務殷叅
卿位重王徽之任達國士升車劉簡之博聞中郎宮
直秩滿授遂州司戶叅軍事天開并洛地洩江源才
雄翕習於外區棟宇相望於近甸尹子爲政知陸績

於家人苦諱臨官識包咸於敷子尋遷絳州翼城令
大梁星野少澤封圻城故絳以深其官都新田以流
其惡實惟繁劇載着循良魯國有司無擅徵之事南
陽郡吏罷休沐之娛州府狀聞鄉亭頌德亦由禮讓
之化綿竹於是乎作歌風俗之夷浚儀於是乎刊石
稍遷符璽郎尋奉勅檢校鴻臚本官如故環濟要畧
掌天子之符璽劉熙釋名表京師之心腹是分麾節
式贊王侯國信不差郊迎有序遷尚書職方員外郎
夏書禹貢辨其川澤周禮職方明其物土清晨伏奏
幾承題柱之恩閑夜潔齋惟有張燈之宿詔除朝散
大夫晉州司馬尋遷長史平陽舊縣姑射靈山玉印

仍存瑤城未改習鑿齒之逢宣武三命而踐侍中管
公明之謁冀州四見而登別駕詔遷同州長史河西
輻輳渭北膏腴秦地之下邦漢京之左輔使君何以
爲政端右宜其得人江統知賢直言則陳留阮宣子
唐林薦善通理則汝南王叔度王祥糾合屈公輔之
宏材荀美逸群杜冲天之勁翮享年六十有五以永
淳元年六月二十一日終于華州之別業嗚呼哀哉
公元亨利貞文行忠信禮樂之君子儒林之丈夫當
在顏冉中求自是風塵外物友于之義伯淮與季江
同寢朋從之道鮑叔與管仲推財優游大學之中籍
甚平臺之下韜車就列化洽於二州油軾當官政成

於半刺道尊德貴而大位不躋有志無時而天年不
永卽以其年十月遷窆於鄭縣安樂鄉之西源嗣子
某官等詩禮預聞箕裘早學生則盡其養劉殷積粟
於七年歿則致其哀唐頌絕槩於九日占白鶴相青
烏鄭伯所封有咸林之采地晉侯所輅有河外之城
邑其川渭水而玉璜其鎮華山而金石香習旃旒紛
紜野田范巨卿則素車來哭韓元良則總麻設位大
夫受梁鴻之命終陪列士之墳妻子從田豫之言竟
托神人之墓嗚呼哀哉銘曰

國自東部承家北平遂荒中縣奄有神京時逢日薄
運改天正二王之後三代之英其惟宗惟祖有典有

則大魏將軍隆周柱國於穆顯考其儀不忒禮樂宣
風閨門表德其五才鍾秀百福與賢蜀都會子漢代
顏淵公之廣學其積如山公之大辨其流如川其親
則廊霍地居周鄭人物會同歌謠興盛設官外職天
子有命束髮登朝叅卿軍政其江漢之表河汾之都
禮優懸榻任重前樞六璽爲貴皇天降符九州爲廣
益地開圖其平陽土守下部風俗秦晉閭閻山河軌
躡緹油之化海沂之曲始聽鷄晨行復驥足其龜長
筮短吉往凶來賓朋永訣徒御相哀華館無家玄堂
不開青龍水曲白馬車廻其漠漠古墓郭門之路槭
撼寒桐平林之東天光少日地氣多風凡生物而必

死唯君令始而善終八

楊盈川集卷六

盈川集卷六

十四

楊盈川集卷七

神道碑

唐恒州刺史建昌公王公神道碑

王氏之先代爲佐命秦之霸也則王離滅楚國而三將連衡漢之興也則王陵誅項籍而五侯同拜南陽克定應圖讖而作司空西晉聿興合詞誼而濟天下昔者伊尹伊陟但保乂於商朝太公桓公唯夾輔於周室蕭何之後居食祿而無聞鄧禹之孫在當塗而不嗣未有夏殷三統金木五遷冊命重光軒裘代襲則我瑯琊之郡有冠蓋之里乎建昌之縣有公侯之子乎公諱義童字元稚其先瑯琊臨沂人也永嘉之

末徙于江外皇運之始遷于五陵今爲雍州萬年人也祖僧興齊會稽令梁安郡守南安縣開國侯祿位千石珪符五等營室迺於羽儀山河入於盟誓父方賒梁正閣主簿伏波將軍梁安郡守隋上儀同三司以惠和之德有文武之才伏波將軍從征等於馬援儀同三司開府均於鄧騭家餘積慶郡不乏賢代臨本州則元賓之父喜形於色繼爲太守則張翕之子迎者如雲自齊國遜位於梁庭及隋人內禪於皇室夏禹之鼎寶命集於周朝御龍之家世祿歸於范氏公台階茂緒昂宿精靈五百歲之賢才一千里之皇佐忠規武節學府詞林元方闔門敬其有德少游

里稱其善人實惟清廟之器是曰皇家之寶韻諸金石奏虞庭之八音德合珪璋列塗山之萬國黃河一曲之水莫測其源赤城千丈之巖未階其峻群童忽聚綴帛而引旛旗父老相呼授履而傳兵法隋授左勳衛率非其好也河東離析海內風塵天子溺於膠船諸侯問於金甌能扶天下之危者必據天下之安能除天下之憂者必享天下之樂我高祖神堯皇帝就之如日望之如雲發三河之雷電平四海之曆象武王之仗黃鉞一月臨於孟津高帝之執朱旗五星聚於東井公瞻烏于屋射隼于墉陳平則間行而去楚酈生則長揖而歸漢奉符繫組觀軹道之降王偃武脩文見山陽之散馬初拜車騎將軍稍遷右屯衛將軍錄有功也考於周典崇德報功稽於春秋策勲舍爵車騎萬隊備涼土之羗戎衛軍千兵掌京師之屯禁于時天保初定邊方未輯二十八舍尚有吳越之妖氛一十三州猶積東南之殺氣武德四年詔公爲江南道招討使鼓琴而送受命而行乘使者之轡車掌行人之旌節陸賈至於南海先責尉佗隨何入於九江即徵黥布詔除泉州都督封建昌縣男食邑三百戶斗牛星象舜禹精靈境接東甌地隣南越言其寶利則璫瑁珠璣叙其風俗則丹雘白犬公門容駟馬位列三刀防薏苡之譏嫌絕簡書之流謗豈知

廣州清節酌貪泉於石門合浦神君返明珠於漲海
貞觀三年詔還散騎常侍行果州刺史授期天帝肇
跡入皇南充國之舊都西巖渠之古邑岡巒紛糾天
彭雙闕而作門珠貝浮沉巴水三廻而成字公入叅
師友出居方伯金蟬石貂朱旗曲蓋纔臨蜀郡卽聞
來暮之誦初踐益州已聽中和之樂七年詔遷銀青
光祿大夫行恒州刺史西街畢昴比嶽恒山天開太
一之官地列并州之鎮境分靈壽魏將樂羊之所封
邑對行唐趙王惠文之所築公政成朞月風行萬里
鄧晨一郡漢帝稱爲主人李廣數年匈奴號爲飛將
行賞計日郭伋不負於童兒郡異中平王觀無私於
任子旣導德而齊禮亦勝殘而去殺三木在殿將拜
鄭弘兩鴈隨車坐悲虞國享年若干以十五年冬十
一月二十五日薨於洛陽之清化里公家傳將相世
有忠貞屬離亂之弘多值風雷之草昧河宗兩日負
鼎而謁成湯渭水七年垂鈎而逢西伯將軍再命刺
史三遷仲高樂巴牧人之良翰龐參虞詡將帥之宏
規立事於當年揚名於後代兄國印穀州刺史弟國
稀仁州刺史荆枝擢秀棣萼生光何止平輿之二龍
是爲賈家之三虎唐虞之際四岳分居趙魏之間八
男爲郡公雖敷叅絡構位摠班條金玉昆良固廣
宅而能吐食下士倒屣迎賓無笑客之美人有稱實

之童隸策名委質善始令終生當封侯克成丈夫之志死而可作無忘事君之道越十六年二月二日葬于伊闕縣之萬安山詔賜雜物百段給儀仗往還禮也亭連長樂城枕高都守闕塞者汝寬適伊川者辛有北瞻洛汭尚想元凱之境東望邢山依然國僑之基夫人陽翟縣君河南褚氏卽太常卿陽翟康侯亮之女中書令河南郡公遂良之妹也宋公子之流派褚先生之苗裔弘夫人之禮傳淑女之詩有文在手歸於魯國有鳳和鳴適於陳氏邑之石窳縣以封丘夫尊於朝妻貴於室仙人暫別初悲寡鶴之聲寶劍纔分終合雙龍之氣以某年月日薨於某所越某年

月日祔建昌公之舊兆長子師本太穆神皇后挽郎襲建昌公歷韓王府祭酒岐州司士叅軍定州安喜縣令譽聞州里學富丘山以卿子而爲郎以象賢而開國朝遊楚澤暮宿燕宮東臨石柱雍爲積高之地右會長星唐是中山之邑出遊隣國不以陪臣見朝上謁邦君不以屬官相待洛陽朝覲適見雙鳧東都墓田行悲駟馬以年月日終於某所越某年月日即陪葬於先兆次子師表左千牛備身遷尚輦直長歷許州臨潁博州棠邑滄州樂陵縣州萬安果州西充五縣令能傳祖業克嗣家聲有言偃之文章兼侍由之政事晨陪紫極繞鈎陳之六星旦奉黃麾屯玉車

之千乘至若繁昌土宇魏文帝之堦壇堂邑隄封漢
陳嬰之侯國河分九道渤海東臨江派五津崑崙北
指莫不愛人以禮爲政以德鍾離意之禁暴不用尺
刀公孫述之有神能持五縣次子師玄雋州都督府
嘉徵縣次子師楚夔州都督府雲安縣令芝爾有
秀羔鴈成行滇北數十尹莫大邛都之縣邑東七百
里唯有巫山之峽言其縣職黃龍入於闕門叙其宰
人鸞鳥翔於學舍咸能生盡其孝喪盡其哀積粟萬
鍾思負米而何得棣題三尺泣吾親而不見卜其宅
兆麟鳳匝其岡巒陳其簠簋春秋變其霜露思傳舊
德式建豐碑戴安道作頌於鄭玄蔡伯喈披文於郭
泰魏武皇讀而稱妙非所望焉夏侯湛見而陋之固
其宜也銘曰

厥初兮后稷導生人兮知稼穡降及文王精翼日兮
袞青光平東遷兮郊廓晉上賓兮帝鄉秦三將兮繼
代漢五侯兮克昌比琅山兮峻極等淮海兮靈長惟
祖考兮鳴盛佩金璋兮疊映彼山川兮降靈生玉樹
兮青青成張良兮昂宿乘傳說兮箕星出忠兮入孝
武緯兮文經陳嘉謨兮制千里摘藻思兮揆天庭有
隋兮一崩兮瓦散皇運兮權與人神兮攸贊直
笙鏞兮變響屬天地兮貞觀河兩日兮事殷井五星
兮歸漢帶長劍兮曄曄擁幡旌兮照爛周命兮一新

雲雷兮尚屯，控東南兮荒景。負江海兮未賓，陳禮樂兮命使。動轆車兮麟，麟用虵符兮澤國。頒武節兮山人，專一方兮革面。重九譯兮稱臣，天重兮星紀。地連兮交趾，山草樹兮潛移。蜃樓臺兮鬱起，遷合浦兮太守。爲廣州兮刺史，臨漲海兮明珠。飲石門兮貪水，俯冲天兮八翼。代出身兮萬里，全蜀兮奧區。枕印笮兮倚巴渝，有靈臺兮古跡。有完國兮舊都，豐貂兮左珥。介士兮前驅，濬三刀兮持節。昌兩日兮剖符，降鳴鳩兮大夏。騁神馬兮長衢，畢昴兮分野。蘭堂兮四下，漢皇帝兮國都。耿將軍兮壇社，若恒山兮詔鄧。猶朔方兮命賈，李北平兮漢飛。郭并州兮竹馬，瞻太階兮坐躡。惜天年兮不假，伊天姓兮潁川。有美人兮嬋媛，桂生兮因地。女嫁兮因天，見乘龍兮奕奕。覩飛鳳兮翩翩，知蘧瑗兮有禮。笑虞丘兮未賢，始銜悲兮晝哭。終共盡兮千年，卜龜謀兮習吉。陳旨酒兮嘉粟，車徒儼兮在門。旌旆紛兮竟術，循洛橋兮南渡。從國門兮右出，樹蕭蕭兮有風。雲慘慘兮無日，指丘陵兮一閑。與天地兮相畢，悲孝子兮純深。孰憂思兮可任，訴高天兮泣血。踏厚地兮崩心，樹碑兮神道。無媿兮詞林，歷陽之都兮水沒。圓嶠之海兮山沉，俾外孫兮幼婦。生白玉兮黃金。

成氏之先有周之後姬文受命三十八王邴伯象賢
二十一代漢之少府國家維城晉之廣楊王室藩屏
公諱知禮其先上谷人也子孫避地徙于某曾祖休
寧後魏汾州刺史齊特進左右衛大將軍宇文朝江
州刺史隋成陽郡公謚曰武勳格皇天澤充區宇該
備寵榮兼包命賜祖少遐北齊民曹郎中宇文朝地
官上士襲成陽公建國之屬以訓五品以親百姓父
綽隋金紫光祿大夫唐深州刺史上柱國天子大夫
金章紫綬天王使者皂蓋朱輪公誕保靈和受茲介
福講之以學合之以和純粹以積其中文明以宣其
外出於口者必是先王之言萌於心者莫非君子之

德戒慎乎其所不睹恐懼乎其所不聞豈時止時行
左宮右徵在朝濟濟在家雍雍祗服弘業克丕堂構
襲成陽公歷箕州平城洛州邯鄲二縣令武鄉里閭
榆社隄封公宰平城日宣三德悲歌相聚袷服成群
公宰邯鄲雷震百里儀刑嘉誨範乎人倫令聞廣譽
塞乎天壤將蹈九列平三階豈意大和交薄而天道
難謀降年不永春秋若干以某年月日終於某所夫
人宜城縣主聖神皇帝之堂姊王姬外館之長女夫
人道峻於閨房名輝於邦國我周叙洪範作武成大
賚而萬姓悅垂拱而天下理法號惟舊制贈荊州刺
史生則唐竟不用歿則周武追封篤麓爲光有始有

卒立名於後以顯其親反葬於周不忘其本以某年
月日歸葬於碣石恒山燕南越北禮儀光被宗族相
臨大夫吊桓子之喪天子歸惠公之貽籛瑗之葬不
害良田孔丘之塋不生荆棘長子司衛少卿兼檢校
魏州刺史大辨中子左鷹揚將軍大方少子朝議大
夫行司漢主簿大蛇等門承四代德盛三賢有終身
之憂盡生人之本璽冊褒贈宜宣無窮景鐘勒銘若
古有訓嗚呼哀哉其銘曰神岳之英大川之精如山
之峻如流之清行之斯立言之斯成登車發耀在邦
有聲傳於舊國舊國惟平宰於二縣二縣惟寧余聞
舊說天降孔明誰謂靈誕喪落淑真永錫不匱克揚
其名冊書光寵沒有餘榮系曰列星垂象兮炳天光
白露爲霜兮沾人裳彼蒼天兮殲我良列星垂象兮
炳天暉白露爲霜兮沾人衣九原可作兮吾與歸

益州溫江縣令任君神道碑

漢丞相之尊官大位乘輪滿於十人齊景公之利用
厚生有馬盈於千駟羽旄冠劍擬金鳴玉壘其前苑
圍池臺清歌妙舞喧其後崇高在於寵祿大欲存於
食貨義然後取橫玉帶以當仁道不虛行坐鹽梅而
自得若乃時之不與數之不通貴賤任於天窮通由
於命左太冲之詠史下僚實英俊之場嵇叔夜之著
書賤職爲老莊之地雖復勢力以高下相懸尊卑以

商周不敵孔宣父中都之小宰幽厲多藉於陪臣陳仲弓太丘之一官公卿有慙於縣長是以德成者上道在斯尊陶潛則安枕北窓言偃則鳴絃東武抑揚足以儀四海顧盼足以破三軍代有人焉於斯爲盛矣君諱晃樂安博昌人也其後因官遂家蒲州之永樂天子令德軒皇爲誕姓之源諸侯計功薛國在宗盟之後西京執法則有御史大夫東漢循良則有會稽都尉任光鄉里之忠厚任隗朝臣之鯁直益州從事術數知名臨海真人清貞克己况乎東西海岱強齊九合之都表裏山河全晉三分之國車馬雷駭衣冠鼎盛盟書百代可謂功臣遷徙丘陵實惟豪族曾

祖顯祖熙考憬並策名天爵獨步人師懷素履之幽貞保黃裳之元吉張家碑碣荊州有七代孝廉荀氏鄉亭潁川有八人才子君外資剛健內育文明合千載聖賢之間鍾五行金木之秀王恭濯濯春柳懷風和嶠森森寒松列景有曾參之孝有史魚之直有子夏之文有冉求之藝先王德行固名言而在茲大聖溫良亦顛沛而於是當朝一見許其王佐之才行路相逢知其美人之贈解褐爲家令寺主簿天王太子之位赫赫前星天地長男之宮巖巖左闕出身事主元良永固於萬邦束髮登朝七鬯不驚於百里秩滿授將作監主簿千門萬戶張華窮壯麗之圖東主西

賓班固盡誦誼之實職掌宮觀是名將作大司馬
温之府績用在於元琳大將軍實憲之曹文章寄於
亭伯累遷右衛長史南京左掖上將陪藩北落師門
天軍列衛東觀漢記梁統有清白之名中興晉書薛
兼有恪勤之譽詔遷朝散大夫行益州温江縣令華
陽西極漢水東流背函通秦越之鄉左右夾巴涼之
地風烟可接懸車束馬之山雲物游通織女牽牛之
象神仙所宅則有二十四層險路所經則有五千餘
里金城石郭還聞上代之風國富人安時聽中和之
樂於是乎龍泉獨斷龜旋旁求品命千名封疆萬戶
暫過云亭乘軒之望可知且詣中軍理劇之才有屬

旌孝悌勸農桑省徭役恤鰥寡所以一縣稱平所以
百城尤最蕭育是杜陵男子不入後曹黃浮非鄉里
所知不寬同歲洛陽行馬門士無心齊國池魚權家
絕望鄭文公邵陵之縣但稱男子之名師尚父灌壇
之鄉惟有神人之哭實謂樞機八座上下三階豈惟
縛柱鞭絲操刀製錦巫馬期之任力弊起乘星鍾離
意之悅人災生解土享年五十有九以儀鳳二年六
月二十五日卒於官第夫人姚氏徵士神人之女也
壽丘仙葉媿水靈苗定姚信之機衡審姚光之術藝
明星談談不臨太丘之前暮雨沉沉不散巫山之曲
婦人謂孝女子有行織絀組紉束脩榛栗南斗千齡

之匣忽愴沉江北方三代之儀終悲其穴先以咸亨三年七月二日終西京翊善里之私第越儀鳳三年冬十一月一日歸祔於永樂縣歷山之平原卜虞芮之閑田帶關河之設險居人致祭桐鄉有朱邑之祠怪力成墳葉縣有王喬之墓君燕趙奇士神仙中人容貌魁梧衣冠甚偉楊子雲之窮巷好事來遊段干木之間居通侯展敬自陳力就列居家可移妾本絕於織蒲馬無聞於食粟原子思之厚秩徧給鄉人孔文舉之中罇延留坐客加以徧觀圖史尤精釋教夢幻泡電知一切之皆空園林貨財見三陽之已淨遭時屯坎浮生蹇剥佳人不再荀奉倩之傷神赤子無

期潘安仁之慘慟天乎到此命也如何及其瞑目少城歸魂舊壤平原古樹惟餘孺子之墳春露秋霜非復臯繇之祀於是鄉鄰作主朋友加麻撰德銘之於素常披文刻之於翠石魯哀公作仲尼之誅天不愆遺蔡伯喈爲有道之碑人無媿色其銘曰

軒帝之族漢朝之臣西州智士東海真人豪傑天縱衣冠日新實生其德必有其隣道在爲貴知機則神氣冲南斗價直西秦大蒙之信太平之仁辨窮非馬學究成麟孝友爲政觀光利賓重朋比德四海爲春宮室之象南斗北辰甲兵之衛閭闔鈞陳山控金馬江迴玉輪天文井絡地紀梁岷庭前置水甌内生壘

困蠶生繭野雉來馴時命屯蹇生涯苦辛
玉樹長淪厚德無輔清仁不親百年天枉一旦歸真
雷鳴之下長河之濱旌旆委鬱徒御逡巡悲風泪起
血下霑巾死而可續人百其身

原州百泉縣令李君神道碑

金城裂地之灾玉弩驚天之禍蹴崑崙以西倒蹋泰
山而東覆三微歷數盡薰歎以聲沉萬國衣裳咸土
崩而瓦散是故殷憂啓聖聖人騰海岳之符草昧興
王者受風雷之祉則有思窮圖識潛觀赤伏之萌
洞識機祥暗察黃星之兆天懸兩目詢去就於河宗
地震三州考興亡於柱史危邦不入亂邦不居剪荆

原州集卷七

十三

棘而叩天門臨壇塲而對休命及其玄黃再造日月
重輪功成而不居名遂而身退南華吾師也親居賤
職東方達人也安乎卑位然後武城絃唱優游禮樂
之中彭澤琴樽散誕羲皇之表雖杜當陽之文武蘭
亭恒存而薛孟嘗之池臺風烟遂歇悲夫死生命也
貴賤時也用之則行舍之則藏出處者君子之恒務
左右之攸宜吾聞其語矣今見其人也君諱楚才衛
州衛縣人也昔繞樞神電軒轅氏之馭百靈貫月祥
星顛頊氏之臨四海金科作範商丘有帝系之雲玉
札披圖幽谷有真人之氣由是公侯策命歷千載而
彌昌鐘鼓歡娛經百王而不替豈直將軍列位孫吳

暗合之兵協律當官天地冥符之樂若斯而已矣禮
祖裕後魏東宮舍人太子洗馬使持節徐州諸軍事
徐州刺史燉煌郡開國公贈交豫二州刺史真城西
望高闕東臨非無置驛之歡實有前軍之寵瑯玕負
海八門都督之榮王彰潁河百代封侯之貴大父昌
北齊彭城王府中兵叅軍事隋濟陰郡公策封燉煌
公文塲筆海炤爛等於星辰班固談叢鏗鏘協於風
雅九千里之丹鳳始踐王門七十日之黃龍初階郡
職考孝友隋晉州岳陽縣令顏回稱太平王佐月角
殊姿仲由稱禮義霸臣星衡詭狀唐都晉野有恒山
大嶽之風墨綬銅章有錯節盤根之化若夫千公之

宅駟馬高驅辛氏之門五龍齊駕英靈不已還當命
代之期將有後徵克保承家之業東郊競日探祕跡
於機衡西蜀談玄測靈心於造化雄才壯思首九奏
而和八音廣見洽聞披五車而誦三篋加以興居禮
樂出入孝忠簡於一人備於萬物弓旌疊奏始命賢
良幣帛交持載徵巖穴從徵至著濫觴萌括地之波
積小成高覆篋漸排雲之構隋大業十二年補謁靈
臺散從真外郎非其好也屬千三否運百六災年諸
侯窺玉鼎之尊天子厭金陵之氣蚩尤則命風召雨
桀黠於中州共工則折柱傾維崩騰於海縣能扶天
下之危者必據天下之安能除天下之憂者必享天

下之樂我高祖神堯皇帝所以從人望宅靈心振天
關迴地軸鼓聲雷駭親張霹靂之威旗羽星懸手握
招搖之柄君冲情索隱妙筭知來候東井而考前聞
裂西河而尊故事上略中略奏山石之奇謀文韜武
韜奉川璜之秘訣義寧二年授車騎將軍累加開府
武德五年遷右衛二十四府右車騎將軍仍於邛州
鎮守皇階甫闢猶勞尉候之虛天步初夷尚有風塵
之警示之以文德陳之以武功所以夜戶不扃所以
重門罷拆六年轉仲山府左列南州舊俗淫其白獸
之祠西棘餘眈背我黃龍之約王師直進陵劔棧以
長驅廟路遐宣指銅丘而決勝七年詔君討襲楓天

棗地金門玉帳之營方卦圓著剝木弦弓之射以此
衆戰誰能敵之以此攻城何城不克雷出而星曜龍
騰而鳳飛一鼓而擒四姓三戰而平百濮大夫耆老
非惟二十七人拓土開疆豈直五千餘里返行飲至
拾爵策勲焉禮也其年加上大將軍賞口十六人并
良馬一疋而俄以爭功得罪游俠從軍特降王綸還
遷騰府通塞有命潘安仁之緒言富貴在天卜子夏
之論無階封禪空嘆息於周南絕望夏臺竟棖遲
於漢北太宗文武聖皇帝承聖皇之大寶奉天帝之
休期雷雨八瀛光華四極旌賢赦過惟新之命屢覃
念功簡勞惟舊之恩累洽貞觀元年授長樂監仍命

於北門供奉宜春禁苑太液神池浸石菌而揚波
金莖而挹露南經丹徼恒陪萬乘之遊北統黃山再
奉三驅之禮當是時也穆穆焉煌煌焉濟濟焉鏘鏘
焉一陰一陽而有序自南自北而無外猶復中宵不
寐殷勤多士之林晷景忘疲渙汗非常之辟十四年
應詔四科舉射策登甲第明於國家之大體達於人
事之始終可謂宰相之璞可謂皇居之寶洛陽才子
一承宣室之談魯國儒生行踐中都之邑尋授靈州
鳴沙縣令累遷原州百泉縣令科通紫微印負黃州
涼秋九月寒沙四面平雲匝隴處處而秋陰圓魄低
開蒼蒼而夜色君乘輜演教佩紱臨人德被三城風
移五縣抽琴命操還臨單父之堂繫石飛鳴即對李
泉之學明以御下將水鏡而通輝清以立身共米壺
而合照神行有感方登玉鉉之階靈化無方獨嘆瓊
棺之墓春秋七十有一以顯慶元年十二月八日終
於官舍君年十一丁內艱朋友相哀家人不識昔稱
曾閔今日苟何近古以來未之有也隋郡東曹掾江
溢見而嘆曰此真可謂保家緯化嗟尚者父之大業
末年皇綱漸紊不掃一室自懷包括之心獨守大玄
且忘名利之境千時魏特進房僕射杜相州等並以
江海相期烟霞相許付同心之雅會訖刎頸之良遊
或閉戶讀書累月不出或登山涉水經日忘歸斯賢

達之素交蓋千年而一遇洎塵埋五岳海沒三山離
殷而奉周皆楚而歸漢深謀遠慮即良平無以加也
行軍用兵則彭韓不能尚焉數竒命蹇遂無望於高
門日往月來竟消聲於下邑情均寵辱則萬象同歸
跡混彭殤則百齡俱盡浮生若寄大漸彌留遺誨子
孫庶幾薄葬等梁鴻之宅兆邈矣他鄉符祭仲之高
居依然新鄭唯仁與達君其有焉存榮沒哀此之謂
也即以某年月日葬於某原夫人廣平宋氏齊尚書
左丞士順之曾孫隋建安郡司法長文之季女霜淒
月瑩菊艷茗華淑問秀於閨房柔風治於詩禮琴前
鏡裡孤鸞別鶴之哀竹死城崩杞婦湘妃之怨長子

金河府校尉上柱國輔仁等十輪方駕萬石駢衡窺
上帝之兵鈴入先王之冊府指蒼天而永訴血不霑
襟對白日以長號悲來填臆於是縵麻執友素蓋賓
朋傳祉德於高陽考豐碑於太學庶使城隍一變猶
知窆艾之名陵谷三遷尚識鍾繇之字其銘曰
玉斗之英瑤光之精巡河并洛握紀提衡柱史論道
將軍用兵陸離簪紱奕葉公卿嶽牧騰譽弦歌有聲
階蘭疊影巖桂增榮山澤通氣風雲表靈凝脂點漆
月角珠庭白玉無玷黃金滿籬忠爲令德孝實天經
朋友千里烟霞百靈琴鐫野尚松竹山情數屬郡海
時逢闈星黃龍電震白騎雷驚赫矣高祖元亨利貞

聖人有作天下文明自北提劍因茲問行攀麟北海
附翼南溟水火之陣孤虛之營左提右挈東討西征
巨猾斯斬元寇載清功符衛霍知若良平自滿知損
居中忌盈蕭條異縣坎凜浮生降以中旨賓於上京
陳書詣闕對問揚庭山連鴈塞野接龍垌朞月而已
三年有成波瀾不息箭刻無停梁木其壞高臺已頽
斷絕隴鴈飛鳴頓雙鳧於葉縣躅四馬於滕城

楊盈川集卷八

神道碑

瀘州都督王湛神道碑

惟漢高祖應天順人祭蚩尤於沛庭斬大蛇於豐澤則豐沛之蒙傑乘於雲矣惟漢光武龍飛鳳翔舉新市之八千破王尋之百萬則南陽之佐命動於天矣我高祖神堯皇帝以唐侯而建國從晉陽以起兵協和萬邦光宅天下則太原之衣冠有大勳矣公諱湛字懷元太原晉陽人也十一代祖卓晉給事中母常山公主河東有湯沐邑因家焉葬於長壽原故鄉有太原之號皇業伊始公以中涓從事賜田鄆杜間今

為雍州人也昔武王定於下人太子賓於上帝基鄩鎬而開國籍神仙以命氏霸則司徒所讓位天子所不臣相則孝弟於閨門務學於師友豈直橫江斬將南登建業之臺土食金溝北徙邛山之宅自茲厥後數百年間國移三統周人共推其代祿家徙五陵漢朝不易其冠冕曾祖宗邁後魏中書侍郎彭城王府司馬周春官大夫都督晉陽侯祖亮本州主簿司木上士隋贈信州刺史大名華於東魏天命集於西周宗伯所以辨其儀林衡所以平其守父綽秦孝王府掾仁壽宮監離石郡通守晉陽侯皇朝石州刺史逆賊劉武周攻陷郡城因而遇害贈代州總管謚曰烈

侯禮也天造草昧王業艱難周師纔至於太原胡兵
遂入於離石負尸而汲不能定西戎之禍折骸而甕
不能解南楚之圍仁者殺身以成名君子有死而無
貳公承聖賢之末代屬喪亂之弘多天子乘輿方靖
秣陵之氣諸侯斧鉞莫救驪山之烽國有命而何言
邦無道而斯隱大業之季本州察孝廉非其好也高
祖乃操斗極拜圖書再駕臨於孟津五星合於東井
公解衣而濟策杖而行酈食其之長者逢漢祖而長
揖袁耀卿之茂才見曹公而不拜從平霍邑授金紫
光祿大夫入長安加左光祿大夫歷丞相相國二府
典籤叅軍事高祖受禪擢爲通事舍人通直散騎侍

郎封金水縣侯食邑七百戶稍遷虞部郎中丁烈侯
舉去職尋起爲隴西別駕商郎二州刺史上柱國荆
州大都督府司馬冀州刺史定其封邑誓以河山蕭
相立功於萬代留侯決策於千里願持一郡洛陽之
任耿純兼攝八州江東之拜陶侃龍朔三年遷使持
節都督瀘榮溱珍四州諸軍事瀘州刺史江陽縣地
瀘水提封叅伐下而爲益州岐山上而爲井絡尺兵
再戢黃昌兩日之歌繁水斯來景伯三年之化功成
露冕歲及懸車歎踈廣之知足慕祁奚之請老乾封
二 年上書乞骸骨詔公祿賜同京官仍朝朔望天子
歷吉日協露長郊上玄祀清廟詔公行太尉事國之

大事攝在有司蒼璧黃琮六玉以昭天地路鼓陰竹
尤變而祠祖考名遂身退居常待終山川則群望並
走星象則中台夜拆春秋九十有三以咸亨三年七
月十七日薨於京師永崇里謚曰敏喪事官給賜物
三百段粟三百石葬日車服往還有司監護公幼鍾
備罰毀瘠過人八歲讀書至無母何恃廢書慟哭殿
血數升逮事繼親孝聞州黨恩深母子比王元之事
親夢感夫妻等衡卿之至孝年纔一紀有若成人吏
部薛公見而稱歎潁川之司馬德操早知劉廙譙國
之夏侯泰初深歎樂毅兵次霍邑力戰有功高祖嘉
之賜良馬一疋進圍京城爲伏弩所中高祖臨視賜

物三百段流血及屨未絕鼓音左輪朱殷豈敢言病
武德之始奉使嶺南馮盎等稽首稱臣獻琛奉贄舍
人薛卓遇害北庭詔公責問單于謝罪賜黃金五十
斤雜絲二百段南踰漲海北度陰山太中大夫去尉
佗之黃屋高車使者作匈奴之鐵券離石之難也枕
干而寢見星而行號泣不絕聲者千里水漿不入口
者數日同武陵之任襲入構諸羗異河內之張武空
持遺劍吳遠由其得銘王哀以之攀栢冀州境內舊
多淫祀寨帷按部申明法禁詔書遷秩百姓舉車立
廟生祠樹碑頌德亦猶樂巴典郡山鬼潛移張禹牧
州江濤不起公出身六十載遺愛二十州遂罷方岳

之官仍居上台之位始於撥亂伊尹之輔成湯終於
太平軒轅之得風后然後拂衣高蹈躬覽載籍著遺
誠十八章盛行於代法文王周易之變象尼父孝經
之篇窮性命之理盡天人之際莊周著論生也若浮
史佚立言沒而不朽越文明元年二月十七日陪葬
於獻陵禮也長子朝散大夫行扶風令遐觀等生芻
一束泣血三年不踰聖人之禮能行大夫之孝京兆
載開其新阡昆吾用昭其舊德百年宮室宛在章臺
之東五校軍營依然茂陵之下其銘曰

昔在湯武阿衡尚父下及高光蕭何鄧禹皇天眷命
赫矣高祖惟岳降神克生元輔攻城野戰張飛關羽
奇策密謀苟攸賈詡始陪營衛仍參幕府旌節龍沙
軒旗象浦出臨方岳入調風雨其生也榮池臺鍾鼓
其死也哀陳兵復土孝乎惟孝無父何怙刊石勒銘
永傳終古

唐右將軍魏哲神道碑

天經地緯之帝求制禮作樂之才撥亂反正之君資
拔山超海之力繼韶夏而崇號謚非無陣戰之風披
皇圖而稽文武或用干戈之道故能彌綸宗廟彈壓
山川苞四海以爲家一六合而光宅是以二十八宿
懸列將而察休徵三十五星聚天軍而赫符彩呂望
垂竿於渭涘道峻匡周張良授策於圯橋功崇佐漢

乃有心如鐵石氣若風雲洛識書名河圖秘象
雷燭歷大塊以三休碧羽霜姿倚渾天而一息岑彭
許允征南鎮北之名馮異王昌大樹中軍之號杜太
行而泥函谷猛氣無前戮封豕而斬長鯨雄圖不測
元戎十乘驅衛霍於前軍甲士三千列孫吳於後殿
秋風白露執金鼓而齊六軍太山黃河折銅符而光
百代建廟堂之策為社稷之臣孰能與於此乎在我
真將軍矣公諱哲字知人鉅鹿曲陽人也七代祖靖
非前秦征北大將軍鎮北地上郡其後子孫因家於
寧州襄樂縣開國承家之始誕姓名氏之源大名發
於本支當奎峻於層構三辰鬱鬱天街分畢昴之都

九野茫茫地險列山河之境丞相以萬機論道匡大
運以震威嚴尚書以八座當官贊金行而標領袖文
昭武穆方駕齊驅公子王孫朱輪華轂大鵬再翰馭
風伯而指南溟天馬騰姿偶雲師而集東道祖唐隋
天水郡丞河陽都尉瑤林瓊樹擢標格以千尋圓折
方流委波濤而萬頃雄飛有望豈惟京兆之丞陰德
不德何直丹陽之尉父寶皇朝通議大夫總管府司
祭軍事東家孔子至德生於上天南國申侯明靈誕
於中嶽君升朝翊贊道先王之法言公府弼諧對上
天之休命若夫聖人作而萬物覩元首明而庶事康
日月粲其光華山川鬱其雲雨則有英靈間出丹陵

諧白獸之祥符瑞。誕生黑帝。感蒼龍之傑。隋珠一寸。魏后楊眉。和璧千金。秦王動色。顏生殆庶。聞於竹馬之年。楊子叅玄。發自銅車之歲。建情峯而直上。疏筆海以橫流。彫墻則百堵皆興。峻宇則千門並列。可大可久。無忘簡易之途。爲子爲臣。率由忠孝之境。郭林宗之披霧。豈敢名言。孔文舉之欽風。每相推薦。若乃五材並用。諱能去兵。七德兼施。止戈爲武。出師於九天之上。暗合兵書。取法於十日之前。懸符射法。固以文武之道。掄揚滿於域中。將相之才。籍甚聞於海內。貞觀十五年。起家補國子博士。喬林掃日。驚白鳳於詞條。壁水澄天。駭彫龍於義壑。班超慷慨。常懷萬里。

之心。季路平生。每負三軍之氣。十六年。勅授左翊衛北門長上。祿賜同京官。仍令爲飛騎等講禮。鄧司徒之舊事。馬上讀書。祭征虜之前。聞營中習禮。宮花如錦。還臨拜將之壇。槐葉成帷。復對闕軍之市。自皇王眷命。大帝應期。運璇衡而制八方。調玉燭而臨四極。玄菟白狼之野。來奉衣簪。蟠桃折木之卿。尚迷聲教。太宗文皇帝。操千極。把鈞陳。因百姓之心。問三韓之罪。勝殘去殺。上馮宗廟之威。禁暴戢姦。下籍熊羆之用。公丹心白刃。本自輕生。六郡三河。由來重氣。烏江計逆。剖項籍於五侯。鹿野懲奸。磔蚩尤於四宰。二十年。詔除游擊將軍。右武侯。信義府左果毅都尉。長上。

如故顯慶二年以內憂解職痛深吳隱哀極顏丁躋
厚地以崩魂訴高天如泣血紫泥垂渙頻降璽書墨
綬臨戎遂從金革三年詔除左衛清宮府左果毅都
尉尋圍谷府折衝都尉並長上如故又以應詔舉對
策甲科遷左騎衛郎將于時長榆歷歷烽火猶驚高
柳依依邊風尚急關山夜月遂爲胡虜之秋西北浮
雲翻作穹廬之氣四年詔公爲鐵勒道行軍總管陳
兵玉塞按節金微學常山之蛇擬麗譙之鶴鍾鼓嘈
噴上聞於天旌旗繽紛下蟠於地伏尸百萬因瀚海
而藏舟闢地數千即燕山而築觀武臣雄略氣懼西
零神將宏圖威加北狄麟德元年詔遷左驍騎中郎

將尋檢校右監門左武衛將軍本官如故昔者封禪
陟雲亭之後七十二君圖書出河洛以還三千餘歲
振兵釋旅方崇薦帝之儀道洽功成必致禋天之禮
粵以皇家闢統之五十年今上開基之十七載登封
告禪玉謀金繩建顯璫而施尊名揚英聲而騰茂實
華夷輯睦皆承萬歲之恩朝野歡娛咸奉千年之慶
乾封元年詔加明威將軍本官如故大風遺孽叛煥
青丘小水殘魂憑陵碧海率百官於文祖尚典彭蠡
之師會萬國於塗山猶有防風之戮是歲也詔公爲
遼東道行軍總管軍營對日兵氣橫天開玉堂而按
部坐金城而勒陣關鞏之甲犀兕七重餘艘之松楸

鱸千里駕鼉梁於聖海秦皇息鞭石之威泛鼉鉤於
仙洲愚吏罷移山之力然後風行電卷斬將屠城塞
丹浦之遙源伐黑林之奧本王孫公子名霑阜隸之
臣深谷太山境入樵漁之固二年詔加上柱國仍檢
校安東都護導之以德齊之以刑威振六官風揚五
部兵戈載戢無勞尉候之虞桴鼓希聞寧有穿窬之
盜仰太陽而晞湛露方預四朝臨逝水而急寒風俄
悲一去齊孟嘗之下淚高榭曲池魯司寇之悲歌頽
山壞木長安眇眇還符日近之言京兆悠悠竟絕天
高之問玉關生入判自無期繡服晨還竟知何日總
章二年三月十六日遘疾薨於府第春秋五十有四

嗚呼哀哉詔贈左監門將軍禮也唯公被服忠孝周
旋禮祭仁者見之謂之仁智者見之謂之知研幾冊
府金滕玉版之書索隱兵鈴玄女黃公之法每建旗
推轂三令五申躬擐甲冑親當矢石軍井未建如臨
盜水之源軍竈未炊似對嗟來之食由是南馳北走
東討西伐運之無旁按之無下載筐宮裏遙登將軍
之階閣飛漢邊獨踐中軍之位雖龍泉匿宇薰歇光
沉而麟閣飛名天長地久夫人扶風氏隋濠州刺史
圓之孫也五松春艷牽少女之祥風八桂秋雲降仙
娥之寶魄謝家之子歌柳絮而知慙劉氏之妻頌椒
花而自耻三周按禮無虧內則之風四德揚蕤載闡

中閨之訓宿蟠龍於月鏡早沒鸞床矯飛翼於霞樓
先沉鳳穴珠星壁月終陪季子之階金鼎銀鐫竟列
齊侯之寢以貞觀十五年五月五日終於某所越咸
亨元年某月日附於某原長子瓜州司倉擇木次子
右衛親衛玄封等門傳萬石庭列雙珠花萼爭榮芝
蘭藹秀天經地義欽承避席之談日就月將虔奉趨
庭之教變槐檀而瀝膽木石悲酸伐露霜以崩心幽
明感動葬之以禮登之以時生人之本盡矣死生之
義備矣孝子之事親終矣於是門生故吏共緝家聲
才子文人思傳盛德庶使齒相如之生氣歷千載而
猶存隨武子之餘風登九原而可作其詞曰

文王受命畢公餘慶玉樹聯芳金枝疊映三分並列
七雄齊競建國承家重熙累盛功宣蹈舞德流歌詠
河洛垂文山川出雲驪珠育照虹玉呈文直立孤聳
天然不群棲選膠墊悅懌丘墳耻爲儒者自許將軍
伊祁不憚斬轅討逆陣擁遼河岳鎮碣石班超投翰
揚雄執戟弓合二才刀長四尺爰清尉侯載澄疆場
得人者昌失人者亡皇恩俾義帝曰明歟幽桂舍穫
滋蘭吐芳承天待詔觀國賓王茂績斯遠音聲彰鵬
池森漫鷄山禍亂出閭辭家夷凶靜難金微瓦解玉
亭水泮扈駕天門陪祠日觀萬邦胥悅千齡啓旦斗
骨危城占躡舉兵丸山霧塞渤海驚帝赫赫斯怒王

師有征虔劉北貌戡剪東明遵以文軌宣其德刑太
徵上將文昌貴相非熊非羆非羅令問令望寵踰軍幕榮
參武帳本謂來朝何期返莽原野蕭瑟風烟悽愴天
道如何吞恨者多松風夜響薤露晨歌秋月如練春
雲似羅縈華滅後寒暑經過青烏丘壠白馬山河

唐上騎都尉高君神道碑

南方火德陽精赫雷電之威西陸金行秋令毒風霜
之氣達其變聖人所以定天下之文象其宜聖人所
以觀天下之變或衣裳六合舞歲于而掃虔劉或鍾
鼓八紘用甲兵而誅暴亂若夫皇天失紀慧宇飛流
后土不綱山河崩竭蚩尤食石災害於生人項羽拔

山憑陵於上國天子聞鼓鼙之響思將帥以冀行將
軍屬甲冑之容攬英雄而決勝則風雲潛感豪傑挺
生得七星之武曲破軍受五運之金多木少四時繁
弱射連尹於嵒山萬辟太阿殺顏良於官渡然後達
人知足徒興白髮之歌烈士狗名不受黃金之賞與
夫棄其筆墨漢家封萬里之侯稱爾戈矛周王命百
夫之長豈可同年而語哉君諱則字弘規其先渤海
人也後代因官遂家于涇州之安定縣神房阿閤太
山橫日觀之峰金闕銀臺滄海蔽天虛之岸風土形
勝關河表裏三分六州之大業師尚父贊其經綸一
匡九合之元勳齊桓公拓其疆場高柴至德籍東魯

之聲名高鳳沉研盛西京之學校英才磊落而秀登
人物蟬聯而間起三光不墜察高星於太紫之宮八
柱無疆莫高嶽於中黃之域曾祖冲北齊鷹揚郎將
周右屯衛清宮府別將成軍夜火教戰秋風九天揚
後一之兵六合擁前三之陣張良入漢行觀滅楚之
徵微子奔周坐見亡殷之兆祖赦周褒郡南和縣長
陶元亮攝官於彭澤道莽羲皇陳仲弓歷職於太丘
德符星緯飄風驟雨不入灌壇之鄉暴武蒼鷹潛出
取丘之境考才朝議郎上開府孫子荆之天骨亮移
不群王夷甫之道心神鋒太峻議郎清秩縣符處士
之星開府崇班上接台階之位君雄心獨斷猛氣無

前用兵書六甲於自然知射法三篇於性道早圖星
象管公明懷察變之心幼識旌旗陶恭祖有行師之
畧屬隋人版蕩天下崩離朱陽夾飛鳥之雲紫極現
雄鷄之象陳兵爭戰窺玉策於中州姚石壇塲竊金
符於寓縣我高祖黃雲大帝白水真人風雷海嶽之
純精天地陰陽之正氣焞皇受命殺黑龍而定水災
漢祖乘機斬白蛇而開火運君夜觀乾象晝察人情
睿燮惑之誨誼驗嵩山之讖記關中王氣不勞甘德
之言沛國真星無待殷墟之說賊薛舉豺狼梟獍擣
杙窮奇守幽隴以行災負關河而作孽天王按劍出
軍於玉帳之前猛將分麾受律於金壇之下以蓋

二年王師薄伐趙國公長孫無忌精兵若獸利器如
霜問君以帷幄之謀待君以心腹之寄營當月暈因
八門之死生陣法天星乘五將之闢格蔭華蓋歷明
堂以我和而制其離以我直而摧其曲敗楚師於栢
舉未足權衡執秦桴於峭陵無階等級此實君之功
也其年詔授朝散大夫賜物三百段排患而釋滯功
成而不居比跡傳以辭榮追留侯之高蹈三靈革故
君子於焉待時四海清平謀臣以之歸第自太王基
命成康隆玉版之圖高帝受終文武盛金刀之業家
給人足天成地平猶勞水旱之餘尚想京坻之積咸
亨三年春奉勅於河陽檢校水運使搜粟都尉河堤

使者銅橈鐵舳蒼鷹白鶴之船竹箭桃花貝闕龍堂
之水引紅粟於淮海汎歸舟於秦晉遂使齊臣獻納
先陳不涸之名漢后絲綸即有常平之號望千石之
氣可以療饑開萬箱之儲自然知禮此又君之功也
其年詔賜上駟都尉嗟夫河流曲直天道盈虛鬼神
莫之要聖賢莫能預高臺下泣孟嘗君之惻愴可知
梁木興譌孔宣父之平生已矣上元三年春三月日
終于樂邑里之私第享年七十六惟君魁梧動俗符
彩驚人忠孝天資溫良日用一門兄弟盡同鍾毓之
車千里賓朋時命嵇康之駕每至白雲生海素月流
天未嘗不顧眄山河抑揚琴酒馮異之大樹對諸將

而無言子夏之名山謝時人以長往四林遊刃八木
忘筌能往有漏之因早得無生之法雖十年俱盡陸
士衡之長嘆有徵而千載猶生藺相如之壯心恒在
即以冬十月丁酉葬於定安東南二十里之平原禮
也陶公相宅郭璞占墳而丹鳳而背玄龜兆青烏而
徵白馬三百篇之後十筮何從二千石之榮子孫無
替長男仁獻中男仁楷少男上護仁昉等或體窮三
變潘陸不足以升堂或力敵萬夫關張不足以扶轂
有元方季方之長幼傳學詩學禮之門風金友玉昆
忠臣孝子窮號楨於心髓創鉅纏於肌骨星辰已變
昊天無報德之斯霜露潛移君一有終身之感葬之

以禮垂制度於三王思之以特別蒸嘗於四季然後
授羣賢之舊德叙潘岳之家風載遠銘北海之文張
昶刻西山之石若使鄧將軍之一見自得嘉名魏太
祖之來觀懸知絕唱其詞曰

奎闕千仞銀宮百常發揮雷雨震動陰陽山水形勝
人神會昌九州霸業賜履勤王樂只君子邦家之光
驚雷氣候大昇徵祥運屬飛海時逢吸霜中原逐鹿
西嶽亡羊漢起高帝周興太王乃披荆棘即奉壇場
國步猶阻黎元未康將軍不拜使者相望陣合星斗
兵符玉璜穢夷叛逆刷滌邊荒化穆三代時清九皇
猶思禮節尚試堯湯漕道淮海水泛舟航蒼鷹鷓鴣

累員龍堂功立身退懸車杖鄉百年俄頃萬緒悲涼
昔時華屋今日玄房平天慘慘半月蒼蒼地謂西部
山言北印曲池無處松檟成行

唐昭武校尉曹君神道碑

君諱通字某其先沛國譙人也近代因官遂居于瓜
州之常樂縣故今爲縣人馬顥頊高陽之子孫曹叔
振鐸之苗裔山河白馬漢丞相開一代之基譙沛黃
龍魏武帝定二分之業承家卹胤嶽峙星羅居雍州
之西境斷匈奴之右臂門容駟馬旌旗玉塞之雄坐
列三貂人物金行之秀祖某隱居不仕父顥豈寇將
軍河庭寶玉廣智鸞鳳或閭閻之內禮敵於諸侯或

枹鼓之間威振於千里功則可大以官族而爲官德
亦不孤惟將門而有將君天才卓越雄略縱橫陶謔
性好於幡旗王濬志在於長戟東方諫議口誦孫吳
諸葛武侯坐吟梁甫屬有隋之末四海分崩皇運之
初三光草昧五星同聚田橫猶在於海中九代龍榮
隗囂尚屯於隴右賀拔盛操符誓衆斬木稱兵以被
髮左衽之於登櫓杙窮竒之號遂欲驅馳我塞北撓
亂我河西天子不憚於朝堂鼓其雷電使者相望於
道路申其弔伐武德元年乃詔侍中楊仁恭出使先
之以德義陳之以兵甲七旬于羽不籍有苗之師萬
國侯王坐見防風之戮君深知逆順獨斷胸懷去虜

即安轉禍爲福非如馬援遨遊二帝之都不學竇融
自保三分之重勅授昭武校尉鮮卑醜類慕容殘孽
遷於大棘之城止於小蘭之界雖謂其群下願聞禮
於上京而拜於將軍遂誇大於諸國貞觀八年詔特
進代國公李埒爲行軍大總管登壇拜將授鉞行師
開太一之三門閉陰符之六甲決勝於俎豆然後折
衝萬里信賢如腹心故能匡正八極君當仁不讓聞
義則行從王柔之戎旅棄班超之筆硯係單于之頸
有類長沙斬梯蘭之王更加平樂詔除上騎都尉車
師舊國俯枕前庭戊巳遺墟斜連後壁負天山而版
蕩擁蒲海而虔聖人之德非欲窮兵黷武者之

師蓋爲夷酋靜亂十四年詔兵部尚書侯君集爲行
軍大摠管軍營王帳武畧珠韜旌旗蔽於日月金鼓
聞於天地安人保大實憑帷幄之謀斬將塞旗咸籍
武夫之力君緬懷高義恩報國恩從來六郡之子是
爲萬人之敵殊衝所及攻靡堅城矛戟所臨野無橫
陣一舉而清海外再戰而滌河源飲至策勳抑惟恒
授詔除上柱臣君備嘗艱阻頻有戰功天子聞之累
加徵辟慕因疇之節羞賣盧龍之墓高魯連之義請
從滄海之遊遂乃散髮鄉亭拂衣丘壑爲趙魏之老
在義皇之年關內諸公深知郭解洛陽人物高談劇
孟家僮有禮皆使拜賓門客多才咸能市義南宮養

老坐聞鳩杖之榮東岳遊魂俄見鶴書之召以龍翔
元年某月某日終于里第嗚呼哀哉夫人某宮之女
也沅湘降祉河洛騰休符玉石之堅貞貫風霜之慘
烈鏡飛天上窺祥鳳於銀臺劍動星文秘蛟龍於玉
匣以某年某月日終越某年月日合葬於某原君孝
實因心忠爲德鮮花匝樹盡兄弟之歡娛好鳥鳴
林展交遊之女喜太初朗月俯照金鞍叔夜清風來
生寶劍故能必勝攻必取西零種族遙憚武臣北
漢酋豪見稱飛將雖死之日猶生之年園令獨慕於
相如漢帝長懷六李牧長子游擊將軍和政府右果
毅都尉上柱國五雄次子朝散郎行西州柳中縣主
簿上騎都尉知廿等三餘廣學百戰雄才就養之方
兼中愛敬慎終之道不忘哀戚雖雨崩防莫無孔子
之格言而鼠齧前松有文王之故事即以某年月日
改葬於木城之平原長婦某氏即永雄之妻也某官
之女柔風淑春習禮聞詩上奉舅姑旁睦娣姒温家
之婦方歡白工之臺盧氏之妻空對黃金之椀先以
永淳元年六月日終至是即陪窆于塋內右翊衛弘
軌兵圖日用劍術天知六郡許其良家三川養其聲
利思弘祖德願叙家風託無媿之銘跋涉載勞於千
仞訪他山之石東西向踰於萬里烟効官昌運負譴
明特始以東宮學士出爲梓州司法傾蓋相逢當仁

不讓庶使見曹娥之碣楊修歎其好辭讀元壽之文
高祖稱其佳作其詞曰

大矣丞相天地翼亮烝哉王侯子孫蕃昌條分葉散
源濬流長金城北峙玉關西候山澤駢羅衣冠輻湊
降神生德與奇誕秀曰萬人英材標國禎鬢年學劍
中歲論兵以今許國東討西征皇家啓聖撥亂反正
逆賊遊魂不尔王命亦既授首河西大定叢爾湟中
車書未問帝跡斯怒攢其英雄風行電轉谷靜山空
二庭遺孽交河路絕天子聞鞏元戎素節王師無戰
海外有截歸我山廬功成不居歲云秋矣日月其餘
壽非金石命也何如孝乎兄弟葬之以禮蓼蓼者栽

盈集卷八

十一

人生若多言猶在耳邈若山河

楊盈川集卷八

楊盈川集

貞

楊盈川集卷九

墓誌

鄴國公墓誌

永昌元年春二月甲申朔鄴國公薨公諱柔字懷順弘農人也系已大原王廟諱改爲仙掌焉公即隋煬帝之玄孫元德太子之曾孫恭帝之孫鄴國公行基之子粵若稽古崇德象賢統承先王脩其禮物惟丞相保寧西漢淮太尉亮弼東朝功書王家澤流后嗣亦猶司徒之徽敷五教殷德日新后稷之播時百穀周有大資隋高祖昧旦丕顯齊聖廣淵皇天眷佑誕受顧命恭皇帝遜位明啟能讓天下作賓皇室與國

系集卷九

一

咸休系承百代之宗國稱二王之後公山河積氣清白餘基孝友著於閨門信義行於邦國縱心妙用不出戶庭覃思曲墳不窺園圃及其上公傳位命服居前有怵惕之心無驕矜之色漢之平帝猶敬劉歆魯之戴公尚聞商頌大唐貴爲辰極富有寰瀛用三王之禮以祠天地奏八代之樂以答神祇郊上玄定泰時金繩玉_目觀登封左箇西偏明堂布政未嘗不虞賓在列周客來庭禮秩尊於百僚贊拜絕於群后猶能小心畏懼恪慎肅恭上帝時歆下人祇協以爲藩屏以訓子孫稟命不融享年五十有五嗚呼哀哉越某月葬於某原嗣子某官生盡其孝死盡其哀學

不替於爲喪禮有踰於鑽燧上其宅兆俾無後艱述其家風謂之不朽其銘曰

有客有客乘殷之馬建于上公尹茲東夏有客有客乘殷之輅作賓王家率由典故天之蒼蒼人之亡亡栢欖成行魂歸故鄉

常州刺史伯父東平楊公墓誌銘

楊氏之先其來尚矣在皇爲皇軒在帝爲帝譽在王爲周武在霸爲晉文此之謂不朽西京爲丞相東漢爲司徒魏室爲九卿晉朝爲八座此之謂代祿公諱德裔字德裔弘農華陰人也即常州刺史華山公之元孫左衛將軍武安公之長子生而岐嶷代不乏賢

事親以孝聞在鄉黨恂恂如也始以父任爲太子左千牛備身轉秀容華亭福昌雒四縣令詔封東平公策勲上柱國是時也天子仄席求賢勵精爲化以公屈臨小縣馬片牛刀處治中別駕之任方展其驥足耳擢拜潁州幽州二司馬寬以制猛嚴而不殘每行縣錄囚徒其不平反者十八九詔徵尚書郎御史中丞饒亮亮有主臣之節尋以公事去官復拜饒州括州越州都督府三州長史在會稽引陂水溉田數千頃人獲其利于今稱之馬遷棣曹恒常四州刺史歷政清白爲當時所重於是覽先賢之言知止足之分罷歸初服告老私庭乃率群從子弟營別業於宜

神鄉之望仙里其制宅也宗廟爲先廡庑爲次居室爲後喟然而言曰古人所謂歌於斯哭於斯聚國族於斯者吾知之矣維文明元年夏四月某日薨於正寢春秋八十有五嗚呼哀哉公簡貴不交流俗非禮不動非禮不行望之儼然聽其言也屬博觀史藉不學書生尋章擷句而已至於臺閣舊事法令科條莫不成誦在心若指諸掌最爲六尚書郎二年御史中丞滿歲宰人者四縣上佐及專城者九州盛德形容被於歌詠門生故吏遍於天下永淳二年輿駕幸東都召見公於金城頓訪以得失公採摭群言悉心以對高宗嗟嘆者良久賜几杖粟帛鄉里榮之一子令

珍早亡朝夕溫清者四女公慨然有喪明之痛因不豫彌留遺命以弟之子神毅爲後越垂拱元年春二月某日與夫人隴西李氏合葬於某原禮也遠近會葬千餘人操筆而爲誄者以百數嗚呼哀哉其銘曰
巖巖華山峻極于天上侵神氣下固窮泉夫惟積德
生我大賢其滔滔河水中國之紀派別九都經營萬
里夫惟積潤生我君子其惟忻之城惟華之亭宜陽
之地益部之星公爲其宰不殞其名其汝陰之國蒞
門之北陵水朝黃燕雲夜黑公爲其佐日宣其德
入踐郎官含香握蘭來居白室直繩明筆潘子一除
士師三黜其邑號郟陽山名括蒼東南之美吳會之

鄉展其驥足有賴王祥六四州之大是稱都會千里之榮即分麾蓋言旋舊國保茲著艾七生爲貴臣死爲貴神陰堂是夜古木非春鄧攸無子天道何親八

杜袁州墓誌銘

公諱某字某京兆杜陵人也高華之撫教萬方堯帝之平章百姓一稱聖人之後易曰積善之家在夏爲御龍在周爲唐杜三王以降百代可知車服出於南陽衣冠襲於京兆曾祖榮華後魏秦州別駕祖良宇文朝復州長史父舉唐易州司兵叅軍州事端履道祿史安貞厚於天爵薄於人位闕里之庭學夫詩禮太丘之門執其羔鴈公孝慈而敬威莊而安淹貫義

方周覽典籍服其服則文之以君子之容遂其辭則實之以君子之德起家左翊衛選授貝州府倉叅軍事出自中禁在於外臺謹其蓋藏實其倉庾尋遷遂州咸安許州長杜湘州洛陽三縣令地方百里官歷三城言非法度不出於口行非公道不萌於心令不肅而威宣教不舒而德洽轉號州司馬制授朝散大夫娶州司馬又遷蘇州長史加中散大夫鸞鳳不棲於枳棘鸞雀不集於梧桐宜得其材非公莫可我大周誕受萬國寵綏四方建官惟賢垂拱而理乃命公爲朝議大夫使持節袁州諸軍事守袁州刺史天王之使列國之君發其德音而勸不用賞正其顏色而

禁不用刑德成而位尊名遂而身退乞骸告老
言歸以某年月日終於淮海之館春秋七十有七嗚呼哀哉夫人太原王氏魏驃騎大將軍新昌公平之曾孫唐蜀王府典軍上柱國志隆之女也纂承洪烈嗣續徽音中外柔加小大懷睦夫人之化國風美於鵲巢寶劍之沉夜氣衝於牛斗享年四十八嗚呼咸亨二年某月日終長杜之官第維天授三年春二月合祔於杜陵之平原禮也王人吊祭儀仗官給長子某官等毀形於骨痛貫於心父母哀哀昊天莫報佳城鬱鬱白日何年願述餘風式銘幽壤其銘曰
鳳凰鳴矣于彼高崗顯允君子邦家之光猗歎令德

秀於閨房歲云暮矣池樹荒涼死則同穴如何彼蒼
隔川縣令李公墓誌銘

公諱嘉字大善隴西成紀人也趙郡太守雍州大中正上開封府永康公之孫幽州都督鎮軍大將軍上柱國丹陽公之子重華以文明允塞謨九德於臯陶仲尼以恭儉溫良繇六經於柱史將軍李牧人主願其同時河尹李膺天下思其執御况乎衣冠代美祖考家聲占於日月為宗周之姬姓誓以山河則炎漢之劉氏公門承將相地積英靈望之儼然橫斷山而鬱起聽其言也注懸河而不竭王則秦王所見天照白虹劍則殷帝所傳星浮紫氣假使蔡中郎之博學

郭有道之人倫何嘗不聞迎王粲而倒屣爲茅容而
下拜起家爲太子左千衛以調升也按河圖於玉版
震一索而爲長男考天象於銅渾心前星而爲太子
直城霞遶曲障雲平出入青榜之門周旋黑衣之列
稍遷越王府戶曹叅軍越之建國也地居南斗之躔
王之受封也禮極東門之拜郎爵所以隆懿親恭和
所以資明德一言而干楚后即從雲夢之叟三見而
說趙王仍襲上卿之印又遷隰川令川原爽塏風俗
和平晉獻公之胤夷吾是邑代恭王之子郢容爲侯
陽泉依六壁之城孟津合三溪之水公以輜車就列
墨綬當官有蠶績於邨人用牛刀於魯邑市鄆無競

不假鞭絲學校方興唯聞擊石諸侯取其軌則四海
瞻其儀表爲杜陵之男子誰繼後曹茂鄉里之小人
願辭彭澤於是退歸初服就養私門戲嬰兒於階下
伏老子於井上尋丁外艱哀毀踰制加人一等俯就
三年服闋襲封丹陽公勲上騎都尉公以安車禮盛
賜杖年高被服先王之道游優太平之化左琴右書
謀孫翼子居常飽德不言何氏之萬錢直置當仁豈
特于公之駟馬清風可賞必有鸞鳳相期白雪時遊
多以神仙見屬義形於金石節貫於松筠西山五日
之朝將化翠而生翼北海明年之駁便展展而至已
以永淳元年八月二十一日終于京師道政里之私

第享年七十二嗚呼哀哉長子隨州光化縣令守節等哀纏弔鶴痛結鄰人孝之始也則身體髮膚所以全其性孝之終也則衣裳棺槨所以成其禮天高八萬想京兆而何從地濶三阡對任城而有恨越弘道二年歲次甲申正月甲申朔二十六日巳酉陪葬於昭陵東南之平原炯樛櫟庸材瓶簞小器仰惟先友叨雅契於金環俯逮婚集作嘉姻荷深知於玉潤南容有道僅聞將聖之言東武建瑩俄述安仁之賦嗚呼哀哉乃作銘曰

愛初帝子堯之大理降及真人國之柱史衣冠百代慶靈千祀吉兆占熊嘉名贈鯉聿脩厥德必復其始

盧州墓志九

七

大孝因心至仁由已肅成門內章華宮裏父任爲郎學優則集作從仕陽山之曲蜀江之浹月旦乘鳧田閭狎雉其心若鏡其直如矢亟改矣涼罷歸桑梓象賢舊國安車暮齒忽愴池臺俄悲生死郭門一望郊烟四起夫復何言平生已矣

李懷州墓志銘

公諱冲寂字廣德隴西狄道人也左衛大將軍西平王之孫荊州大都督漢陽王之子今上之族兄也原夫帝堯之緒運期受於天漢顓頊之胃大命集於皇家光耀則若木十枝波瀾則長河九派或中軍按部金鼓所以接其聲或刺史班條冕旒所以彰其德信

可謂玉林多寶天族多奇以御邦家以藩王室者也
公山河誕慶辰昴發祥金多木少孔文舉之天骨玉
絮水清華子全之神彩南陽季恭偉懸識宰臣沛國
趙元儒竊知公望編漢皇之兄弟列周室之邪茅天
下稱其八才吾家號爲千里初任尚舍直長稍遷城
門郎仍奉勅於弘文館讀書掌舍諸宮城門列校制
誦東觀有黃香之博聞賜其制書有班游之廣學尋
授篤部員外郎轉金部郎中又勅公爲戎州道支度
軍糧使天府充羽軍儲委積振南宮之紱冕譽表三
臺歷西蜀之江山榮高駟馬遷大府鴻臚二少卿丁
艱去職楊播之登太府初聞累遷之命鄭默之拜鴻

臚遽見終喪之禮孔宣尼旣祥五日彊不成聲孟獻
子加人一等懸而不樂服闋歷青德齊徐四州刺史
東臨巨海西至長原或全齊歷下之軍或大禹徐方
之地任隆刑部陶侃八州寄重潯陽桓伊十郡遷宣
州刺史吳王舊邑楚國先封江迴鵲尾之城山枕海
根之治蜀郡無此計吏則惟薦張堪潁川尤多制書
則但稱黃霸巡察使以尤異聞遷陝州刺史觀其井
邑號伯上陽之故墟度其川原周公分陝之遺跡唇
齒通其列國咽喉壯其天險善人爲政無待於百年
童子行誼先符於兩日于斯時也天以順動帝以會
昌修封禪於岱嶽作明堂於汶上望山川而逾群神

執玉帛而朝萬國制公檢校司理常伯文昌之省暹
接大階建禮之門旁連複道萬機匡贊八座謀猷旣
陪軒帝之巡仍覲漢家之事屬河縣而南走憑斗骨
而爲城居衛蒲東亡界朝鮮而爲役屬乘輿乃誅後
至討不庭申命六事之人以問三韓之罪制曰師出
遼左卿可爲北道主人檢校營州都督石門山險銅
鬲河流天文則營室辨方地象則神臺鎮野供其行
李鄭國有東道之名爲我主人常山當北州之寄遼
東平以功遷蒲州刺史堯都蒲坂舜耕歷山昭襄王
始作河橋穆天子至於雷首汝南朕之心腹遂拜韓
崇河東吾之股肱時徵季布遷少府監忠信爲主楊

卓齊衡清白在官常林比德又除蒲州刺史諸童之
逢迎郭伋再牧并州百姓之願得耿純復臨東郡孝
敬皇帝國之儲嗣乾之長男四極奏於重光二年宸
於上帝崇其謚號用黃屋於羽儀卜其園塋象玄宮
之制度山陵之建也以公檢校將作大匠游衣漢寢
之外抱劔橋山之下百工畢力陳琳於是乎躬親諸
吏懷恩魏霸於是乎無謫遷銀青光祿大夫行少府
監若夫協時月乘天正秦人往事遊別館而祈年漢
宮舊儀下明庭而遷暑上幸九成宮以公檢校右領
軍將軍木官如故董司戎政以戒不虞七校陳其甲
兵五營按其軍服領軍之職用文武於紀瞻右軍之

官叙勤勞於常惠尋以公事免左授歸州司
舊也始得子男之田夔之也裁爲附庸之國人同
賈傳路似長沙伯鸞有聲於鄉里仲任見知於筆札
制遷中大夫行交州都督府長史大庭之庫少吳之
墟上真降婁金精吐宿旁瞻日觀木德題山別乘初
迎將宣萬邦之化佩刀終爽徒見三公之服以永淳
元年某月日行次唐州方城縣遇疾薨朝廷聞而傷
之贈懷州刺史公嚴而有禮直而能和行孝立身移
忠事主生知者上重之以八索九丘道在斯尊加之
以文昭武穆故能入登常伯出踐方州爲六卿之儀
表發三軍之號令列長戟於門前羅曲旂於堂下子

孫朝夕玉樹相輝賓客遠迎玳簪交映悲夫屨履
黜安仁再免奚辭棘署俯集桐華慘舒則不繫陰陽
喜愠則不形于顏色何嗟及矣竟遊東岱之山無所
不知旋閉南陽之墓二年夏五月日葬於萬年縣龜
川鄉之平原長子某官某次子某官某箕裘必復花
萼生光隣人泣其悲慟明主憂其毀瘠觀其弔客不
無雙鶴之微察其成墳自有百鳥之感森森隴樹漠
漠郊烟右玄灑而浩蕩左驪山而起伏杜陵萬家之
邑非復城池滕公駟馬之銘不知年代其銘曰

高陽積德武昭餘慶宅鎬開基封唐起聖協和萬國
平章百姓天敘諸侯禮樂宗正其一周之曲阜漢之平

陸地則葭葦祥惟嶽瀆鄉黨稱善閭庭雍穆始拜城門即遊天祿其大微之位益部之星卿則有六四至丹青州則有九八牧專城既踐臺閣仍司甲兵其倚伏無兆遺隙有運賈誼從王桓譚佐郡自忘寵辱曾無喜愠人去何歸天高不問嘒東都門外長樂宮邊白馬旒旒青鳥墓田楸桁夾路碑石書年百代之後南陽之阡

其五

從弟去盈墓誌銘

古者黃帝軒轅氏沒帝嚳高辛氏作幼而徇齊長而敦敏則天下之人用其教者百年忠肅恭懿宣慈惠和則天下之人謂之才者八子黃鳥旗而白魚躍有

盈州集卷九

十一

周武之興王彤弓一而旅矢千有晉文之起霸雖隱公遜位衰侯失國而文之昭也武之穆也司徒爲五教之官有社稷焉有黎人焉承相臨萬機之職峭函鴻盛赫奕於朱輪河洛台階昭彰於白玉積善餘慶信而有徵國子進士楊去盈字流謙弘農華陰人也曾祖諱初周大將軍隋宗正卿常州刺史順楊公皇朝左光祿大夫華山郡開國公食邑本鄉二千五百戶唐虞之稷契魏晉之裴王晏嬰可以事百君阜繇爲之墓九德麾蓋兵馬人知牧伯之尊名山大川蘊積公侯之氣王考諱安僞鄭王充逼授二十八將封鄒國公尋謀歸順爲充所害皇朝贈大將軍旌忠烈

也陶謙雅尚祖述雄心會天子之蒙塵見諸侯之釋位雖陳平去就潛懷杖劍之謀而石勒凶殘遂及推墻之禍父某潤州句容遂州長江二縣令朝散大夫行鄧州司馬文武兼備清白在躬人無間言位不充量四方取則孔宣父之踐中都百里非才龐士元之登別駕若夫庭生玉樹身帶金縷有衛玠之風神有張良之容貌蔣琬之譏盛元貞在司空陳蕃之對薛勤志清天下觀其昏定晨省立身揚名怪草蔚其休徵神魚會其冥感莊公獨嘆聞潁叔之純行有道相推見茅容之盡禮則閨門雍穆以孝聞也輔仁會友合志同方晏平仲之善交鮑叔牙之知我張堪死日

妻子惟託於朱暉劉惔生平風月每思於玄度則朋友之德若蘭芬也朱穆好學中食忘殮謙周研精欣然獨笑張華四海之內若指諸掌班固百家之言無不窮究鈎深致遠悅丘墳也八音繁會五色章明動天地而感鬼神序人倫而成孝敬陽臺並作楚襄王賜雲夢之田上林同時漢武帝給尚書之筆則瓊敷玉藻未足云也自攝齊東序撰杖西膠推宰我之能言貴顏回之有德成如麟角道尊於壁水之前翼若鴻毛俯拾於金門之下方將咫尺宣室扈從明庭申賈誼之忠讜畫楊雄之規諫豫章七載擢脩幹而聳長條有烏三年搏積風而運滄海豈期數有迤否天

無皂白苗而不秀秀而不實蓋有是夫古人有言歿而不朽者此之謂也春秋二十有六以上元三年五月二十二日歿于京師勝業里嗚呼哀哉至儀鳳四年十二月二日歸葬於華陰之某原不忘本也山河鬱鬱松柏蒼蒼骨肉閉兮歸后土魂魄遊兮思故鄉三荆搖落五都悲涼痛門戶之無主悼人琴之兩亡嗚呼哀哉其銘曰

高集遠躋濁涇清渭天子諸侯司空太尉星辰鼓舞山澤通氣道在者尊德成爲貴賈家三虎偉節最怒荀氏八龍慈明無雙劍光冲斗壁氣浮江據於道德聞於家邦子之承親溫席扇枕子之友悌同輿共寢朝歌不入盜泉不飲垂露崩雲繁絃緝錦明經大學射策鴻都對揚天子高揖司徒麟翻搏運波濤不虞子之喪也良可悲夫瞻望不及佇立以泣惟見黃埃心腸以摧躑躅兮徘徊嗚呼兮哀哉長夜漫漫何時巨魂兮魂兮歸去來

從弟去溢墓誌銘

處士弘農楊去溢年二十即華山公之曾孫大將軍之孫朝散大夫鄧州司馬之第四子也維嶽有五有華山之金石焉山阜相屬合谿懷谷所以鎮其南也維瀆有四有河宗之玉壁焉波瀾泪起廻洑萬里所以經其北也言其土地則巨靈之高掌遠躋作西漢

之城池叙其衣冠則太尉之四代五公爲東京之柱
國然後積勳累德枝分葉散大君有命臨夏日之壇
塲天子動容聽秋風之金鼓是以熊羆入兆羔鴈成
群黃憲之名聞於海內陳蕃之志掃於天下群童忽
聚逢苦李而先知賓客相過問楊梅而即對善父母
爲孝善兄弟爲友居家可移之道也利者義之和貞
者事之幹元亨日新之德也若夫節陵遵策汲冢殘
書倚相之八索九丘張華之千門萬戶莫不山藏海
納學無所遺至如白雪迴光清風度曲崔亭伯真龍
之氣揚子雲吐鳳之才莫不玉振金聲筆有餘力遠
心天授高興生知盡江海之良圖得烟霞之秘笈貞

不絕俗從容於名教之塲道由人弘坐卧於羲皇之
代千時朝廷之上山林之下英儒瞻聞之士洪筆麗
藻之客希末光而影集聽餘聲而響和者猶藩籬之
望天池鱗介之宗龜龍也嗟乎陰陽爲道大道無亭
毒之心禍福惟人聖人有抑揚之教智焉而斃仁焉
而終今也則亡歎顏回之短命死而可作萁隨會之
同歸文不在茲乎天之將喪也以某年某月某日終
於其所越儀鳳四年十月二日歸葬於華陰之某原
林野彌望關山寥廓樵童牧豎盍嘗君之池臺一去
千年丁令威之城郭悲纏於魯衛痛深於花萼姜肱
沒齒無因共被之歡鍾毓生年非復同車之樂嗚呼

哀哉其銘曰

叔虞建國天錫之唐伯僑受氏食萊於楊五侯簪紱
四代軒裳有德有行如圭如璋乃生男子初寢之牀
從公小大辨日炎涼天下之寶邦家之光神鋒太阿
旗鼓相當事親以禮左右無方交友以信芝蘭有芳
文犀律筆白鳳彫章鵬鷄齊致江湖兩忘謂天輔德
則惟其常蠲我吉士于何不傷關山搖落洲渚峇茫
黃塵匝地白露爲霜左右刮骨親賓斷腸摧殘玉樹
埋沒金鄉交黃鳥爰集于桑命不可續人之云亡

從甥梁錡墓誌銘

故右衛率府翊衛安定梁錡年二十有八以上元三

盤川集卷九

十五

年秋八月某日終於某所圖其景宿天有大梁之星
辨其物土地有大梁之國考其衣冠人有大梁之姓
綜軋坤而列位兼水土而成文業耕織而樂琴書有
梁鴻之雅尚生封侯而死廟食有梁竦之雄圖西山
求白鹿之仙東海受黃蛇之寶曾祖某光祿大夫開
府儀同三司驃騎將軍清河太守右衛大將軍同州
刺史上柱國郡守旁通於月建儀同上法於太階光
祿大夫下大夫之職驃騎將軍大將軍之比祖某河
南滎池令鄭州司功叅軍事冀州蒲州二府事司馬
朝散大夫紀王府司馬襄州同州二長史仲由辛邑
蕭何主吏桓温之徵謝奕誓爲司馬之官周景之禮

陳蕃仍降題與之命考某國子學生霍王府參軍并
州大都督府兵曹揚州大都府錄事參軍仲尼閒居
曰參不敏天子命我參卿軍事張常山之福應直保
金鈎謝太傅之閨門惟生玉樹所以圓光折水真氣
衝天孩笑之時見之者知其孝友能言之際聽之者
許其聰明審清河管輅之天文對江夏黃童之日蝕
揮其勁翮則鳳凰飛鳴於赤山豔其蘭筋則駿馬騰
驤於陸地若夫神龍負卦瑞雀銜書安釐王汲冢之
文穆天子羽陵之籍莫不因條報葉望表知裏鄭玄
殫見覽萬卷之八千班固洽聞涉五經之四部至如
瑠弧夜月角力三才鐵劒秋霜烟雲五色莫不推之

以智勇成之以揖讓歷諸侯而說劍直之無前引司
馬而操弓觀者如堵可謂多才天縱盛德日新曼倩
不讓於詩書翁歸蕪強於文武由是交通遂廣聲名
益振朱家大俠滕公有然諾之言劇孟過人袞盎有
逢迎之禮及其從微至著資父事君籍丹書之勲業
叅黑衣之行伍神宮海外瞻饒勝於明山太室雲端
奏仙簧於洛水翊駕馳道周廬甲觀方當奉詞出使
萬里行封受命忘身三軍拜將豈期年歲朝露浮生
過隙漢逸人之雅操命也如何魯司寇之知言苗而
不秀嗚呼哀哉望吾子者空懷倚問之嘆嗟余弟者
獨有亡琴之悲從日月於龜謀考圖書於馬鬣越以

儀鳳三年春二月某日甲子葬於其所悲夫吾見其
進由來孔李之家吾謂之甥實曰何劉之族陽元既
沒瞻舊宅而無成康伯不存對玄言而誰與其銘曰
山河帶礪金木精靈磊磊千丈森森五兵駢駢西掖
出入東明人壽無幾皇天不平碑留郭泰挽送田橫
終寂寥於相宅空嗟嘆於佳城

楊盈川集卷十

行狀

中書令汾陰公薛振行狀

高祖德魏給侍中黃門侍郎御史中尉散騎常侍直
閣輔國二將軍齊州刺史贈車騎將軍儀同三司華
州刺史謚曰簡懿曾祖孝通魏中書黃門二侍郎銀
青光祿大夫散騎常侍關西道大行臺右丞常山太
守汾陰侯贈車騎將軍儀同三司齊鄭二州刺史祖
道衡齊中書黃門二侍郎隋吏部內史二侍郎上開
府儀同三司陵邛潘襄四州刺史襄州總管司隸大
夫皇朝贈上開府臨河縣開國公父收皇朝上開府

盈川集卷十

一

兼陝東道大行臺金部郎中天策上將軍府紀室叅
軍文學館學士上柱國汾陰縣開國男贈定州刺史
大常寺卿謚曰獻河東郡汾陰縣薛振年六十二字
元超狀昔者唐堯之協和萬邦也有若四岳之敬順
昊天曆象日月虞舜之慎徽五典也有若八元之忠
肅恭懿宣慈惠和夏禹之分別九州也有若咎繇之
謨明弼諧允迪厥德殷湯之南征北怨也有若伊尹
之格於皇天姬文之受命作周也有若虢叔之聞於
上帝自唐虞而列考及秦漢而無譏元首必籍於股
肱方隆太平之化賢者必待於明主克致崇尚之業
若夫驂駕六龍驅馳七聖斟酌元氣裁成天道者其

惟聖人乎弘闡大猷發揮神化匡正八極阜成兆人者其惟良宰乎我大唐之建國也粵若神堯明揚側陋文王協於朕卜迎太公於渭水高宗求於朕夢得良弼於傳巖若歲大旱以爲霖雨若濟巨川以爲舟楫者也公舍天地之間氣依日月之末光能備九德兼資百行探賸索隱極深研幾韶齡之際羞言霸道詞賦之間已成王佐六歲襲爵汾陰男十一太宗召見勅弘文館讀書十六爲神堯皇帝挽郎十九尚和靜縣主高宗升儲之日也勅公爲太子通事舍人二十二除太子舍人高宗踐位詔遷朝散大夫守給事中年二十六尋拜中書舍人弘文館學士三十二丁

太夫人憂去職起爲黃門侍郎固辭不許脩東殿新書畢進爵爲侯公毀瘠過禮多不視事出爲饒州刺史上夢公徵爲右成務四十復爲東臺侍郎是歲也放李義府于印笮舊制流人禁乘馬公爲之言左遷簡州刺史歲餘上官儀伏誅坐詞翰往來徙居越巂五十三赦還拜正諫大夫五十四遷中書侍郎尋同中書門下三品兼檢太子左庶子五十九遷中書令車駕幸洛陽詔公兼戶部尚書與皇太子居守俄以風疾不視事高宗崩輿疾往成都抗表辭位至於再至於三詔加金紫光祿大夫仍聽致仕以光宅元年季冬旁死魄薨於洛陽豐財里之私第嗚呼哀哉公

地藉膏腴姻連戚里閩湖長往拜卿子而爲郎金榜
洞開徵列侯而尚主遂乃彈冠竈仕策名委質叩天
門於畫闕攀鳳翼於紫宸凡升右轄者一年居外臺
者兩郡四遷門下三人中書用能燮理我陰陽經緯
我天地塩梅我寶鼎梁棟我宸極理百官而察萬人
平邦國而和上下借如風后力牧左右軒皇蕭何曹
叅謀猷漢室未有一心事主四十餘年叅兩宮而出
入歷三臺而陟降合其道也大壑縱其鯤鵬遇其時
也名山出其雲雨功成輔弼德邁機深星象不憊方
踐中台之位山川並走竟遊東岱之魂天不憖遺民
將安仰越翼日詔贈光祿大夫使持節都督秦成武

渭四州諸軍事秦州刺史餘如故賜物四百段米粟
四百石東園秘器凶事給儀仗至墓所往還司賓卿
監護輿書帛祭別降中使賜歛衣一襲雜物百段又
詔陪葬乾陵依故事也公襲封之年也受左傳於同
郡韓文汪至天王狩河陽乃廢書而嘆曰周朝豈無
良相何得以臣召君文汪異焉神堯皇帝婕妤河東
郡夫人公之姑也每侍高宗詞翰高宗嘗顧曰不見
婕妤姪經數日便謂社稷不安其見重如此上幸溫
泉射猛獸公奏䟽極諫上深納焉後因閑居謂公曰
我昔在春宮與卿俱少壯光陰倏忽已三十年往日
賢臣良將索然俱盡我與卿白首相見卿歷觀書傳

君臣共終白首者幾人我觀卿大憐我我亦記卿深
公嗚咽稽首謝曰老臣早參麾蓋文皇委之以心膂
臣又多幸天皇任之以股肱誓期殺身報國致一人
於堯舜伏願天皇違黃老之術養生衛壽則天下幸
甚賜黃金二百鎰公有事君之節也不亦忠乎每讀
孝子忠臣傳未嘗不慷慨流涕以爲帝舜非孝子朱
雲非忠臣客有譏之者公曰寧有揚君父之過而稱
忠孝哉太夫人薨公每哭嘔血杖而後起上見公柴
毀泣曰朕遂不識卿卿事朕君父一致遂至於滅性
可謂孝子中書省有一磐石隋內史府君常踞而草
詔及公揮翰躍鱗每見此石未嘗不泫然流涕公有

立身之道也不亦孝乎其年脩晉史筆削之美爲當
時最孝敬崩詔公爲哀冊上幸九成宮勅皇太子赴
行在所置酒別殿享王公以下時太子英王侍皇帝
酒酒酣公獻壽曰天皇合易象軋將三男震坎艮今
日是也上大悅百官舞蹈稱萬歲賜雜物百段銀鍤
鍾一枚吐蕃不庭詔英王爲元師總戎西討公賦西
征詩一首上稱善嗟嘆者久之因代英王屬和御筆
繕寫朝以爲榮公有屬詞之美也不亦文乎黃門侍
郎上疏薦高智周任希古郭正一王義方顧徹孟利
貞等後皆有重名歷登清貴及燕左庶子又表鄭祖
玄沈伯儀賀覲鄧玄捷顏強學崔融等十人爲學士

天下服其知人公爲右成務獻封禪書及平夷策上
深納焉或有抵罪者同類數百經赦令獄官評經年
不決竟以死論公上䟽陳其濫詔百官廷議獄官及
宰臣未有所決公酬對如響衆咸服馬上歎息曰幾
令我殺無辜之人百察莫不震懼又上䟽陳請備塞
垣未幾而匈奴背誕公有神通之鑒也不亦明乎儀
表魁傑鬚眉若畫身長七尺四寸望之儼然喜愠不
形於色雖至於近習左右胥徒僕妾莫不待之以禮
公有行已之方也不亦恭乎在饒州六年以仁明馭
下鄱陽北崗上忽生芝草一株郡人以爲善政所感
共起一舍號曰芝亭因立碑頌德公有馭人之術也

不亦惠乎在印笮十餘載沉研易象韋編三絕賦詩
縱酒以樂當年有醉後集三卷行於世公有安和之
德也不亦康乎上初覽萬機公上䟽論社稷安危君
臣得失上大驚即日召見不覺膝之前席歎曰覽卿
䟽若暗室而照天光臨明鏡而覩萬象此後寵遇日
隆每軍國大事必叅謀帷幄在中書獨掌機務者五
年出納帝命口占數首上曰使卿長在中書一夔足
矣大駕東巡詔公驂乘上曰朕之留卿若去一目若
斷一臂關西事重一以委卿因賜物百段公有社稷
之勲也不亦重乎若夫有官功者賜其官族有大行
者受其大名公叙列國之倍臣猶安社稷黔婁匹夫

之介節不志仁義古今以爲通訓書藉以爲美談况乎輔佐明主寧濟天下生死無二始終若一業高於六相道貫於五臣其生也榮同心比於周召其死也哀陪葬均於衛霍豈使易名之典不及於會同賜謚之文不傳於終古門生故吏願述德音博士禮官佇聞清議是則鐘繇之策降於皇魏之年王導之疏寢於中興之日謹狀垂拱元年四月四日故中書令汾陽公府功曹姓名謹狀文昌臺考功竊聞生爲貴臣車服昭其令德死而不朽謚號光其大名今謹按故府主中書令汾陰公贈秦州都督薛元超以王佐之才逢太平之會撫綏萬國康濟兆人力牧輔軒皇未

爲靈善臯陶佐大禹猶有慙德名遂身退生榮死哀羽父之請魯君抑惟舊典衛侯之謚文子庶幾前烈謹上

左武衛將軍成安子崔獻行狀

祖弘壽隋獲鹿嘉樂縣開國侯父萬善皇朝左監門將軍持節隆州諸軍事守隆州刺史上護軍成安縣開國男謚曰信郡縣崔文年六十七夫推其天命南端上將之女考其地靈北極崆峒之武厭次有東方曼倩早達於孫吳瑯琊有諸葛孔明深期於管樂齊觀九年起家太穆皇后挽郎十六年授營州都督薩叅軍事燕齊遼遠所以分置營州天子命我以叅卿

軍事太宗文武聖皇帝把斧鉞動瓊璣發四方之人
爰整其旅問東夷之罪恭行天罰公自家刑國資父
事君樂王粲之神武棄班超之筆硯一鼓作氣方輕
肉食之謀七旬舞干始受昌言之拜二十三年遷除
王府西閣祭酒梁王武者漢王之少子廣東苑屬平
臺則司馬相如所以騁其詞賦陳思王植者魏國之
天人遊西園擁飛蓋則邯鄲子淑所以爲其賓友永
徽六年授晉州司士龍朔三年遷岐州司戶剪桐垂
棘珪璧相輝紫鳳寶雞休狎狎至從乾值異之風土
被山帶河之國邑邦君坐嘯方推太守之名鄰國從
遊始屈陪臣之禮尋丁外憂三年泣血一勵能使禽

獸莫觸其松栢神仙每留其玉石春秋忽變有君子
之終身金革不辭達賢人之俯就麟德元年有詔起
公爲左威衛脩仁府左果毅都尉仍命羽林軍長上
乘輿歷日月步山川詳益部之圖書聽于雲之律呂
長城十角盡入隄封高闕三襲並爲州縣於是九姓
抗表請築安北府城詔公馳驛詣以便宜行事則榮
奉中旨計日期還親降鑿輿待於故都樓上雖復東
西萬里張博望之尋河裝橐千金陸大夫之使越猶
未聞降星蹕迴帝車擬於陶侃扣天門之八襲方於
魯陽留白日於三舍若夫類上帝禘群神則孔宣父
之所刊者五年一狩登泰山禪梁甫則管夷吾之所

識者十有二君秦皇致風雨之迷魏后積貂羊之惑夫名山之所望非我后而誰哉是以馭蒼龍控玉鳳陰陽不測發揮於作樂之文天地無私揖讓於升中之禮公受陪祠汶上扈蹕梁陰列藩衛於環星受嘉名於捧日與夫茂陵之下獨留符命之書河洛之間不覩漢家之事豈同年而語也朝鮮舊壤歌箕子之風諶丰骨危城屬烏孫之背誕地惟孤竹不聞讜讓之名親則同株曾無急難之意特進泉男生以蕭牆構孽蔓草方滋欲去危而就安思轉禍而爲福請歸有道使者相望天皇愍一物之推講詔公於國城內迎接先之以造化之大示之以雷霆之威受其壁焚

其觀更徵侍子來朝京闕亦猶鄴生憑軾入齊國而下其城賈誼上書伏匈奴而答其背乾元元年詔遷遊騎將軍左威衛義陽府折衝都尉仍加上柱國右羽林軍長上如故是歲也太子太師英國公登壇而拜鑿門而出紫泥明詔不入於三軍之中黃石奇兵自行於九天之外山林爲室不能有藩籬之險魚鼈成橋不能有逃亡之路詔公出使預參帷幄進奇策納嘉謀攘無臂而執無兵單必勝而攻必取斬大風之異霧卷青丘卧長鯨之鱗烟銷碧海二年以平夷功詔除定遠將軍右武衛中郎將檢校左羽林軍總章二年詔遷宣威將軍守左武衛將軍檢校左羽林

藥封成安男咸亨二年進爵爲子尋奉別勅檢校右
羽林軍餘如故大夫人以桑榆晚節霧露沉痾減年
歲之扶危授皇天之賜藥屢陳表疏方請告歸頻降
絲綸未蒙優許則知忠臣奉上多從孝子之門受命
臨戎始見忘家之事潘安仁之愷悌始奉板輿張景
胤之純深終悲盡扇儀鳳三年以內憂解職尋降詔
起復本官四年加雲麾將軍正除左武衛將軍檢校
右羽林軍如故王人奪服纔聞趙熹之喪明主相憂
獨訝何曾之毀且割哀而從禮將以義而斷恩受軍
麾命服之數掌期門伏飛之職以漢宮清暑忽照邊
烽秦塞長城遂聞胡馬匈奴未滅霍去病所以辭家

天子勳容周亞夫於馬不拜調露元年詔公龍門鎮
守兼於夏州防捍飲水受命倍道兼行鞍甲成勞晦
明爲疾靈書降問即日追還中使接迹於家庭尚藥
綱繆於錫賚人生詎幾神道何知仰觀於天值三軍
之星落俯察於地逢五將之山崩詔書來北斗之門
圖像在南宮之壁以三年秋七月薨於紫桂宮右羽
林軍之官第詔賜御食并錦被一張常服一襲雜彩
百五十段贈物一百段粟一百石勅書弔贈禮越常
班喪用所資數優恒典琳琅觸日月在懷陶謙則
戲列幡旗賈逵則常陳部伍閨門有德歡若友朋事
君無隱心如鐵石至如出車授鉞東征西討孤虛向

背則雖女子之衆可以當於丈夫前後折旋則雖婦人之兵可以陷於湯火兔起而鳧舉龍騰而鳳飛無戰不平無城不剋有如馮異羞言大樹之功宛似魯連不受黃金之賞大平之事業行矣人主之恩榮備矣山河之寵久預同盟社稷之臣俄悲輟祭聖君興悼列辟相趨觀高鳥而歎良弓聞鼓鞀而思將帥宏圖秘畧實無得而稱焉追遠飾終請有易其名者謹狀永隆二年正月十一日故左武衛將軍成安子府功曹某上尚書省考功名也者功之表也謚也者行之跡也公叔文子曾辱四隣之交黔婁先生有餘天下之貴謹按故府主左武衛將軍上柱國成安子崔獻誕靈辰昴降德山河漢陽閻忠許有良平之策穎川徐庶知其管樂之才生覩太平仕逢明主秋風金鼓有司馬之論兵吉日壇場有將軍之拜職任重而道遠功成而身退荀息百夫之特彼蒼者天相如千載之人猶有生氣珠襦玉匣禮備於喪終筮短龜長事從於先見易名之道蓋取之於舊儀累德之文敢望之於執事謹狀

祭文

爲薛令祭劉少監文

中書令河東薛某謹以清酌中牢之奠敬祭故少監劉公之靈惟此陶唐有此冀方上天祚漢人神攸贊

開國承家枝分葉散三貂赫赫於臺省駟馬諶諶於
里閭德之有隣吐符兮降神家之積慶受祿兮宜君
星躔可以衝南越都邑可以質西秦言鄭公之不死
謂張衡之後身雍州爲積高之地初登吏部尚書即
喉舌之端始拜郎官見天子而題柱侍明光而握蘭
入麟麒之閣圖書掌於河洛測旋玉之璣造化窮於
制作大風積也方絕於雲天有力負之生悲於溝壑
嗚呼哀哉言念平生求其友聲適我願兮共得朋從
之道又吾姨也俱承下嫁之榮良辰美景必躬於樂
事茂林脩竹每協於高情援葭蘭而無愧指金石以
當行誰言條忽遽隔幽明人非兮地是心折兮骨驚

卜日兮天未遠陰雲凝兮歲將晚臨平原兮望行幘
君一去兮何時返石室兮沉沉蓬萊山兮寂又陰蒼
烟漫兮紫苔深陳絮酒兮涕沾襟嗚呼哀哉

同詹事府官察祭郝少保文

少詹事鄧玄機永昌令令狐恩府司直王思善楊炯
圭簿鄭行該等謹以清酌庶羞之奠敬祭太子少保
齊公之靈若夫星象降質山川受氣以道爲尊以和
爲貴軒后夢之於大澤文王卜之於清渭賈馮舟楫
之功必籍葢梅之味昭昭北斗宮號文昌隱隱西掖
池名鳳凰增萬機而叅政本定五字而對休光珥豐
貂之鞶鞶識遺佩之鏘鏘懸車之歲方稱國老步登

之崇遂居師保劉蕃以光祿緝熙和嶠以尚書贊道
百年方享於期願五福莫徵於壽考西山訪藥北壁
尋經金丹不化玉藥何成梁木斯壞曲池坐平府庭
颯而變色察米慘而相驚嗚呼哀哉玄機等親聞教
義夙承提獎懷德音之不忘痛丹壑之長往門館閔
寂簾帷彷彿奠行潦之蘋繁庶明靈之降饗嗚呼哀
哉

爲梓州官屬祭陸郪縣文

維垂拱二年太歲景戌正月壬寅朔二十二日癸亥
長史劉某謹以清酌庶羞之奠敬祭陸明府之靈夫
萬里之別猶使欽淚成血思德音之斷絕况百年之

分能不憂心如薰想公子兮氛氳惟彼積德挺生夫
君天垂白氣地發黃雲江則有汜爲國之紀居傳其
政愛人如子山則有梁鎮茲一方君弘其道視人如
傷又勞於外路阻且長曾未朞月人之云亡嗚呼哀
哉哀衰弱嗣朝暮一溢皎皎孀妻鎖乎下室蜀門如
劔長安如日歸路何從我心如疾嗚呼哀哉凡我在
位羈官邊城共戮力兮誰言死生思其人兮造其戶
庭恍無見兮寂無聲稱觴兮酌酒心折兮骨驚嗚呼
哀哉

祭汾陰公文

維大唐光宅之元祀太歲甲申冬十有二月戊寅朔

丁亥御辰楊炯以柔毛清酒之奠敢昭告於故中書
令汾陰公之貴神惟公含純德而載誕兮稟元精而
秀出備五行而立身兮半千年而委質屬天地之貞
觀兮逢聖人之得一若夔龍稷尚之寅亮舜朝兮若
蕭曹魏邴之謀猷漢室懸大名於宇宙兮立大勲於
輔弼如何斯人而有斯疾曾未遐壽中年殞卒嗚呼
哀哉若夫家傳寶鼎地闢金樓文則屬詞而比事兮
學則八索而九丘入則東藩之上相兮出則南面之
諸侯唯盡善兮未善固雖休而勿休既知退而知進
兮亦能剛而能柔大才則九功惟叙兮大智則萬物
潛周崇德庶業兮樂天知命而不憂嗚呼哀哉門館
虛兮寂寞歲窮陰兮搖落備物儼兮如存光靈眇兮
焉託垂總帷與祖帳兮罷歌臺與舞閣天子惜其毘
余兮群臣思其可作嗚呼哀哉俯循兮弱齡叨襲兮
舞纓公夕拜之時也既齒跡於渠閣公春華之日也
又陪遊於層城參兩宮而承顧盼兮歷二紀而洽恩
榮郭有道之青目兮蔡中郎之下迎條焉今古非復
平生無德不報兮願摩頂而至足有生必死兮空歛
恨而吞聲天慘慘兮氣冥冥月窮紀兮日上丁籍白
茅兮無咎和黍稷兮非馨嗚呼哀哉

楊盈川集附錄

唐書本傳

劉昫

楊炯華陰人伯祖虔威武德中官至右衛將軍炯幼聰敏博學善屬文神童舉拜校書郎爲崇文館學士儀鳳中太常博士蘇知幾上表以公卿以下冕服請別立節文勅下有司詳議炯獻議曰古者太昊庖犧氏仰以觀象俯以察法造書契而文籍生次有黃帝軒轅氏長而敦敏成而聰明垂衣裳而天下理其後數遷五德君非一姓體國經野建邦設都文質所以再而復正朔所以三而改夫改正朔者謂夏后氏之建寅殷人建丑周人建子至於以日繫月以月繫時

彙刊彙錄

一

以時繫年此三王相襲之道也夫易服色者謂夏后氏尚黑殷人尚白周人尚赤至於山龍華蟲宗彝藻火粉米黼黻此又百代可知之道謹按虞書曰予欲觀古人之象日月星辰山龍華蟲作繪宗彝藻火粉米黼黻絺繡由此言之則其所從來者尚矣日月星辰者光明照下土也山者布散雲雨象聖王大澤露下也龍者變化無方象聖王應機布殺也華蟲者雉也身被五彩象聖王體兼文明也宗彝者武雉也以剛猛制物象聖王神武定亂也藻者逐水上下象聖王隨代而應也火者陶冶烹飪象聖王至德日新也粉米者人恃以生象聖王物之所賴也黼能斷割象

聖王臨事能決也黻能兩已相背象君臣可否相濟也迨有周氏乃以日月星辰爲旌旗之飾又登龍於山登火於宗彝於是乎制袞冕以祀先王也九章者法陽數也以龍爲首章袞者卷也龍德神異應變潛見表聖王深沉遠智卷舒神化也又制鷩冕以祭先公鷩者雉也有耿介之志表公有賢才能守耿介之節也又制毳冕以祭四望岳瀆之神也武雖者山林所生明其象也制絺冕以祭社稷土穀之神也社稷粉米由之成象其功也又制玄冕以祭群小祀百神異形難可逼擬但取黻之相背異名也夫以周公之多才也故治定制禮功成作樂夫以孔宣之將聖也

故行夏之時服周之冕先王之法服乃自此之出矣天下之能事又於是乎畢矣今知幾表狀請制大明冕十二章乘輿服之者謹按日月星辰者已施於旌旗矣龍武山火者又不踰於古矣而云麟鳳有四靈之名玄龜有負圖之應雲有紀官之號水有盛德之象此蓋別表休徵終是無踰此象然則皇王受命天地與符仰觀則璧合珠連俯察則銀黃玉紫璽而宮之粉壁不足寫其形狀罄東觀之鉛黃未可紀其名實固不可畢陳於法服也雲者龍之氣也若者藻之自生也又不假別爲章目也此蓋不經之甚也又鸞冕八章三公服之者鸞者太平之瑞也非三公之

也鷹鷂者鷲鳥也適可以辨祥刑之職也熊者猛獸也適可以旌武臣之力也又稱藻爲水草無所法象引張衡賦蒂倒茄於藻井披紅葩之狎獵請爲蓮華取其文彩者夫茄者蓮也若以蓮代藻變古從今旣不知草木之名又未達文章之意此又不經之甚也又毳冕六章三品服之者按此王者祀四望服之名也今三品乃得同王之毳冕而三公不得同王之衮各豈惟顛倒衣裳抑亦自相矛盾此又不經之甚也又黻冕四章五品服之考之於古則無其名驗之於今則非章首此又不經之甚也若夫禮唯從俗則命爲制令爲詔乃秦皇之故事猶可以適於今矣若夫

義取隨時則出稱警入稱蹕乃漢國之舊儀猶可以行於代矣亦何取於變周公之軌物改宣尼之法度者哉由是竟寢知幾所請炯俄遷詹事司直則天初坐從祖弟神讓犯逆左轉梓州司法叅軍秩滿選授盈川令如意元年七月望日宮中出孟蘭盆分送佛寺則天御洛南門與百僚觀之炯獻孟蘭盆賦詞甚雅麗炯至官爲政殘酷人吏動不如意輒榜撻之又所居府舍多進士亭臺皆書榜額爲之美名大爲遠近所笑無何卒官中宗即位以舊寮追贈著作卽文集三十卷炯與王勃盧照隣駱賓王以文詞齊名海內稱爲王楊盧駱亦號爲四傑炯聞之謂人曰吾愧

在盧前耻居王後當時議者亦以爲然其後崔融李
嶠張說俱重四傑之文崔融曰王勃文章宏逸有絕
塵之迹固非常流所及炯與照隣可以企及盈川之
言信矣說曰楊盈川文思如懸河注水酌之不竭旣
優於盧亦不減王耻居王後信然愧在盧前謙也

新唐書本傳

歐陽脩

楊炯華陰人舉神童授校書郎永隆二年皇太子已
釋奠表豪俊充崇文館學士中書侍郎薛元超薦炯
及鄭祖玄鄧玄挺崔蝠等詔可遷詹事司直俄坐從
父弟神讓與徐敬業亂出爲梓州司法叅軍遷盈川
令張說以箴贈行戒其苛至官果以嚴稱吏稍忤意
榜撻之不爲人所多卒於官中宗時贈著作郎

盈川集附錄

四

贈別楊盈川箴

張說

香杳深谷森森喬木天與之才或解其祿君服六藝
道德爲尊君居百里風化之源才勿驕恠政勿苛煩
明神是福而小人不寃畏其不畏存其不存作誥茲
酒成敗之根勒銘其口禍福之門雖有韶夏勿棄擊
轅豈無車馬敢贈一言

溫泉莊卧病寄楊七炯

宋之問

多病卧茲嶺寥寥絕幽獨賴有嵩丘山高枕常在目
茲山棲靈異朝夜翳雲族是日濛雨晴返景入巖谷
羃幕綠澗草菁菁山下木此意方無窮環顧悵林麓

伊洛何悠漫洲源信重複夏餘鳥獸蕃秋末禾黍熟
乘願守樊圃歸閒欣藝牧惜無載酒人徒把涼泉掬

祭楊盈川文

宋之問

維大周某年月日西河宋某謹以清酌脯羞之奠敬
祭於楊子之靈曰自古皆死不朽者文北河吐液西
岳生靈爰協通氣降精於君伏道孔門遊刃諸子精
微博識黃中通理屬辭比事宗經匠史玉璞金渾風
搖雲起聞人之善若任諸已受人之恩許之以死惟
子堅剛氣凌秋霜行不苟合言不苟忘大君有命徵
子文房余亦叨忝隨君頽頽同趨比禁并拜東堂志
事俱得形骸兩忘載懼寒暑貧病洛陽裘馬同敝老

幼均糧自君出宰南浮江海余嘗苦饑今日猶在之
子妙年香名早傳從來金馬夙昔崇賢門庭若市翰
墨如泉千載之後聞而凜然死而不亡問予何傷傷
予命薄益州零落生平之言幽顯相託痛君不嗣匪
我孤諾君有兄弟同心異體陟岡增哀歸葬以禮旅
餼飄零于洛之汀我之懷矣感歎入冥見子之弟類
子之形悼往心絕慰存涕盈古人有言一死一生昔
子往矣追送傾城今子來也乃知交情惟郭是戚有
崔不易來哭來祭哀文在席惟席何依冰雪泗滿家
人哀哀賓從微斷令我傷悲情慙昔時子文子翰我
緘我持子宅子兆我營我思子有神鑒我言不欺我

有絮酒子其歆之我亦引滿儻昭神期魂兮歸來聞
余此詞

唐會要

王溥

永隆二年二月六日皇太子親行釋奠之禮畢上表
請特延耆碩英髦之士為崇文館學士於是薛元超
表薦鄭祖玄楊炯崔融等並為學士

容齋隨筆

洪适

楊炯等四子之文皆精切有本原其用駢儷作記序
碑碣蓋一時體格如此而後來頗譏之杜詩云王楊
盧駱當時體輕薄為文哂未休爾曹身與名俱滅不
廢江河萬古流正謂此耳身名俱滅以責輕薄子江
河萬里流指四子也

香齋集附錄

六

文獻通考

馬端臨

楊盈川集二十卷晁氏曰唐楊炯也炯華陰人顯慶
四年舉神童授校書郎終婺州盈川令炯博學善屬
文與王勃等以文辭齊名海內稱王楊盧駱四才子
亦曰四傑炯自謂吾媿在盧前耻居王後張說曰盈
川文如懸河酌之不竭耻王後信然媿盧前謙也集
本三十卷今多亡逸

唐詩紀事

炯華陰人永隆二年皇太子已釋奠求豪俊克崇文
館學士後為盈川令張說以箴贈行戒其苛至官累

以叢稱卒於官中宗時贈著作郎

唐書裴行儉傳

宋祁

裴行儉在吏部李敬玄盛稱王勃楊炯盧照隣駱賓王行儉曰士之致遠先器識而後文藝勃等雖有文才然浮躁銜露豈享爵祿之器楊子頗沉默可至令長餘得令終足矣後勃等皆不得其死而炯終盈川令

唐詩品彙

高棟

楊炯華陰人舉神童遷盈川令武后時與宋之間分直習藝館卒有盈川集三十卷

楊炯集序

張遜業

盈川集序錄

七

楊炯華陰人幼博學聰慧揮文宏富拜校書郎爲崇文館學士神童舉也太常博士蘇知幾儀鳳中上表以公卿以下冕服請別立節文勅命詳議於有司炯獻議極詆之言知幾變之不經甚矣由是竟寢知幾所請炯俄遷詹事司直則天初坐從祖兄弟神讓犯逆左轉梓州司法叅軍秩滿遷受盈川令爲政殘酷榜殺下吏輒不爲意美名多榜亭臺耻笑動衆竟卒於官中宗即位贈著作郎以舊僚追及也平生著作惟存是帙三十卷者惜未之見也其自評吾愧在盧前耻居王後張說以其文思如懸河注水酌之不竭旣優於盧亦不減王耻居王後信然愧在盧前謙也論

曰炯之賦詞義明暢若庖丁解牛自中肯綮而渾天
考覈更見沉深推曆氏今猶擇焉五言律工緻而得
明澹之旨沈宋肩偕開元諸人去其纖麗蓋啓之也
諸作差次之五言古詩唐人各自成家備一代制可
也然以漢魏鏡之人人懸絕矣

楊盈川集附錄

